

١٩٨٠ و انت طالع

محمود جمال

عنوان الكتاب : ١٩٨٠ وأنت طالع

المؤلف : محمود جمال

المراجعة اللغوية : محمد حامد

الإخراج الداخلي : رشا عبدالله

فوتوغرافيا : مصطفى درويش

عبد الرحمن شرف

تصميم الغلاف : إسلام جاويش

رقم الإيداع : 2015 / 23812

ردمك : 978 977 85204 7 7

الطبعة الأولى : يناير 2016

المدير العام : هاله البشبيشي

مدير النشر : أحمد القرملاوي

مدير المبيعات : شريف الليثي



دار تويّا للنشر والتوزيع



dartoya2015@gmail.com



دار تويّا للنشر و التوزيع Dar.toya



@Dar\_Toya



Dar.toya



(+2) 01140899887 - (+2) 01000706014



٢٦٣ ش عبدالوهاب عبد اللطيف - كوبري القبة -  
القاهرة - مصر

جميع حقوق الطبع والنشر محفوظة للدار

# وانفتحت طالع

1980

محمود جمال

دار تويلا للنشر والتوزيع



إهداء

إلى أصدقاء العمر... شركائ في الحياة  
والعلم والرحمة

" نريد عمل مسرحية ١٩٨٠ وانت طالع "  
وصديق الذي حول السطور المكتوبة إلى حبرة  
واقعية يتفأل معك الجمهور...  
إفغناه محمد جلال

رحيمتوني وبلاتيني

" سألني صيد "

محمد جمال الدين  
١



## كواليس

المسرح يبدو قديما متهالكا ورغم ذلك يصر على البقاء. يقاوم تجاعيد جدارانه بإبتسامة من الأمل . يتذكر أيامه الخوالي حين كانت تضح ساحة جمهوره بالضحكات العالية. يتذكر جورج والضيف وسمير ( ثلاثي أضواء المسرح) ويقول في نفسه ليت الشباب يعود يوما . ترى هل يعود ؟ .. الصالة ممتلئة بالجمهور أغلبه من الشباب .. اضواء المسرح بالخارج تلمع في عين المارة و( كشك السجائر ) القابع امام المسرح له عدة اشهر في حال غير الحال .. والمسرح يسأل .. ترى هل يعود الشباب يوما ؟.. لعله يعود .

قبل بداية العرض مجموعة من اغاني الثمانينات والتسعينات تصدر ضجيجا من النشوى والإنطلاق في المكان لتضئ طاقة الذكريات لدى الجمهور .. بعضهم يتذكر أيام طفولته والبعض الأخر يتذكر مراهقته كل على مقدار سنواته التي عاشها .. والبعض يشعر بالملل ولولا الخوف من سرقة المقاعد لخرجوا الى الإستراحة للتدخين .

خلف الستارة يتبعثر الممثلين على المسرح بعضهم يرقص والبعض يغنى وآخر يقرأ آيات من القرآن .. احدهم يسأل المخرج عن عدد الجمهور .. والآخر يفكر في

( إفيه ) جديد يلقيه على الناس . الممثلات يضعن المكياج الأخير.. ثم تاتي اللحظة المنتظرة ويتجمع الجميع .. تتجمع اياديهم لقرأة الفاتحة ثم تصمت الاغانى لتعلن خلود ( المخرج المنفذ ) أن العرض سوف يبدأ بعد قليل .


وتدرجيا يصمت الجمهور . يعود كل منهم الى مقعده. يجلس الواقفين وتستريح الموبايلات من شقاء اليوم الطويل .. ثم تنطفئ الانوار في انتظار فتح الستار .. بينما يقف الممثلون على المسرح كل في مكانه في انتظار فتح الإضاءة ... وفي بطاء شديد يفتح كتاب المسرح مصراعيه لتبدا معركة العرض التي يجاهد فيها الممثل كي لا يتلعه خشبه المسرح . ويقاوم فيها المسرح شيخوخته ليرضى الجمهور الذي غادره منذ زمن بعيد ويقاوم الجمهور كي يخفى همومه ومشاكله ومتاهة إحباطاته عله يفوز بضحكة صافية أو ابتسامة صادقة أو بكاء نقي يخرج من عين مستمتعة بالبكاء .

وبعد لحظة من فتح الستار .. يضاء المسرح على الأصدقاء ... فيبدأون

– ايه يا جماعة مش هناخد صورة ؟

يرد الجميع في اصوات متداخلة

– ايوه صح ناخذ صورة .



# الصوره الأولى

فى منتصف الليل .

فى ليلة يكتمل فيها القمر ..

فى مكان ما مجهول الهوية نظرا لوجود شبورة كثيفة  
تحجب الرؤيا بشكل واضح .. يتجمع عدد من الشباب  
لألتقاط صورة .

يتنافسون جميعهم .. يجذبون بعضهم البعض  
للحصول على الأماكن المميزة فى الصورة . ورغم كثافة  
الشبورة الا انهم يثقون فى أن الكاميرا يمكنها ان تخترق  
الضباب لتنفذ الى ابتساماتهم المحفورة على وجوههم  
بصدق شديد وتُخرج لهم صورة واضحة لن ينسوها أبدا.

حاتم صلاح يشك فى انه لا يظهر فى الصورة وذلك لأنه  
قد وقف فى اقصى اليسار ( متطرف سيكة ) يرفع يده عاليا  
و يسأل أحمد الليثى الذى يحمل الكاميرا

حاتم : انا طالع عندك في الصورة

الليثي : نزل ايدك يا حاتم

حاتم : ايوه يعنى طالع والا مش طالع ؟

الليثي : نزل ايدك يا حاتم .... ونحترم نفسنا شوية .

( ثم ينظر الى سمر ) يلا ياسمورة الضحكة الحلوة

حاتم : ( في عصبية وبصوت عال ) ماتخلىناش نغلط في

سمورة بقى ... ( يعترض الجميع على سلوك حاتم وتكاد

سمر أن تتجه اليه لتضربه لولا أن يمنعها خليفة .. حاتم

يبتسم لسمر ... سمر تبتسم لحاتم ... ثم يعود حاتم

للنظر بتجهم الى الليثي ويسأله في غضب ) بقولك طالع في

الصورة والا مش طالع ؟

الليثي : ( في عصبية اشد وبصوت اعلى ) ماتنزل ايدك

بقى الله

حاتم يستسلم ويخفض يده .. الليثي يضبط الكاميرا ..

يسأله محمود

محمود : طب وانت مش هتصور معانا والا ايه؟

الليثي : هتصور معاكوا يا سيدى

ثم بسرعة يضبط الليثي الكاميرا ويتركها ثم يتجه

ليقف الى جوار حاتم فيضع حاتم يمينه على كتف الليثي

ويبتسمان ثم يبتسم الجميع

الكامري تعد .. ١ .. ٢ .. ٣ .. فلاش



نلتقط الصورة  
١٩٨٠ وانت طالع.

1980

## مقدمة

حين نتحدث عن جيل الثمانينات والتسعينات لن يتسع الف كتاب وكتاب للكلام وللحديث ولا ادري ما الذى يمكننى أن اكتبه هنا في هذه الوريقات البسيطة التى لن تكفى إلا لأن تكون ساحة لتذكر بعض التفاصيل وتصوير لقطة واحدة من مساحة الذكريات التى عشناها .. محاولة قد تبدو لى ناقصة لرسم لوحة من الحنين تذكرنا ببعض من مواقف تلك الرحلة التى مرت بطيئة من كثرة ما عايشناه من احداث . وسريعة بحكم ما طرأ على هذا الجيل من تقدم وسرعة لاهثة جرت بنا دون أن ندري لنشيب قبل الأوان .

إن العالم فى تطور مستمر ولكن عادة كان التطور يسير بالانسانية كما ينتشر الشعر الابيض فى الرأس دون أن تشعر به ودون أن تدري ولكن كانت هناك دائما اوقات فارقة فى تاريخ التطور الانسانى إستطاعت أن تنقل الحياة وتتقدم بها سنوات طويلة فى غمضة عين .. ونحن جيل عاصر تلك النقلة التى غيرت ملامح الحياة وابهتت ما قبلها بل واخفته

فلم يكن الأمر بالنسبة إلينا تدريجيا بل جاء على غفلة وكان لنا وافر من الحظ إذ لحقنا ببعض مما مضى وفي نفس الوقت استوعبنا النقلة الفجائية فاحتلتنا وعريدت فينا وحفظناها فعشنا بها .. فليس الأمر بالنسبة إلينا اننا جيل بين جيلين ولكننا مرحلة عمرية عاصرت عصرين .. فلحقنا ببقايا البيوت القديمة ذات الأسقف العالية وعاصرنا جدودنا وجداتنا الذين عاشوا عصر الملوك اللامع وسمعنا منهم القصص والحكايات .. حضرنا الحياة الريفية القديمة وشاهدنا بيوت الطين وفرن الخبز الفلاحي بل وبعضنا عاصر بعض القرى قبل انفتاح الكهرباء والتلفزيون إذ كنا حين نسافر نتجمع حول النار ليلا لنسمع تاريخ جدنا.. عشنا عصر القناة الاولى والثانية كما عاصرها مواليد الاربعينات والخمسينات فسمعنا اخبارا واحدة وشاهدنا جميعا فيلم السهرة المعروف دون ان يكون لدينا فرصة للأختيار فتشابهت ثقافتنا الاولى . خضنا رحلة الطفولة من دون انترنت او موبايل وعاصر القليل منا بقايا عصر الخطابات والرسائل المكتوبة . شاهدنا افلاما في بقايا سينيمات الدرجة الرابعة حيث يعرض في السينما اربعة افلام في بروجرام واحد وقد يكون من بين تلك الأفلام فيلما ابيض واسود مثل حمام الملاطيلي .. وربما كل هذا جعل من زكرياتنا شيء يربطنا . كان تطور الحياة يمشى بطئا وبمجرد ان مر على جيلنا توحش التطور إستطعنا مجاراته فحملنا الموبايلات وتطورنا مع تطورها واحترفنا

الفيس بوك والإنترنت واستوعبنا عصر الاغنية بعد انتهاء عصر المغنى بل واسقطنا جيلا ظل متربعا على عرش السينما وصعدنا بجيل آخر ثم من بعده جيل وجيل .. عاصرنا مئويتين وألفيتين . حملنا معاناة جيل السبعينات وأواخر الستينات بالإضافة الى معاناة مرحلتنا وربما كان هذا سببا في زيادة جرأتنا وشجاعتنا ومواجهتنا للحياة . فنحن بداية العصر الذى لم ولن يخضع او يستسلم او يقبل بالمسلمات . وحين تغافلت انظمة الدولة القديمة اننا جيل متمرد كانت الثورة . والثورة لم تكن بالنسبة الينا فكرة فجائية لكنها كانت قوة خفية بداخلنا .. بعضنا كان يدركها ويمارسها والبعض الآخر كان يشعر بها في جملة يقولها بصوت منخفض او يكتمها في رأسه قبل ان يخونه لسانه فيجهر بها .

وأخيرا جيل الثمانينات والتسعينات هو الجيل الذى حين ادرك عمر الشباب وجد ان عمر الشباب الذى تعترف به دولته هو ما بعد الاربعين فاكشف انه سيظل مراهقا ربما حتى بعد ان يتزوج وينجب اطفالا ... ولهذا فلن ترى في هذه السطور سوى تجربة مراهقة لمراهق من جيل ١٩٨٠ وانت طالع سيجتهد بقدر ما يستطيع ليصيبك بقدر من حنين أو شئ من ذكرى أو لحظة صغيرة يدعوك فيها للتأمل أو يحاول أن يلمس جزءاً بسيطاً من مشاعرك .. وللصدق لن أعدك باكثر من هذا .

\*\*\*\*\*

## تكملة الصورة الأولى

عاصم :  
تسعة وعشرين  
سنة

مي : اتين  
وعشرين سنة

عتابي :  
ثلاثة  
وعشرين

وليد :  
بعد ثلاث شهور  
هتم ثلاثين سنة

علي :  
مش عايز افكر

الليثي :  
مواليد  
1985

مصطفى :  
اربعة وعشرين  
سنة وشهرين

سمر :  
فيه حد يسأل  
بنت علي سنها

بعد النفاط الصورة ...  
بنظر الجميع الى اللامبرا  
الوهمية وعلى وجوههم  
ابنسامت ممثلنة بالأمل

ايهاب :  
انهاردة بقى  
عمرى 27 سنة

خليفة :  
فيه حد يسأل  
ولد علي سنه

حاتم :  
مبقتش فارقة

عاصم :  
ماشى فى الـ26

مروة :  
مواليد 86

محمود :  
عندى ...خمسة  
وتلاتين سنة

زيزو :  
سبعة وعشرين  
سنة

(نلنفظ لهم اللامبرا صورة اخرى )

وليد : متفائل 

سمر : متفائلة 

مى : لسه عندى شويه امل 

حاتم : مش شايف 

خليفة : مبقتش عارف 

الليثى : مش قادر افهم 

محمود : عندى ... خمسة وتلاتين سنة 





يعنى انا دلوقتى هفكر بصوت على  
واللى هكتبه مش همسح منه حاجة

## كلام مر نجل

**يدور في رأسى الآن ....** بعدين بقى .. طب الجزء المكتوب فوق ده موجود فى المسرحية وانكتب بسهولة جدا. والمقدمة دى دباجة مطلوبة وبصراحة كانت فى دماغى طول الوقت .. والمفروض انى دلوقتى ابتديت اكتب .. اكتب عن ١٩٨٠ وانت طالع .. اول حاجة هتساعدنى فى الكتابة هو تحديد اللغة ... هكتب بالعامية والا بالفصحى؟؟ لا .. احساسى ان مش ده المهم .. اللى المفروض انى افكر فيه هو انا هكتب ايه .. وعموما انا ممكن اكتب فصيحى وعامية على حسب الموضوع .. طب هيبقى الكتاب ساخر والا كتاب زى كتب الرأى العادية ..؟؟ فى الحقيقة انا دمت مش خفيف اوى على الورق . عموما هحاول انه يبقى كدة وكدة على حسب برضه . يعنى يا سيدى القارئ ببساطة جدا انا هحاول ان دمتى يكون خفيف وياريت متفاجئش لما تلاقى الموضوع والكلام قلب نحوى ..

– طب تمام وبعدين .

– وبعدين ايه ؟

– هنكتب ايه ؟؟

هو ده المهم دلوقتي .. ١٩٨٠ وانت طالع .. ده اسم مسرحية . الموضوع كان ان شوية شباب كانوا يمثّلوا في الجامعة مع بعض في فريق تمثيل كلية التجارة . دخلوا مسابقات فازت عروضهم بالمراكز الأولى على مستوى الجامعة وساعات برضه كانوا ياخدوا مركز تاسع في مسابقة مفهّاش غير تسع كليات . كانت احلامهم كبيرة ومالهّاش حدود . اللي بيحلم يبقى نجم كبير افلامه تعدى ايرادات احمد السقا واللى كان بيحلم يقعد محمد سعد في بيته من كتر ماكان ايام الجامعة بيضحك طوب الارض واللى كان حلمه صغير ومتواضع وكان يدوب بيحلم يبقى زى سليمان عيد يقول الإفيه في الفيلم الناس تضحك وخلص ماظهرش تاني في الفيلم .. المهم ان وهما في الجامعة كان فيه احلام .

واتخرجوا الشباب دول .. اتخرجوا نجوم الجامعة اللي الجامعة كلها كانت عارفاهم والبنات الحلوين كانوا بيتزمو عليهم و خرج كل واحد منهم يدور على حلمه . منهم اللي راحوا يقدموا في معهد الفنون المسرحية وماتقبلوش واللى لفوا على مكاتب الكاستينج ليل ونهار عشان يفوزوا بلقطة او اعلان ومحصلش واللى راح يساعد في الإخراج

يمكن المخرج يحن عليه ويقوله خش يا واد اعمل المشهد  
ده لكن المخرج محنش .. وبصراحة اتبخرت الأحلام والاهل  
بدأوا يشتكوا .

— انت يابنى مش اتخرجت ماتشوفلك شغلانة تصرف  
بيها على نفسك

— الخمسة الجنية اللى بتأخذها تقعد بيها مع الصيع  
صحابك ع القهوة اخواتك اولى بيهم

— ياخى اتكسف على دمك وساعدنا فى مصروف البيت

— من بكرة مفيش فلوس

وساعات يبقوا الأهل طيبين شوية فيبقى الكلام

— اوعى تفكر يابنى انى بقولك انزل اشتغل عشان انت  
بقيت حمل عليه .. ابدا .. لكن يابنى لازم تشتغل عشان  
نفسك .. الموهبة اللى عندك كمل فيها وانا هشجعك لكن  
يابنى موهبتك مش هتجيلك فلوس تبني بيها مستقبلك  
وتختفى الأحلام .. ومع كتر الكلام اللى ممكن يكون  
صح وجايز جدا يكون غلط قرررو نجوم الجامعة انهم  
يركنوا أحلامهم على جنب

— اطمن يا احمد يا سقا النجم اللى كان هيبطلك تمثيل  
نزل يشتغل كول سنتر فى برج التطبيقين

— ضحك الناس يا محمد يا سعد .. انا مش هقف في طريقك .. انا هقف في محل الملابس الرياضية ابيع فانلة ميسسى

حتى اللى كان بيحلم بيقى زى سليمان عيد بقى يرمى إفيهاته لصحاب شقق العمارة اللى وقف تحتها فرد امن يمكن يدوله بقشيش كويس يزود بيه المرتب ( ٧٥٠ جنيه ) .  
ومنهم اللى سافر .. السعودية .. قطر .. ليبيا .. الكويت .. دى .. وفيه واحد والله سافر السودان وعجبتة القعدة وهو دلوقتى متجوز ومخلف وعایش هناك  
ولم بيقى من الاحلام إلا الذكرى .. ولم بيقى من أيام الفرح والإنطلاق إلا ابتسامة يرسمونها بالزيف على وجوههم عندما يرون صورة كانت قد سجلت لحظة قديمة لأجساد كانت تصرخ بالحياة وعيون كانت تلمع من قوة الحلم النابض فيها .

مش بس بتوع فريق التمثيل بس اللى احلامهم بقت ذكرى .. كمان الواد الشاعر اللى كانت اشعاره قالبه الدنيا ومبهدل الدنيا ندوات ولقاءات وفي الآخر ابوه دفعله عشر تلاف جنية رشوة عشان يتوظف في الحكومة و صاحبة اللى كان بيغنى على سلم الجامعة زى تامر حسنى في فيلم عمر وسلمى ولسه امبارح مخصص منه يومين في كارفور عشان كان بيغنى في طريقة بيع الخضار واحتمال يسيب الشغل ويروح اولاد رجب وصاحبهم التالت اللى رسم اللوحة

الى انتقدت فرنسا لما منعت الحجاب وقاعد دلوقتي  
حالا بيصمم يافطة بقالة الصعايدة ويحط صورة صاحب  
البقالة في اليمين وصورة ابنه في الشمال وطبعا هتفتكروني  
بستظرف لو قتللكوا انكم لو شوفتوا اليافطة هتقاطعوا  
البقالة بالي فيها بالصعايدة كلهم . وسامح رونالدواللي  
ياما جاب اجوان ومركز شباب منشية الصدر بيحلف  
برفعته للكورة ودلوقتي حالا بينزل كوباية عصير فراولة  
لواحد من زباين الكافيه قاعد يتفرج على ماتش ريال  
مدريد وبرشلونة وياعيني كل ماينسى ويقف يتفرج على حته  
في الماتش (الكابتن ) بتاع الوردية يزغرله بعنيه زغره معناها  
غور انجر على شغلك... وغيرهم كتير واحلام من كل لون  
وكل شكل كانت تستحق انها تكمل ومكملتش .

المهم ... في يوم من ايام الصياغة ع القهوة ولعب  
الإستيميشن قررنا نعمل مسرحية ( بواق خريجين فريق  
تمثيل كلية التجارة اللي فضلوا في مصر ) كان الكلام ده في  
ديسمبر ٢٠١١ كانت الثورة جوانا سايبه بذور امل كبيرة كنت  
تحس لما تشوفنا ان الأمل والطاقة اللي فينا هتعمر ميت  
الف فدان خضرة وزرع ..

– طب هنعمل مسرحية ايه ؟ .. وهنتكلم عن ايه ؟

– ياسلام هنتكلم عن كل حاجة ومفيش ترميز كلامنا  
هيبقى واضح وباين وفي الجون وهنتكلم ونقول بحرية .  
مش هيهمنا حد .


( كانت الثورة باينة في صوتنا .. وكنا واحد .. افكارنا  
واحدة .. مبادئنا واحدة .. حتى ذكريات الميدان كانت  
واحدة .. كنا نجتمع في الرأى ان ده راجل منافق .. وده افاق  
كبير .. وكان كلامنا واحد .. ونكمل بعض .

– طب برضه مقرناش هنعمل ايه ؟

– هنعمل مسرحية

واتفقنا نعمل مسرحية مشاهدها منفصلة كل مشهد فيها  
بيتكلم عن موضوع معين . هنتكلم عن احلامنا ومشاكلنا  
وهومونا وذكرياتنا .. هنتكلم عن الثورة اللى نزلناها وشاركنا  
فيها وعن قصص حينا اللى كملت واللى مكلمتتش .. وبدأنا  
ندور على رابط يربط المشاهد ببعضها ولما لاقينا ان كلنا  
من مواليد الثمانينات قررنا تبقى مسرحية ( ١٩٨٠ ) ... لكن  
كمان جيل التسعينات شبهنا وتقريباً مشاكله قريية من  
مشاكلنا .. بسيطة يبقى نكمل ونقول ( وانت طالع ) يعنى

١٩٨٠ وانث طالع ..



# الصور الثانية

في التمانيات كانت الصور بدات تتغير . يعنى تقدر تقول كان حصل تتطوير يخلى الصور ماتبهتش بعد ماتعدى عليها سنين . ( كوداك . اجفا ) كان اعلان الكوداك بنت جميلة اوى وشعرها اصفر ماسكة عليه النيجاتيف وملزوقه على لوح ابلكاش قدام محل التصوير . لما كنت تشوفها من بعيد كنت تفتكرها بنت حقيقية واقفة بتبصلك . طبعا الصور اللى بتكلم عليها هى الصور اللى بتتمسك . الصور اللى بتتحط فى البوم يزحم ادراج المكاتب فى بيوتنا . كان الفيلم تقريبا ٣٦ او ٣٨ صورة مش فاكر بالضبط بس اللى فاكره انه كان بعد التحميض والطبع بيصفف على ٢٥ صورة منهم خمسة مهزوزين . ومش كل بيت كان عنده كاميرا كنا غالبا بنستلفها من جارنا او قريينا .

كانت اجمل حاجة انك مكنتش تقدر تتصور طول الوقت . كنا نتصور بس فى الايام اللى فيها فرحة . أكيد

هتلاقى لنفسك صورة في مصيف على شط اسكندرية او صورة البوم اتصورلك في عيد ميلادك أو عيد ميلاد اخ من اخواتك . صورة في فرح . او صورة في جنينة الحيوانات وانت بتاكل الزرافة . كنا غالبا بنضحك في أغلب الصور بس الضحكة كانت حقيقية لأن اليوم نفسه كان يبقى يوم سعيد .. ايوة عارف ان اكيد صورتك وانت لسه مكملتش سنه كنت انت غالبا بتعيط فيها .

في التسعينات كانت الكاميرات بدأت تنتشر شوية يمكن لانها رخصت . يعنى كان ممكن تشتري كاميرا نص كم بخمسة وعشرين جنيه او تكسبها مع كوكاكولا او لما تجمع البوم على بابا والأربعين حرامى بتاع الشمعدان .

بصراحة مش عارف اللى انا بكتبه ده كويس والا اى كلام بس هكمل . انا مبسوط . هتكلم عن البومات تخصنى ومش عارف ليه حاسس انك عندك البومات شبيها

**— البوم فرح ابوية وأمى ..** (( اللى مزعلنى انى مش موجود فى ولا صورة من الصور اللى فى الألبوم ده )) .. كان ابوية لسه صغير . راجل وسيم شعره اسود وناغم وشنبه مرسوم زى شنب رشدى اباطة لابس بدله زرقه وبيأكل امى قطعة جاتوه .. امى كمان كانت جميلة اوى وكانت لسه صغيرة كانت شبه حبيبتى دلوقتى وواضح انها كانت مبسوطه اوى يوم الفرحة .. وشايف فى عيون ابوية انه يحبها .

في صورة تانية معازيم كثير خالاق و خيلاني وعمامى  
وعماتي .... في صورة من الصور جدى .. أبو أبوية اللى  
انا محضرت هوش وماوعاش عليه . واضح كدة من الصورة  
انه كان راجل طيب .. الستات مكانوش اتحجبوا . شعر  
معظمهم معمول عند الكوافير .. باين اوى .. اللى شعرها  
ملولو واللى شعرها على واللى راشه على شعرها حاجات  
دهبى كدة عشان يلمع .. الكحل كله تقيل حوالين  
العيون والروج كله احمر .. مافيش الوان غير الاحمر ...  
ياالله...الناس دى كبرت كدة ليه ؟ كبروا اوى . فيهم ناس  
ماشوفتهمش بقالى سنين . وفيهم ناس برضه ودعتنا للأبد  
مش باقى منهم غير الصورة اللى فى الالبوم . يمكن مش  
بناخد بالناس والسنين بتجرى ان اهالينا كبروا .. يعنى زى  
ما تقول كدة ابوك وامك بتشوفهم كل يوم وده بيخليك  
ماتأخذش بالك ان فيه تغيير حصل لكن لما تمسك  
صورة قديمة هما كانوا فيها . هتكتشف ان فيه حاجات كثير  
تستحق انك تقف وتفكر وتتأمل وممكن جدا تبكى .. لما  
تبص وتكتشف ان والدك مبقاش تخين زى زمان او العكس  
ممكن يكون تخن زيادة عن اللزوم .. او تلاق وشه صغر  
او حدوده بدات تدخل لجوة لأن سنانه وقعت واحدة ورا  
التانية أو مثلا لما فجأة عينك تيجى على ذراعه فتتصدم  
لما ماتلاقيش القوة اللى كنت بتحس بيها زمان وهو  
بيطبب عليك او حتى بيضربك بيها .. وماتلاقيش فى ذراعه  
كله غير شوية لحم باهت دبلان هل كان من كتر الشقا

ومن مرور العمر او فجأة تبص على صورة قديمة لوالدتك  
فجسمك يقشعر لما تلاقى امك مش قادرة تنزل السلم  
وهى اللى كانت فى الصورة شايلاك وشايله اخوك وواقفة  
باشا زى الوحوش وعلى وشها احلى ابتسامة ... هتتصدم  
لما تلاقىها دلوقتى بتحفر عنىها فى ورقة بتقراها عشان  
تشوف الكلام ... او تشوف شعرها الابيض او شعرها  
المصبوغ بحنه بتدارى بيها اثر السنين او تاخذ بالك وانت  
مش دريان انها بقالها سنين مش عايزة تتصور وبتبعد عن  
المرايات .. كبروا برضه واحنا مش واخدين بالنا .. بس هما  
أكيد واخدين بالهم واكيد ساعات كتير بيفكروا فى الموت .  
اللى افكرته بمناسبة اليوم فرح الوالدين انى وانا صغير  
مكانتش الحياة سهلة بالنسبالهم اوى . افكر ان امى كانت  
مقدمة على البوتجاز والتلاجة ومجوش غير بعد سنتين من  
الجواز واللى افكره ان امى كانت بتنزل تملا جراكن ميه  
من عريية المية اللى كانت بتيجى كل يوم توزع الميه على  
الناس عشان الميه مكانتش دخلت المنطقة ( المعصرة  
حلوان ) واللى افكره إن ابوية سافر الإمارات عشان يحسن  
مستوى دخلنا وقعد هناك اربعين يوم ومقدرش يكمل  
وامى باعت شبكتها عشان تجيله فلوس تذاكر الرجوع.  
واللى متأكد منه ان كل امهات شارعنا كانت كدة .. وكل  
امهات شارعنا والشارع اللى جنبنا جالهم يوم قلعوا فيه  
شبكتهم وباعوها عشان الضيق يتفك او دخلو فى جمعيات  
دوختهم سنين وسنين عشان الفرج ييجى او عشان يسدوا

بيها ديون مالهاش حصر .. كانت المجارى بتطفح كثير  
والميه مكانتش بتيجى غير بالليل .. لو فاكر مصطلح  
(عصاية الغليه ) يبقى اكيد كان بيتك فيه شبه من بيتى .  
لو ابوك سافر وكمل او مكملش او حاول يسافر ومعرفش  
إو اشتغل جنب شغله شغلانة تانية يبقى انا مش بحكى  
سيرة ذاتية. بس ده مايمنعش ان كل واحد فينا لما هيشوف  
صورة فرح والده ووالدته هيفتكر تفاصيل عاشوها . جايز  
حاولوا يداروها عننا لكن احنا مكناش واحنا صغيرين اغبيا  
.. اكيد خدنا بالننا واكيد فيه حاجات كثير اثرت فينا . ( انا  
مش هكتب .. انت أمسك الالبوم وافتكر ) .

— **البوم عيد ميلادى ..** كان عندى خمس سنين . كنت  
بستنى الهدية .. ( تليفون ... عريية بريموت كترول ...  
كورة ... مكعبات ... مسدس ... بابا نويل ييطبل ... الواد  
والبنت اللى ييلفوا والموسيقى شغالة ويوسوا بعض ...  
صندوق كرة السلة اللى بزراير اللى كان تفضل تدوس على  
الززار عشان الكورة تقع فى السلة .. حصالة صفيح فى علبة  
مربه حوشت فيها فلوس كثير وصلت لـ ٣٥ جنيه وفى الاخر  
ابوية فتح الحصالة وصرف الفلوس اللى فيها )

ثم جاءت النقلة الكبرى ( الأتارى ) وإتجمعوا الصحاب  
عندنا فى البيت .. كان الجيم فى المحل عن الراجل بيريزه  
وتلات محاولات بس لكن عندنا كان ببلاش

سوبر ماريو .. ( كان فيه ناس ييسموه الطباخ عشان لما  
كان بياخد ضرب النار كان لبسه يتحول ابيض ولان ضرب  
النار كان عبارة عن كور حمرة فكانوا  
بيقولوا عليها طماطم) . اللي بفتكره

بعد السنين دي كلها ان  
المطلوب منك انك تنقذ  
العروسة اللي كانت عند  
الوحش .. انا شخصيا كان  
كل اللي بيهمني ساعتها اني  
اعدى الوحش وبصراحة مكانش  
يفرق معايا اوى اني انقذ العروسة .



بس لما بفتكر دلوقتي بكتشف  
انه كان فيه هدف .. هدف  
حقيقى كان علشانه سوبر  
ماريو ييموت . هدف كان

بيخليه يواجه السلاحف والقنافذ وكان بيخليه يقفز قفزات  
عالية بجرأة من غير خوف زى احمد السقا عشان ينقذ  
البت اللي بيحبها ولما كان ييموت كان يبص للى يلعب  
ويبتسم عشان عارف انه مات شهيد ... ( واضح ان انا  
ابتديت اخرف ) ... وطبعاً ( علاء الدين والكابتن ماجد  
وكوتتر وسلاحف النينجا والمصارعة )

طبعاً الدفعة اللي قبلى فى الحياة كان الاتارى اللي على  
ايامهم ( بتاع الطيارات ) ابو دراع فيه عصايا من النص ..

والدفعة اللى بعدى فى الحياة لعبت السيجا .. السيجا انا  
شخصيا مارتحلهوش .

مع مظاهرة الاتارى اللى ظهرت مرة واحدة كان طبعى  
يكون التطور بعد كدة البلاى ستيشن ودخلنا عصر  
المدربين وأصبح كل واحد فينا مدير فنى قادر على تشكيل  
فريق ووضع خطة محكمة للفوز فى المباراة .. لأومش اى  
مدير فنى ده انت ممكن تقرر انك تدرب برشلونة او  
مانشيستر او ريال مدريد أو بايرن ميونخ ... يا سلام ده ايه  
الحلاوة دى .. واتملت محلات البلاى ستيشن بالشباب  
والصوت عِلي ع الآخر والناس فى البيوت كانت تشتكى



وصاحب المحل كان يحاول يَسِكِت شوية  
اللى يلعبوا لكن على مين دى طاقة كانت  
بتخرج طاقة بتخلى الشاب من دول  
يتحرك مع دراع البلاى ستيشن بجسمه كله  
ولما كان يشوط الكورة كانت رجليه توزن  
الشوطة وتوجهها اكر من روبرت كارلوس  
فى زمانه واه لو الكورة مادخلتش جون  
كان كارلوس يتشتم شتيمه .. يتشتم  
هو وابوه وامه وعيلته كلها .. تقريبا  
كل شاب فى مصر فكر يفتح محل بلاى  
ستيشن من كتر ما كان يشوف الراجل  
بتاع المحل بيكسب ازاي .. وبصراحة  
جايز دى تكون من عيوب جيل التمانينات

والتسعينات ان معظمنا دائما كان المشروع الى بينور  
قدام عينه ويشوفه هدف نفسه يحققه انه يفتح محل  
بلاى ستيشن او ساير او يقف على عربية كبة او يجيب  
وصلة نت ويأجر النت لصحابه اللي فى المنطقة أو يفتح  
كافيه .. يمكن كان نوع للهروب السريع ناحية الغنى أو  
هروب من سيطرة الأب والأم علينا بفلوسهم أو استعجال  
لنجاح خافين انه مايتحققش بالشهادة اللي هناخدها بعد  
ماتخرج .. اصل الحياة عادة فى بلدنا ماشية بالتخطيط ..  
ورغم اننا كنا صغيرين لكن كنا عارفين ان صاحب محل  
البلاى ستيشن مضطرب الدنيا وعشان كدة مكانش بيهمه اوى  
ان السكان يشتكوا من الصوت العالى ونفس الحكاية  
صاحب القهوة والفكهانى اللي طالع بالفاكهة بتاعته مترين  
بعد الرصيف .. كنا عارفين ان كل حاجة متضطربة ومتراضية.  
المهم اننا فضلنا نلعب بس ومحدث قدر يفتح محل  
بلاى ستيشن ولا حتى عربية كبة

— **الالبوم الثالث** ... المدرسة و شلة الصحاب فى  
المدرسة والمدرسين والسبورة والطباشير وعبد الحليم  
حافظ ( الناجح يرفع ايده ) معظمنا تقريبا كان بيعيط اول  
يوم بعد ما امه سابته وروحت ولقى نفسه فجأة واقف  
فى حوش كبير فيه ناس كتير كبار ماسكين فى اديهم عصيان  
وعيال كتير صغيرين بس فيهم اللي اكبر منا.. اولى وتانية  
وتالته ورابعة وخامسة ... وبعدين زادت سنه سادسة ..  
طب ارواح انا فين .. ويتشكل الطابور.... وبالتدرج نتعلم

تحية العلم . وبالتدرّيج كل واحد فينا يصاحب اللي جنبه.  
على السبورة السوداء ( بسم الله الرحمن الرحيم ) وفي  
اليمن التاريخ الميلادي ثابت . كل يوم يتغير بس الرقم  
بتاع اليوم . يدخل مدرس العربي غالبا يمّسك ( البشورة )  
ويمسح الرقم القديم ويكتب بالطباشير رقم اليوم .. فوق  
السبورة وفي كل الفصول كان فيه دايمًا صورة راجل كنت  
احس وانا صغير انه خالي او عمى او قريبي من بعيد ..  
كان مبتسم نص ابتسامه وكان فيه شعر ابيض كثير في راسه  
مكنتش افهم مين ده ؟ ده مدرس والا الناظر ولا صاحب  
المدرسة لما سألت عليه عرفت ان اسمه مبارك ... محمد  
حسنى مبارك ( الرئيس ) كنت لما اشوفه في الصورة اتمنى  
انه يحكم بدل الرئيس اللي بيحكم مكنتش بعرف اربط  
انا وصحابي ان الرئيس ده هو هو الرئيس ده .. بس ازاي  
صغر وشعره اسود !!؟ لما كبرت فهمت ... ومع الخبرة في  
الدراسة كل واحد فينا بقى في اول يوم يجرى يحجز الكرسي  
في المكان اللي هو عاوزه .. الشطار قدام والخايين ورا .  
واللى مش هامهم حاجة يقعدوا في النص اما بقى الواد  
الغلبان اللي بلطجية الفصل بيضربوه كان يقعد في اليمن  
جنب الحيطه عشان قال يعنى يتدارى عن عيونهم .. اللي  
شايف نفسه يقعد جنب الشباك وابن المدرس إن وجد  
يقعد في كرسي القيادة اول كرسي في اول صف وفي النص  
بالظبط عشان من البداية كدة نتعلم ان الوسطة والكوسة  
اساس هنعيشه وهنعيش بيه وهيبقى اسلوب حياة ..

في سنين المدرسة الأولى بنتعلم العربي والحساب  
والدين.. وبتعلم للاسف نتعود على ضرب المدرس لنا

– إفتح ايدك .

– يا استاذ والنبى

– افتح ايدك بقولك بدل ماضربك على جسمك

– حاضر هافتح اهو .. بس والنبى بالراحة يا استاذ

– اللي هتفلت بعشرة

وهوب ينزل المدرس على ايد الفريسة الغلبان ..  
وتتعلم تضرب او تتشتم ويمكن دى المحاولة المبدئية  
لتهيئة المواطن على السكوت وتحمل الإهانة مادام من  
الكبير ومادام انت غلطت .. فيه واحد يقول دلوقتي ان  
اللى كانوا بيتضربوا يستاهلوا .. لأ مش حقيقى لاني كنت  
بخاف اتضرب انا كمان وانا كنت شاطر .. مش صح انى  
كنت اخاف مش صح انك تكون شاطر وتعمل الواجب  
عشان ماتضربش .. وانا شخصيا كنت شاطر وبتضرب عادى  
جدا .. ومرة اتمديت في الفصل والحكاية بتقول .. ان لما  
المدرس كان بيخرج برة الفصل عشان يعمل اى حاجة او  
مثلا كان بيغيب كان بيقوم واحد لزوج ملزق من تلاميذ  
الفصل يقف ع الفصل . اللي يتكلم يكتب اسمه في ورقة او  
على السبورة والولد ده عادة مكانش يكتب صحابه لكن  
كان لازم يكتب اسم حد لأنه لو مكتبش هيتغير والمدرس

او المدرسة هيوقف حد مكانه بعد كدة .. لازم عشان يستمر ويفضل هو التلميذ المدلل اللى بيقف ع الفصل يكتب اسامى تلاميذ يتضربوا وكان بيكتب . فاتعلمنا مانتكلمش واتعلمنا من صاحبنا اللزج ازاي نستمر ونكبر في الفصل كنا لما بنشوفه ازاي واخذ ع المدرسين وبيهزر معاهم وازاي هو الوحيد اللى ماييتضربش كنا نتعلم وتتمنى نكون زيه ويمكن ده اللى خلا بعضنا في شبابهم بعد كدة كانوا بيتمنوا يخشوا الحزب الوطنى ! .... احيانا كان صاحبنا اللزج ده ياخده الغرور فيبدأ وهو واقف على الفصل يدى اوامر فيقولنا مثلا حطوا دماغكوا على الديسك او مثلا يعطينا منحة ويتكرم علينا فيقول اتكلموا بس بصوت واطى .. فتعلمنا كيف يتكرم علينا الكبير ويعطينا هبه ومنحة هى ليست لنا فندعوا له بالخير واليمن والبركات بل ونتخبه ليقود الفصل في السنة التالية . ولأن روح المعارضة والثورة كانت واخذاني طول عمرى في مرة قرر صاحبنا اللزج ده وهو واقف ع الفصل انه يمارس سلطته بشكل واسع ويفرض علينا شكل من اشكال حظر التجول فأمرنا بأننا نحط راسنا ع الديسك ( نحط راسنا ع الديسك للى محضرش هذه المعاناة يعنى تبقى شبه موظف الحكومة لما بينام براسه ع المكتب اثناء الشغل ) وفعلا كل الطلبة حطوا راسهم ع الديسك طائعين في هدوء وصمت ماعدا انا وثلاثة كمان .. واتكتبت اسامينا ع السبورة.. بعد شوية قرر صاحبنا الواقف على الفصل أن

يكون رحيمًا عطوفًا فأمر تلاميذ الفصل بأن يرفعوا رؤوسهم مرة أخرى وممارسة جلستهم الطبيعية وهنا قررت العناد فوضعت رأسي على الديسك .. كنت لا أريد ذلك في هذا الوقت لكني اعتبرت اني حين ابقى مرفوع الرأس سأكون قد نفذت الأمر الذي اعطانا اياه هذا الطالب المتسلط زميلي ( وممكن دي برضه تكون من عيوبنا اننا ساعات بنعانده عشان نعانده ونعارض للمعارضة ) المهم اني لما حطيت راسي ع الديسك صاحبنا اللزج قام كاتب جنب اسمي نجمتين ع السبورة .. ولأنه متسامح وغفور ورحيم مسح اسامي الثلاثة اللي كتبهم معيا ... ولم يبق على اللوح الأسود ( السبورة ) سوى اسم العبد لله ... والذي كنت قد نسيت في هذا اليوم ان تلك الحصة كانت لأكثر المدرسين شراسة وعنفا في المدرسة إذ كانت لمدرس الالعاب ( ماتستغريش وافتكر كويس .. حصص العاب كثير كنا بنقضها جوة الفصل وده كان بالنسبانا بيبقى احسن من اننا نقضيها في حوش المدرسة ونقعد طول الحصة نلم في الزبالة بتاعة الحوش ) في اخر الحصة جاء المدرس ولم يجد سوى اسمي على السبورة وبيجواره نجمتين ( وفهمت ليه امي كانت دايمًا بتخيطلي شراباتي لما بتقطع او بتجيلي شربات جديدة مع ان الشراب دايمًا تحت الجزمة عادى يعنى لما يبقى فيه قطع صغير .. لكن في اليوم ده فهمت ) إذ خلعت حدائي وتعلمت اثناء تتابع الضربات على قدمي ان المعارضة ( اخرتها وحشة ) بل

وفهمت اثناء تعرجى وتعسرى فى المشى بعد ذلك ان  
 الطاعة تجعلك تمشى ( عدل ) وحين تمشى (عدل ) ( يhtar  
 عدوك فىك ) .واتكسفت احكى لأمى وأبوية على اللى  
 حصلى .. كنت محرج ومكسوف وحاسس بالإهانة ففهمت  
 انهم بيهينوك اوى عشان تنكسف تشتكى عشان لو اشتكىت  
 شكلك هيبقى وحش .



دايما كان فيه مدرس بنجبه ولازم يكون  
 فيه مدرس تانى بنكرهه وحصته بتعدى  
 علينا سنين .. افكر كويس مدرس كان  
 اسمه صالح كان بعين واحدة سليمة  
 وعنيه التانية بيضه خالص .. كان  
 جسمه مليون و بدقن خفيفة زى دقن  
 مجدى عبد الغنى وكان دايما بيشيل  
 معاه خرطوم برتقالى عريض وكبير  
 وحاطت جواه عصايا . كان دايما  
 شكله مرتبط معايا بالمسيخ الدجال  
 اللى كانوا العيال فى الفصل دايما

بيسالوا عنه فى حصة الدين .. كان جواية احساس ان هو  
 ده المسيخ الدجال . هو بعينه زى مايوصفوه بالظبط .  
 كان صوته ضخم وجليظ وكل العيال كانت بتخاف منه ..  
 كان ينزل حوش المدرسة فى الفسحة واول ما الجرس يضرب  
 عشان يعرفنا ان الفسحة خلصت يجرى وانا واحد واحد  
 بالخرطوم اللى ف ايده ويضرب وزى ماتيجى تيجى على

ضهرك على وشك على رجلك . الضربة تيجى فى دماغك  
عادى انت وحظك .. وياويله اللى كان يزوغ من الضربة  
عشان سريع حبتين كان استاذ صالح من على بعد ميت  
ميل يرمى عليه الخرطوم من بعيد ليصيبه فى قلب ظهره  
ولا كأنه احسن نشانجى فى العالم .. ومن قوة الضربة كان  
ساعات بيتهيالى ان الخرطوم اخترق جسمه كله زى ما  
الكفار كانوا بيعملوا فى المسلمين فى فيلم فجر الإسلام ...  
فى يوم من الأيام دخل استاذ صالح الفصل وعلى وشه  
ابتسامة غريبة وجواه نشوة مالهاش حدود وكالعادة فى  
ايده اليمين الخرطوم البرتقالى كانت حصة لمدرس تانى  
اول ما دخل سأل المدرس اللى واقف فى الفصل

— فيه حد مزعلك عايز تأدبه ..

المدرس قاله .... لأ .

وفى قمة النشوى والسعادة سأله تانى .

— قوللى بس فيه حد مضايك

وقبل مايكمل المدرس بص استاذ صالح بعينه الواحدة  
لصاحبه اللى كان قاعد جنبى وقاله

— قوم يله .. تعالى

صاحبه مفهمش سأله وهو مستغرب

— انا ؟

— ايوة انت تعالى ... إفتح إيدك

مكنش فاهم ليه ؟؟ ... بس فتح ايده .. كان فاكراه  
بيهزر ( كان وشه فعلا بيضحك ) ( وحتى لو مكنش فاكراه  
بيهزر كنت هايفتح ايده .. ده استاذ صالح ) .. وفجأة  
بصله في عينه جامد ونزل بعزم ماعنده بالخرطوم البرتقالى  
على ايده .. الولد مفهمش .. ايده وجعته اوى كل اللى  
في الفصل حسوا بده لكن الغريب ان ايد الولد صاحبي  
فضلت في مكانها مفتوحة زى ماهيه ماتحركتش ... استاذ  
صالح حس ان الولد بيتحداه .. نزل تانى بالخرطوم بعزم  
ماعنده على ايده وبعدها تانى وتالت ورابع لحد عشرة ..  
كنت بعد معاه .. وتقريبا لما صاحبي حس ان استاذ  
صالح فهم إنه بيتحداه قرر ساعتها إنه يتحداه فعلا  
ويكمل وما يضعفش .. اللى فاكراه ان بعد ما صاحبي خد  
عشر ضربات على كف ايده الشمال رجع مكانه تانى واول  
ما خرج الأستاذ صالح عيط ... عيط عياط معيطهوش طول  
حياته .. مش من الوجع . لكن لأول مرة يفهم ونفهم  
كلنا يعنى إيه تبقى مظلوم .. ومش مظلوم عشان اللى  
ظلمك مكانش عارف إنه بيظلمك أو ظلمك مثلا لأنه فهم  
عنك شئ غلط .. لأ .. تبقى مظلوم عن قصد لأن حد قرر  
إنه يظلمك .. فلازم تتعود إن الظلم مستنيك في اى وقت  
عادى جدا .. اللى استغريته وانا بحكى دلوقتي هو رد فعل  
المدرس اللى كان واقف في الفصل ساعتها ومكانش متضايق  
من صاحبي في اى حاجة بس ساب المدرس صاحبه يضرب  
التلميذ ( صاحبي ) ؟!!!!

في المدرسة مين يقدر ينسى الميس او المدرسة أو الابلة  
الى حبها وكان بيستنى حصتها بفارغ الصبر ويقعد طول  
الحصّة يبصلها ويتأمل جمالها ... ومين برضه يقدر ينسى  
المدرسة الجميلة اللي اتهموا عليها في يوم واتحرشوا  
بيها بشكل مهين .. دايمًا فيه ذكريات حزينة لما بنفكرها  
بنبتسم أو بنضحك لكن فيه حاجات تانية لما بنفكرها  
بنتضايق وبتسيب جوانا اثر سخيف مانقدرش ننساه ولو  
قدرنا ننساه او افكرناه كأنه عدى عادى يبقى فيه حاجة  
غلط ... اه معظمنا كان بيتريق على الاستاذ فلان الفلاني  
ومعظمنا كنا بنضحك عليه ونحاول نعرفه اننا بنضحك  
عليه واننا مش خايفين منه .. لكن دلوقتي بعد ما عدت  
سنين لازم نبعتله اعتذار مش شرط ابدا يشوفه لكن على  
الأقل يبقى جوانا وأكيد هيوصله .. مين عارف ؟

لو مصدق فعلا انك ممكن تعتذر جواك بقلبك او  
بعقلك او بروحك لحد عارف انك غلطت فيه لكن للأسف  
مش هتعرف تلاقيه او تشوفه إعتذر .. ممكن كمان تشكر  
حد بعيد عنك بنفس الطريقة او على الاقل تفتكر الحاجة  
الكويسة اللي اثر بيها فيك ومش ممكن تنساها يعني مثلا  
في حد حكالي عن مدرس الموسيقى اللي علمه يعزف على  
(الماندولين ) وكان بيسييه يروح بيها كل يوم عشان يتدرب في  
البيت مع انها على عهدته .. والثاني اللي حكالي عن مدرسة  
الرسم اللي لما لاقته بيرسم كويس ومتفوق في الدراسة  
جابتله علبة الوان غالية عشان يرسم ويلون براحته ..

والمدرس اللى كان مصاحبنا وكان بيدي لصاحبنا اللى مش معاهم فلوس درس ببلاش . ومدرس الدين اللى مكناش بنخاف منه وكنا نسأله على كل الإسئلة اللى محيرانا ومش لاقين لها اجابات وخافين نسألها لحد احسن نتعاقب ويتقال علينا كفرة .. أكيد فيه حاجات كتير عند كل واحد فينا اكر بكتير من اللى اتحتلى .. سيب الكتاب لحظة ... اسرح بخيالك وافتكر .

في البوم المدرسة صورة واحنا واقفين قدام مدرسة البنات مستنيين اى واحدة تبص علينا من شبك الفصل وتبتسم .. كل الشباب متشيكين وواقفين اللى فارد عضلاته اللى مش موجودة واللى مصدر ابتسامة مش واسعة قوى عشان المشاكل اللى في سنانه واللى عامل تنك ومستنى البنات تيجى تعاكسه .. وزى عروض الازياء البنت هتنزل وهتختار ويفوز من وسط كل الواقفين واحد أو اتنين غالبا بيقوا الأشجع والأجراً .. والباقي يرضى غرورة بإنه يعاكس برخامة ويحاول يضايق البنات اللى ماختارتهوش . وكان فيه نوع تانى اللى هما الرومانسيين ودول كانوا يبصوا لبعض كتير .. نظرات من بعيد لبعيد .. تلاقى العين راسمة شوية حنية وابتسامة خفيفة وكل يوم شوية نظرات من دى .. أول يوم ثانيتين وبعدين تطول النظرة شوية فتبقى نص دقيقة ويستمروا على كدة .. شهر شهرين وبعدين بيتدى اللقاء الاول اللى غالبا بيبقى كله كسوف وخجل من الطرفين ويرضه في اللقاء ده يفضلوا طول الوقت

باصين لبعض !!! ... المشكلة بقى كانت بتبقى لما نخرج مع البنات هنصرف عليهم منين ؟ .. إحساس الرجولة كان بيبقى واخدنا .. هنتمشى .. مش شرط نروح في حته وهنقول ان مفيش احسن من المشى و هناك كشرى والحجة هتبقى انى بحب الكشرى اكثر من اى حاجة .. بس فلوس الكشرى هنجيبها منين ؟ لو لازم نروح في حته ممكن نروح جنية الحيونات التذكرة هناك بربع جنيه بس لو حبت تأكل الزرافة هعمل ايه ؟ وتبقى مصيبة لو روحنا سينما التذكرة في سينما كايرو اللى هى اقل حاجة ب ٨ جنية .. واحنا اتين بيقى ١٦ و٢جنية بقشيش على الشباك عشان الست اللى قاعدة وحاطة مكياج كثير مرعب دى بيقى كدة ١٨ واكيد الراجل اللى هيدخلنى بالكشاف هياخد منى ٢ جنية بعد مايقوللى ( كل سنة وانت طيب ) بيقى كدة عشرين .. ده غير المواصلات ..والحقيقة برضة انى لازم أروح انا وهى سينما . طب الفلوس دى هجيبها منين .. وهو المصروف اصلا قد ايه ؟

واحنا صغيرين في ابتدائى لما كنا ناخذ النص جنية ( متوسط الدخل الرسمى للتلاميذ ) كان الخيار بيقى ازاوة حاجة ساقعة وخلص على كدة أو نختار نجيب حاجتين بدل حاجة واحدة فمثلا نختار نجيب باكو شمعدان وكيس كاراتيه أو شيبسى .. او سندوتشين فول وطعمية للى مكانوش بياخدوا معاهم سندويتشات من البيت .. المصروف كان بيكفى لكن مع مرور الوقت والتقدم في المراحل الدراسية

الوضع يبدأ يتغير .. احنا بنكبر واحتياجتنا بتكبر  
والمصروف مش بيزيد الحاجة الساقعة غليت والشيبسى  
غلى والمصروف هو هو وحتى لو زاد الزيادة صعب انها  
تستوعب حجم الاحتياجات .. ولما بنكبر أكثر الإحتياجات  
بتكثر تانى برفانات أو على الاقل مزيل لريحة العرق ..  
جيل أو كريم يخلى الشعر يلمع .. رصيد عشان نعرف  
نبعت ميسدات ويارب محدش يفتح علينا دى الدقيقة  
ب٧٥ قرش او مثلا الفلوس اللى هناجر بيها الأرض اللى  
هنلعب فيها كورة بالليل أو بالنهار لما نزوغ من المدرسة  
.. طب والعمل؟؟ مفيش غير اننا نتصرف .. وبتصرف ..  
ونصرف من مصاريف الدروس اللى بناخذها من اهلينا .  
( ومن هنا نقدر نفهم سيكولوجية الموظف اللى يفتح  
الدرج أو امين الشرطة اللى بتطبقه العشرين جنيه جوة  
الرخص المنتهية .. او امين المخازن اللى يتصرف فى  
البضاعة ويبيعها لحسابه ويرجع مكانها خردة او مستعمل )  
والكارثة لو اتكشفنا .. وفى الغالب كنا بنتكشف .. لكن اعرف  
واحد صاحبى مانكشفش والحكاية بتقول انه لما عرف  
ان المدرس هيتصل بأبوه ويقول ان ابنك بقاله شهرين  
محضرش الدرس وابو صاحبنا ده كان عصبي حبتين ومتهور  
٣ حبات وايده جامدة عشرين حبة .. سهر صاحبى طول  
الليل يصلى ويدعى ربنا انه ينقذه بأى شكل من الكارثة  
اللى هتحصل والعلاقة المتوقعة اللى مش هيقدر يتحملها  
وفعلا ع فجر كان يبصرخ من الألم والوجع . اصل ربنا

استجاب وجاتلة الزايدة في نفس اليوم . ( ومن هنا برضه  
نقدر نفهم ازاي امين المخازن لما يعرف ان فيه لجنة  
جرد جاياله بيحرق المخزن باللى فيه )

— الألبوم الرابع .. جواه صور متفرقة .. صورة من كل  
يوم .. وحكاية لكل صورة . كنا قاعدين ع القهوة متجمعين  
وفتحنا الألبوم الرابع ده وحكيانا وضحكنا وصوتنا علي ع  
الأخر لحد مالنايمين اشتكوا وطرودونا من ع القهوة .  
واليكم ماجاء على السنتنا في تلك الجلسة .

— يوم حصة الأحياء اللي المفروض بيتشرح فيها ( إزاي  
احنا بنيجي الدنيا ) المدرس كان يبقي يا إما مكسوف أو  
عامل غضبان ومكشر عشان محدش يهزر والحصة تبوظ  
و تتقلب مراجيح وكانت كدة كدة بتتقلب مراجيح .. واه  
لو المدرسة مشتركة كنت تلاقى الولاد متشيكين ومسرحين  
شعرهم والبنات تقعد مكسوفة والضحكة تخرج منهم  
كإنها عطسة من كتر مالبننت كانت بتحاول تكتمها .  
والحصة دي تقريبا كانت بتتلغى في نصها او في أولها .. كدة  
كدة مكاتتش بتكمل .

— في حصة الألعاب كنا ننزل كلنا وجايين تيشيرتات  
خضرة زى ما مدرس الالعاب قالنا وكان دايمنا عندنا امل  
اننا هنلعب لكن مكانش بيلعب غير عشرة بس .. أحرف  
إثنين يختاروا قصاد بعض .. كل واحد فيهم يختار خمسة  
يلعبوا معاه واحنا نركن على جنب ونقضى الحصة كلها

بنتفرج عليهم . بس بعد وقت انا قررت اني لازم العب  
معاهم .. قولتلهم انا حارس مرمى وعشان هما لاعبة  
جامدين فكانوا بيتضايقوا لما يبجي الدور على واحد فيهم  
عشان يقف حارس مرمى فبدأوا يوقفوني جون .. وبالتدريج  
إتعلمت .. بس ماكنتش اعرف اترمي غير ناحية الشمال  
... فكنت اقف في اليمين مش في النص عشان لو اتشاطت  
الكورة في اليمين تيجي في جسمي ولو اتشاطت في الشمال  
اترمي عليها براحتي .

— أول مرة أركب عجل في حياتي لاقيت نفسي بسوق  
العجلة عادي وطلعت جرى بيها ومن كتر فرحتي بقيت  
ازود السرعة كل شوية .. بس كانت المشكلة اني مكنتش  
عارف اوقفها ازاي .. وبرضه مكنتش عارف اتفادي الناس  
اللى ماشية في الشارع .. قعدت اصوت في الناس عشان  
يوسعوا .. ومتكتمت غير لما العجلة رشقت في ظهر واحد  
من اللى ماشيين .. يومها الراجل ده اداني حته علقه ..



بقي يرفعني من الأرض  
وهو شايلني من وداني ويسبني  
وقبل ما لمس الأرض  
يديني بالنص عشان  
اقع على الأرض ويكرر

تاني لحد ماوداني بقت عاملة زى ودان بوجى ولحد دلوقتي  
مارجعتش زى ماكانت .

— عمرى ماهنسى ستي عيشة الله يرحمها .. كانت بتحبني  
اوى .. كانت تجمعني انا واخواتي قبل العيد عشان نغرز  
الكوباية في العجين فتطلع الكحكة مدورة .. وكانت تعمل  
لكل واحد فينا كحكة على شكل عروسة .. وكانت تديني  
فلوس من ورا امي وابوية عشان اجيب اللي انا ايازه ..  
وكنت بالليل بنام جنبها وتحضني جامد .. كانت دايمًا  
تقوللي انها هترقص في فرحي بس كانت بتتعصب بسرعة  
وانا كنت ساعات بفرح لما بشوفها متعصبة وكنت بتعمد  
اخليها تترفز .. ( عنيه شوية وهو بيحكى لمعت فيها  
دموع)

— عشت فترة الطفولة كلها فاهم انا جينا الدنيا  
بسبب بوسة .. كنا دايمًا نشوفهم في الافلام بيخلفوا  
بعد مايبوسوا بعض وكنت استغرب لما ابوية يبوس  
أختي وعادي مايحصلهاش حاجة وبعدين ربطت الموضوع  
بان قبل البوسة لازم يبجي الماذون .. لما كبرت وفهمت  
اتخضيت وضحكت على خيبتى وبقيت كل يوم اول مايناموا  
احاول اشفر التليفزيون عشان يلقط من الدش الأوروبي  
الى جايينة الجيران وكنت اقعد اتفرج ساعة مستنى  
اللقطه اللي هتيجى . وف مرة اشتركت انا وواحد صاحبي  
واشترينا صورة قليلة الادب واتخانقنا انا وهو مين الى  
هيخيبها عنده .. وانا اللي كسبت .. خدت الصورة وشيلتها

تحت السجادة تانى يوم صحيت لاقيت امى بتمسح الشقة وشايلة كل سجايد البيت .. كنت مرعوب احسن تكون شافت الصورة .. وفضلت مراقبها طول اليوم وهموت واعرف هى شافتها والا لآ .. بس مقدرتش افهم .. امى كانت بتتعامل عادى واول ماغفلت عن مراقبتها لحظة لقيت الشبشب الأحمر نازل بيمطر فوق دماغى .

— كنت فاهم وانا صغير أن اخر العالم هو المدرسة .. والدنيا كلها هى المسافة بين بيتى والمدرسة . ولما كانوا بيكلمونى عن ربنا كنت حاسس انه خلق الكون ده كله عشانى انا .. ومكنتش مقتنع انى ممكن اموت .. لما بدات اتفرج على الأفلام اتزرع يقين جواية ان الحياة اللي انا فيها عبارة عن فيلم طويل اوى .. وانا بطل الفيلم ده وان الناس دى كلها ممثلين . ابوية وامى واصحابى دول اللي واخدين ادوار كبيرة زى كدة عبد السلام النابلسى واسماعيل يس لما يطلعوا مع كمال الشناوى فى افلام زمان ... والناس اللي ماشية فى الشارع دول هما الكومبارسات . البقال عشان بيتكلم معايا يبقى كومبارس متكلم واللى ماييتكلموش معايا دول الكومبارسات الصامتة .. وإن فى آخر الفيلم السما هاتفتح وكل الشخصيات اللي قابلتها فى حياتى هتظهرلى .. والكل هيصقلى جامد حتى ربنا .. اللي أكيد هياخذنى من ايدى ويقربنى منه ويحضىنى ... لما كبرت اكثر عرفت انى لأ عادى هموت زى بقيت الناس .. وفى اليوم ده زعلت اوى .

— اول مرة عقلى يشتغل وابدا افكر فى الوجود .. كان عندى سؤال .. ابوية وامى جم الدنيا منين ؟ .. تمام من جدى وجدتى .. طب جدى وجدتى جم الدنيا ازاي .. من ابوهم وامهم .. طب البداية فين ؟ ... ابوية قاللى ان اول اتنين خلفوا الناس دى كلها كانوا ادم وحواء ... طب مين اللى خلفوا ادم وحواء .. مكنتش قادر أخلط بين ربنا اللى خلق الدنيا وبين خلق ادم وحواء كنت مصمم ان لازم يكون ليهم اب وام .. وحتى لو كانوا قالولى ان ابوهم مثلا فلان وان امهم فلانة .. برضه كنت هسأل طب مين ابو وام فلان وفلانة دول !!! .. وبعدين تمام هاودتهم بس سالت سؤال تانى بما إن ربنا هو اللى خلق ادم وحواء .. طب ربنا بقى جه منين ؟

— وانا فى اولى اعدادى كنت فى يوم مزوغ من المدرسة وكنت بلعب فى محل الفيديو جيم اللى جنب المدرسة .. شوية ولاقيت واحد بيضربنى على قفايا وبيقوللى يلا يله .. بصيئله عشان اتخانق معاه لاقيته ضخم وشنبه قدامه مترين قاللى اطلع برة ياروح امك . مكنتش فاهم بس طلعت . لاقيت عريية ميكروباص مستينانى اول مادخلتها لاقيت العريية مليانة عيال قدى . ولاقيت جنبى واحد صاحبى فى المدرسة حكاى انهم دخلوا جابوه من سينما الزتون اللى بتعرض فيلمين واحد عربى والتانى تركى وفهمت . كان البوليس بيلم كل العيال الهريانيين من المدارس .. وقاموا طالعين بينا ع القسم . قعدونا قاعدة الحبسجية

في الطريقة بتاعة القسم وانا كنت صغير كنت مرعوب وكل شوية الاقي عساكر داخلين وماسكين ناس شكلهم مرعب اللي وشه غرقان دم واللى وشه متشرط بالطول والعرض المهم عدى واحد كدة على كتفه ٣ نجوم وبصلنا جامد وسأل الصول

الظابط : مين دول ؟

الصول : دول العيال المزوغين من المدارس

الظابط : ومقعدهم هنا ليه ؟ طلعههم ع المكتب فوق

انا كنت هموت . مكتب ايه ؟ .. قعدت افكر في مستقبلي اللي راح .. وبدأت افكر منظر السجن اللي كنت بشوفه في الافلام ومش عارف هعمل ايه مع الكبير اللي هقابله في السجن اللي دايم كان بيبقى تخين وشنبه عريض ودايم بطل الفيلم كان بيضريه .. بس انا مش زى بطل الفيلم ومش عارف هعمل ايه ؟ ... المهم جرونا على المكتب فوق .. وفضلنا مستنيين شوية واتفتح الباب .. الصول ماسك تلميذ هريان من قفاه ويحدفه علينا وايده عمالة تطبل على قفاه .. والواد ياعيني وشه وارم من كل حته

الصول : خش يابن ..... استنى هنا مع ولاد

الصول ..... دول

وكل شوية يتفتح الباب ويخش الصول ويحدف الفريسة  
الغلبان علينا بعد ما يدب فيها على قد ما يقدر ... شوية  
ودخل ظابط تاني على كتفه نسر ونده عالصول

الظابط : مين دول ؟

الصول : دول ياباشا العيال اللي مزوغين من المدرسة

الظابط : طب ومقعدهم هنا ليه ماتوديهم التلاجة

يانهار اسود .. هيه فيها تلاجة ؟ ... طب والتلاجة دي  
شكلها عامل ازاي ؟ وفجأة اتفتح باب انا كنت فاكره باب  
حمام او حاجة كدة وقاموا زقينا كلنا مدخلينا التلاجة ..  
والتلاجة دي كانت اوضه ضيقة وشبه ضلمه .. اول مادخلنا  
لاقينا اتنين كبار شكلهم مايتوصفش قاعدين وكل واحد  
فيهم فيهم ماسك السيارة وقاعد قاعدة الحبسجية  
بصولنا وضحكوا .. وانا مقدرتش امسك نفسي قعدت  
أعيط .. شوية ودخلوا علينا العساكر وفي ايديهم العصيان  
وبدات الملحمة .. الضرب كان عشوائى .. زى

بالظبط حفلة الاستقبال اللي كانوا  
بيستقبلوا فيها المعتقلين في فيلم  
البرئ . كنت حاسس اني خلاص  
حياتي انتهت واني هعيش هنا في  
التلاجة بقيت عمرى واهلى مش  
هيعرفوا انا فين .. كنت عايز اصرخ  
واقولهم .. ( احنا بتوع الاتوبيس ياخوانا)



وبعد العلكة اللى عمرى ماهنساها عملولنا محاضر  
وخرجونا ع الساعة واحدة الظهر وابوية وامى لحد دلوقتي  
مايعرفوش اللى حصل ده ... الغريب انى بعد كام يوم  
زوغت عادى بس روحت محل فيديو جيم بعيد ومتدارى  
شوية . وصاحبى راح عادى جدا السينما بس بدل ما يروح  
سينما الزيتون بقى يروح سينما شبرا بالاس . وماتمسكناش  
تانى وكملنا .

— انا بقى مانساش اول حلاقة دقن وشنب .. كان الشنب  
الاخضر المعفن ده يفضل سنتين على وشى وكل ماجى  
احلقه ابوية يقوللى لو حلقته هتتقرف طول حياتك ..  
وفى يوم ماستحملتش حلقته ونزلت قابلت صحابى كانوا  
حاسين انى غريب عنهم وانا كنت حاسس إن انا مش انا ..  
وبصراحة زهقت طول حياتى .

— اول كدبة كدبتها كانت لما الفلوس وقعت منى ..  
طلعت وقعدت احور على امى وأقولها العيال اتلموا عليه  
وضربونى وسرقوا الفلوس .. بس انا مش هسيبهم .. وهى  
اللى ماسبتنيش فى اليوم ده .

— اجمل حاجة فى العيد هو اللبس الجديد اللى كان  
بيجىلى وأساء حاجة إن عمر بابا ماجبلى اللبس اللى انا  
عايزه .. ويانهار ع الصورة اللى كنا لازم نتصورها باللبس  
الجديد ده .. ابوك يجيبلك شعرك على جنب ويخرجلك  
حته من الميدالية برة البنطلون ... ويا إما تمسك الجيتار

او تسند على الشجرة البلاستيك اللى وراك ... او المصوراتى  
يوقفك حاطت ايدك فى جيبك او فى وسطك ووراك ورد  
صناعى مترب .... يا ساتر ( هموت واقطع الصورة دى ) .

— كنت بحس ان صلاة الجمعة بتاخذ نص اليوم بتاع  
الاجازة .. يعنى هو ده اليوم الوحيد اللى المفروض مفيش  
فيه حاجة ورايا .. لازم يعنى صلاة الجمعة تبقى يوم  
الجمعة ؟ وبعدين برضه بننام فيه بدرى عشان تانى يوم  
مدارس .. انا كنت بحب الخميس اكر .

السهرة فى اليوم ده طالت قولنا حاجات كتير منها  
حاجات ماينفعش تتكتب .. ولولا أنهم طردونا من القهوة  
لما صوت ضحكنا قلق الدنيا كنا كملنا كلام .. اتكلمنا عن  
زلزال ٩٢ والمدارس اللى اتهدت ورحلونا على مدارس تانية



ومنظر البيوت اللى وقعت والناس اللى ماتت  
ومصطلح مساكن الايواء والاشاعات  
والحكايات عن الناس اللى نطت من  
البلكونات عريانيين اول ما حصل الزلزال

وموسيقى ( عود ) بتاعة احمد  
الحجار اللى كنا بنخاف منها  
وكانت دايمًا بتبقى خلفية لمشاهد  
الموت .. وبعد كدة على القناة

الثالثة لما كانوا بيحيوها فى التوبة عن المفقودين ..  
اتكلمنا عن الحقنة اللى أثرها ما يبروحش ومعلمة فى دراع كل  
واحد فينا .. والتعويرة الاولى اللى لسه وجعها ماراحش

لحد دلوقتي واللى غالبا كانت بتبقى جنب الحاجب عند  
العضمة اللي فوق العين . والمشط الفلاية اللي نحر في  
روسنا واحنا صغيرين .. سور المدرسة العالى اللي كان  
مايهمناش طوله وننط من فوقه .. يحطوا فوقه الشوك



والازاز وبرضه مايهمناش وننط من فوقه .. افكرنا

بوجى وطمطم واختلفنا بوجى كان كلب والا قرد

والا انسان والا ايه بالظبط . افكرنا ازاي واحنا

صغيرين اوى كنا بنجرى اول جرس الفسحة

مايضر ب .. وازاي كنا بنطير اول ما جرس الحصه

الأخيرة يعلن للجميع ان اليوم خلص وان باب

المدرسة هيدينا البرأة عشان نطير ببرأة ونخرج

للشارع اللي كان في عيننا كبير اوى .. كانت الدنيا

جوانا مخلوقة بس عشان نلعب .. والشمس

والقمر بيدوروا حوالينا .



الشوارع ضاقت لما كبرنا ... اللويته طعمها اتغير...

الشمس من كتر اللف والتدوير هلكت هدمنا بالعرق ...

والقمر طول الشهر ناقص ويوم مايبكتمل بيخنقه السحاب

... سور المدرسة ساب المدرسة وقعدنا وحاوط حياتنا ..

رشق ازازه في كل مكان وبدا يهدد . مفيش هروب مفيش

زوغان . وعلى امل عايشين يمكن في يوم نركب الجناحات

ونعدى السور طاييرين زي ما كنا بنطير زمان ... بس يارب

الجناحات تكون كبيرة ويارب واحنا بنعدى السور نلاق

برائتنا اللي وقعت مننا .. من كام سنة .

## الإمتحان :

أكمل العبارات التالية وضع كلمة ملائمة النقط .

1 ( أول هدية افكر انها جاتلى كانت .....  
كانت بمناسبة ..... والى جابهالى كان .....

2 ( أول مرة دخلت سينما كان فيلم ..... وكنت داخله  
مع ..... لكن اكثر فيلم حبيته فى حياى هو  
..... الفيلم اللى عيطت فيه كان ..... واكثر  
فيلم ضحكنى كان ..... لكن بقى اكثر فيلم أجرناه  
من محل الفيديو كان فيلم .....

3 ( اكثر مدرس كنت بحبه أستاذ ..... روحت من فترة  
زورت مدرستى وعرفت ان استاذ ..... مات واستاذ  
..... طلع معاش .

4 ( اول حد مات كنت اعرفه كان ..... كنت ساعتها  
عندى ..... سنين

5 ( العلقه اللى عمرى ماهنساها كانت من ..... ومش  
هنساها عشان .....

6 ( اول عدة تليفون شيلتها كانت ..... واول رقم  
شيلته كان .....

7 ( صاحبي اللى ماشوفتهوش بقالى سنين وهموت واشوفه اسمه ..... واللى صحيح ماتت بس سابت اثر فى حياتى هى ..... ونفسى اوى تيجيلى فى الحلم

8 ( اول حلم حلمته انى اكون ..... وبعدين اتمنيت انى ابقى ..... لكن بعد ما السنين عدت اكتشفت ان حلمى الحقيقى هو انى اكون .....

9 ( أول مصروف اخدته كان ..... وبعدين زاد بقى ..... كنت بجيب بيه ..... و .....


10 ( اجمل صورة اتصورتها وشكلى فيها حلو هى ..... وكان شكلى فيها عامل ..... لكن اكثر صورة بحبها هى صورتى وانا ..... عشان كنت فيها ..... وكان معايا فيها ..... الصورة اللى مش لاقيتها عشان ..... خدها ونفسى ارجعها او الاقيها تانى هى صورتى وانا .....

11 ( فى يوم من الايام انا واثق انى هكون ..... ولما أعجز هيبقى شكلى ..... وشعرى هيبقى كله ..... هتصور صورة انا و ..... و ..... وهتبقى اجمل صورة اتصورتها فى حياتى همسكها وامسك صورتى وانا لسه ..... وهابتسم وانا راضى جدا عن حياتى وساعتها هبقى جاهز .....

## على المسرح ....

تضاء بؤرة صغيرة بيضاء اللون في منتصف المسرح  
بينما يشكل ديكور المشهد ( دكة ) صغيرة بالكاد تكفى  
لان يجلس عليها هو وهى ... ( سمر وخليفة )





# الصوره الثالثه

## اللفظه الأولى

بينما هو وهى كل منهما يجلس معطيا ظهره للأخر فى  
ابتسامه ممثله بالخجل ، يلتفتان ويضحكان ويبدوا أن روح  
الامل والإنطلاق والبهجة تحيط بهما .

سمر: ( فى سعادة ) انت خلاص اهو يا حبيبي اتخرجت  
من الجامعة .

خليفة : ( فى سعادة ) الحمد لله يا حبيبتى وانا خلاص  
جبتك الشبكة .

سمر : ( بمنتهى الأمل ) طب والشقة ؟

خليفة : ( بمنتهى الأمل ) انا مش جيت الشبكة ؟

سمر : اه

خليفة : ( في ثقة وأمل لا حدود لهما وأيضا في ابتسامه )  
ان شاء الله بكرة هاجيب الشقة .  
( تنطفئ بؤرة الإضاءة للحظة ثم تعود لتضاء من  
جديد )

## اللفظ الثاني

( بعد سنه ... لا يزال الأمل باقيا )  
خليفة : بخ ... ( يضحكان )  
سمر : ها يا حبيبي عملت ايه في الشغل ؟  
خليفة : الحمد لله يا حبيبي اشتغلت في وظيفة جميلة  
جدا  
سمر : ( ولا يزال هناك امل ) طب والشقة ؟  
خليفة : ( في فرحة وانطلاق ) انا مش اشتغلت ؟  
سمر : اه  
خليفة : ( واثقا مبتسما ) ان شاء الله بكرة هاجيب الشقة  
( تنطفئ بؤرة الإضاءة للحظة ثم تعود لتضاء من  
جديد )

## اللفظة الثالثة

( بعد كام سنة .... الأمل ؟ )

سمر : ها يا حبيبي حجت قاعة الفرحة ؟

خليفة : طبعا .. حجت قاعة محندة كدة على قدنا

سمر : ( بلا أى أمل ) طب والشقة ؟

خليفة : ( مبتسما ) انا مش حجت القاعة ؟

سمر : اه

خليفة : ( مبتسما ) ان شاء الله بكرة هاجيب الشقة ...

( تنطفئ بؤرة الإضاءة للحظة ثم تعود لتضاء من

جديد )

## اللفظة الرابعة

( بعد كام سنة ويبدو انهما قد تزوجا .. سمر تحمل

مولود على يديها .. كما يبدو على وجهها ملامح الغيظ

والكبت والغضب )

سمر : عايزين نطعم الواد يابو محمد

خليفة : نروح بيه بكرة المستشفى يتطعم

سمر : ( فى زهق ) طب والشقة ؟

خليفة : انا مش جبتلك محمد ؟

سمر : اه

خليفة : ( مبتسما ) ان شاء الله بكرة نجيب الشقة

( تنطفئ بؤرة الإضاءة للحظة ثم تعود لتضاء من

جديد )

## اللقطة الخامسة

( بعد مرور سنوات عديدة ... سمر تشعر بالتعب وقد

تبدلت ملامح الغضب بملامح اخرى منهكة ومتعبة )

سمر : انا تعبانة اوى يا ابو محمد

خليفة : نروح المستشفى بالليل

سمر : ( فى يأس ) طب والشقة ؟

خليفة : انا مش جبتلك الضغط والسكر ؟

سمر : اه

خليفة : ( مبتسما ) ان شاء الله بكرة نجيب الشقة

( تنطفئ بؤرة الإضاءة للحظة ثم تعود لتضاء من

جديد )

## اللفظة الاخيرة


بعد مرور كل السنوات

( ابو محمد يجلس وحيدا بينما سمر الى جواره تحلق  
بيديها وكأن روحها تحلق في السماء )

خليفة : الست ماتت ....اكيد نفسك تسأليني عن  
الشقة ..

( روح سمر تجيبه بما يعنى ( اه ) )


خليفة : انا مش موتك ؟ ... ( مبتسما ) ان شاء الله بكرة  
هاجيب الشقة .



المسرح بظلم

كان عايز يدخل هندسة ..  
رسم حياته كلها انه داخل هندسة





# الصورة الرابعة

( هـ )

ذاكر كثير خد دروس في كل المواد وبصراحة اهله  
ماخلوش عليه . كل اللي قدروا يعملوه عملوه قللوا مصروف  
البيت ودخلوا جمعيات مابتخلصش . قبل الإمتحانات كان  
كل شوية يخرج من اوضته يزعق

– مش عارف اذاكر .. صوت التلفزيون عالي

شالوا التلفزيون وحطوه فوق الدولاب .. ماهمهمش..  
ايه يعنى شهرين يقعدوا من غير تلفزيون المهم الواد  
ينجح ويخش الكلية اللي عايزها .. دفنوا الكاسيت تحت  
السرير .. وسابوا اخوه الصغير يلعب في الشارع عادي  
عشان مايقلقهوش .. كل الظروف اتھیأتلك يا بطل .. ياالله  
بقي ماتكسفناش ... كان يمكن متضايق شوية لانه ساكن

في المطرية .. يعنى هيروح هندسة عين شمس . هو كان نفسه في جامعة القاهرة اكثر بيقلوا فيها اقسام كتير وهيقدر يختار براحته .

يوم امتحان الفزيا .. كان يوم اسود عمره ماهينساه.. اول منازل الشارع قميصه اتنتش من مسمار عجيب وحيد فريد مدقوق في شجرة ! .. وعلى طول فهم .. بس كذب نفسه ومصدقهاش غير لما اتحطت قدامة ورقة الإمتحان.. ايده اتشلت بعد ماقرأ الإسئلة وعرف انه مش هيعرف يحل.. القلم اترعش في ايده .. شاف حلمه بيضيع بالتدريج.. مش قادر يستوعب ان حلمه في لحظة اختفى . سنين طويلة عايش جوه الحلم ده . ساكن جواه. معقول في لحظة ورقة امتحان تطرده . قاوم ومسك القلم . نور مستقبله اللي كان منورله الطريق بيتطفى في لجنة الإمتحان.. لأ .. لازم مايتطفيش .. لازم يحل .. استاذ فلان في حصة المراجعة الاخيرة قالنا نركز على حاجات تانية خالص وأكد أن الحاجات دي هي اللي هتيجى في الإمتحان. الحاجات دي فين ؟ .. ازاي مجاتش ؟! .. ده الفلوس اللي اخدها ابوية طبق في الشغل عشر ايام عشان يجمعها . فلوس لسه مابردتش .. لازم احل .

— لكن احل ازاي ؟ ... دي مادة تانية معرفش عنها حاجة؟

المراقب الأولانى شكله طيب .. لكن التانى بيمر بين الصفوف .. ومركز معانا اوى .. بس عند امه .. لازم اغش

– طب هعمل ايه مامفيش قدامى غير كدة ؟

وبدا يبسبس للى جنبه على اليمين .. هو اللى شغال حل والقلم فى اديه ماوقفش لحظة .. لكن اللى جنبه على اليمين عمل عبيط .

– طب وبعدين ؟

بسبس مرة تانية للى على يمينه .. ولتانى مرة اللى على يمينه يعمل عبيط .. شتمه فى سره .. بسبس للى على شماله .. المراقب سمع البسبسة وزعق

– الصوت ياشباب

العرق عَرَق قميصه .. عينه لمعت بالدموع .. اللى وراه كان شهم حس بأزمة صاحبه خلص البرشامة اللى معاه ونقل منها الحل كله ومد ايده من تحت الدكة وبعتهاله .

صاحبنا عمره ماغش .. مش خبير .. بس هيعمل ايه الحل فى ايده ؟ .. اه مكتوب صغير بس فى ايده .. ( هندسه هتروح ) دارى البرشامة تحت كوع ايده الشمال .. بص على المراقب التانى حس انه مش شايف والأولانى شكله طيب ومنفض . وبدا ينقل من البرشامة .. وللأمانة افتكر حل السؤال قرر يرمى البرشامة .. فرماها فى ايد المراقب وحصلت المشكلة ودخل تجارة .

لما يفتكر بعد سنين طويلة اليوم ده بيضحك ..  
الى قفشة كان المراقب الى شكله طيب والمراقب التانى  
هو الى حل المشكلة ومارضيش يدبس البرشامة فى ورقة  
الإمتحان كل الى عمله انهم طردوه بعد نص الوقت .

لما يفتكر بعد سنين طويلة اليوم ده بيضحك ..  
مكاتش هتفرق كثير تجارة .. هندسة .. حقوق .. كله زى  
بعضه .. كلهم يوم الخميس بيتجمعوا ع القهوة يشربوا  
الشاي المتين ويلعبوا الطاولة المتينة . وبعد الساعة  
واحدة يفضضوا وواحد منهم يحكى ويكى . لازم كل  
خميس واحد منهم ييكي

لما يفتكر بعد سنين طويلة اليوم ده بيضحك .. كانت  
ايام جميلة .. لكن احلى ايام .. ايام الجامعة .

اليوم الأول فى الجامعة .. بداية جديدة للحلم الى  
اتبدل مع التنسيق .. او الحلم الى ماتبدلش .. المستقبل  
من هنا بيتدى .. اللبس كله جديد وزاهى ومنور والشعر  
كله بيلمع بالجيل أو بالكريم ( هيركود ) الكيس ابو نص  
جنيه .. والبناات متزوقين الوان هدومهم بمبى بمبى أو  
اصفر يبيرق أو أحمر رايق .. والتحجيات معظمها بينك ..  
تحس بإنه يوم العيد

يفتكر ... فى المدرج اول يوم إتجنن وخصوصا لما لقي  
البناات قاعدين لوحدهم فى اليمين وهو وكل شباب الدفعة  
متجمعين فى الشمال .. ايه المقلب ده ؟ ... طب واللى كنا

بنشوفه فى الافلام كان ايه ؟ كان كذب ؟ ... كل مشاهد الحب فى الجامعة والجروبات والشلة الكبيرة .. كل ده كان وهم ؟ ... ده اكر حاجة بنفكر فيها واحنا داخلين اول يوم الجامعة .. هنرتبط بمين ؟ وهتبقى حلوة والا لآ ؟ وقصة حبنا هتكملى والا مش هتكملى ؟ وهى كمان بتفكر طبعا .. هيحمينى والا لآ ؟ .. هيبقى طيب ؟ ... لآ مش هنرتبط غير وانا فى سنة رابعة ؟ .. لآ طبعا مش هخليه يمسك ايدى وطبعا يمسكها .. ( فىن بقى كل الكلام ده .. احنا فى الجامعة والا فى الجامع !! ) بس مع الأيام فهمم .. هو اول يوم بس .. تانى يوم الموضوع بيختلف وعلى اول الاسبوع التانى خلاص .. الافلام ماكدبتش علينا فى حاجة .

ياه .... ايام الجامعة الجميلة .. بيسرح شوية ويفتكر .. المدرج والأُسْر ... اتحاد الطلبة الى امن الدولة كان بيعينه .. كشكول المحاضرات الى الولاد بيركنوه بعد الدراسة بأسبوعين والبنات تملاه قلوب ورسم زخارف تنفع للمفارش .... الشجرة القديمة الى الاسطورة بتحكى عنها ان الى يقعد تحتها او يقرب منها بيعيد السنة واللى رغم كل قوانين الدجل والشعوذة ورغم ان كلنا بنرفض الكلام الفارغ والعبط ده وبنرفض طبعا الاسطورة الكدابة الى اخترعوها الطلبة الفاشلين الى قبلنا الا ان للحق اقول ان الى كان يقرب منها كان للاسف فعلا ( بيعيد السنة ) .. عند الحرم .. فى الكافتريا .. سندوتش البطاطس الصوابع ... شارع الكنيسة الى المسيحين كانوا بيتقابلوا

عنده ويتجمعوا.. وشارع الضباب ملجأً للعاشقين الولهانيين  
المغرمين .. حرس الجامعة والنقيب الحلو الجميل اللي  
البنات شايفاه توم كروز والشباب شايفينه توم وجيرى .  
يااااه ... أيام الجامعة الجميلة .. يسرح اكثر . عنيه  
بتلمع من الحنين وبتفتكر ... اول مظاهرة تعدى قدامه  
تهتف باسم القدس وفلسطين .. محمد الدرة .. الانتفاضة..  
شال فلطسين الابيض في اسود .. كان شایل الوانه كان رايح  
مدرسته .. كل الدفعة بتكتب اشعار .. الكلام في السياسة..  
السخرية من كل حاجة من اللي جاى واللى فات واللى  
عدى واللى بنعيشه .. السخرية من دكاترة الجامعة وشكل  
المدرج ومستوى التعليم .. الصوت العالى .. لازم نحارب ..  
قاطعوا البضائع الامريكية .. فتحى عبد الوهاب في صعيدى  
في الجامعة الامريكية .. الحلم العربى ( جايز ظلام الليل  
يبعدنا يوم انما يفضل شعاع النور واصل لابعد سما ..  
ده حلمنا .. طول عمرنا .. حلم يضمننا كلنا كلنا )

ياااااه ... أيام الجامعة الجميلة .. اللمعة اللي ف عنيه  
زادت لما الدموع قررت تطلع .. رنت اغانى شبابه في ودانة..  
جسمه قشعر وافتكر .. محمد فؤاد ( الحب الحقيقى )  
..منير وعمرو .. والشرايط .. الماستر بلا جنية والمضروب  
باتين جنيه ونص .. كان يجيب مضروب من واد كان ييفرش  
في العتبة .. عمرو دياب بس اللي كان يجيبه اصلى .. لسه  
فاكر يوم مافتح التلفزيون وسمع صوته في اخر كوبليه  
( يا أغلى حبيب ) نزل بسرعة جاب الشريط باتناشر جنيه



لكن سابتها .. اديها كانت محتاجة لحضن .. حسنت ان ف  
ايدة امان حسنت بوعد انه هيكمل معاها وهيحميها حسنت  
لما لمحت عينه للحظة بعينها المكسوفين ان في عينه حب  
كبير مش هينقص .. سابت اديها واديتها له هديه .. كل  
مايشوفوا بعض يمسكها.. هي اتعودت خلاص . اديها  
ملكه .. فيه بينهم شبه عقد انه ليها وانه مش هيسيبيها..  
بس بقالهم فترة كبيرة كل مايتقابلوا يمشوا بعيد عن  
بعض . بيخافوا يبصوا لبعض . بيخاف يمسك اديها وهي  
كمان بتحس ان اديه مبقتش دافيه بقى فيها شبه رعشه او  
شبه ضعف . ايدة غابت الشمس عنها فبردت وبقت فيها  
ريحة موت .

هو ماشى يفتكر .. شايلى شنطة مليانه فرش اسنان  
ورغم تقل الشنطة على ظهره هو مش حاسس ... هو  
بس يفتكر .

اول مرة يشوفها كان واقف يهزر مع شلته .. هي جت  
مع صاحبيتها اللي كانت جايه تسلم على واحد من صحابه.  
فضلت هي واقفه مستنيه صاحبته تخلص سلام .. هو  
كان بيهزر ، كان عمال يقول حاجات والشلة كلها تضحك ..  
هو مش فاكر كان بيقول ايه ساعتها بس اللي فاكره انها  
ضحكت .. كانت جميلة .. او هو شافها جميلة .. بدا يقول  
تاني حاجات تضحك .. يحكي حكايات ومواقف والكل يضحك  
.. كان مبسوط .. دايمًا كان رأييه ان من الحاجات السعيدة  
انك تضحك البنات . البنات ضحكها عالية . حقيقية .

ضحكة فعلا تتسمع لكن الولاد ضحكهم عادى ونادر اصلا  
لما يضحكوا . والبنت دى تحديددا كانت ضحكتها غريبة،  
فيها جرأة مش خيفة من الكلام المستخبي ، ضحكة مش  
مترابقة .. المهم هى مشيت بعد ماصاحبتها خلصت  
سلامات . واتجنن وبهدل نفسه ولامها .. ازاي مكلمتهاش ؟  
ازاي ماديتهاش رقمى ؟ وبعد يومين نسيها .. وبعد اسبوع  
شافها تانى .

هو ماشى بيفتكر .. ابتسامة غريبة مرسومة على وشه..  
ورغم ان الشمس شديدة انهاردة لكن هو مش حاسس..  
القميص غرقان عرق بس هو مش حاسس . هو بس  
بيفتكر .

اتعددت اللقاءات بينهم بس دايمدا كانت بتبقى وسط  
ناس كتير . كان يدوب يبحاول يسرق نظرة او يقول كلمة  
فلسفية جريئة ويشوف رد فعلها . كان حاسس ان فيه جواها  
حاجة . مستحيل ماتكونش حاسة ؟ والمشكلة انه عارف ان  
ده موسم ولو ملحقش ممكن حد تانى يخش دخلة جريئة  
ويخلص المواضيع .. وفعلا حصل والواد فلان عملها  
وسبقنى بس هى قالتله

– انت زى اخوية وانا مبفكرش فى الكلام ده دلوقتى .

طب بتفكر والا مبتفكرش ؟ انا ممكن اكلمها .. بس هى  
ممكن تخرجنى ؟ طب وبعدين هو انا اصلا حبيتها ؟ طب  
ازاي ؟ طب حتى لو كلمتها هقولها ايه ؟ عموما ... احنا

لازم نتقابل لوحدنا .. انا وهى وبس ... لكن ازاي ؟ ممكن اول ماتيجى الكلية . قبل مالشلة تتجمع .. استناها قدام المدرج .. لا مش هينفع .. دايمًا معاها صاحبتها بييجوا مع بعض ويروحوا مع بعض .. يبقى لازم صاحبتها ماتجيش معاها ... طب ازاي ؟ ... لازم يجرالها حاجة .. تتعب ؟ ( بس دى حاجة بتاعة ربنا ) .. واحد من صحابي يقولها عايزك في حوار وياخذها ويعد بعيد ؟ ( بس كدة صاحبي هيعرف وهتبقى فضيحة ) .. تروح تزور حد ؟ ( حد مين ) مفيش غير اني اكسرلها رجلها .

فعلا فكر يكسر لصاحبتها رجلها .. هيوقع حاجة ثقيلة عليها وقال يعنى مش قاصد .. لكن الغريب ان صاحبتها تاني يوم رجلها انكسرت فعلا وهى مروحة . واتقابلوا لأول مرة لوحدهم خطفها من قدام المدرج

هو : انا عايز انكلم معاكي

هى : طب بعد المحاضرة ماتخلص

هو : لا مش مهم المحاضرة .

هى حسست انه شارب .. مشيت معاها .. راحوا عند الكافيتريا وهناك سكت .. هى انكلمت حكيتله عن ابوها الطيب ازاي تعب عشان يعلمهم وعن اخوها الصغير اللى عامل عليها راجل .. وحكيتله ان ليها اخت اكبر منها .... هو كمان بدأ يحكى


— وانا صغیر اوی کنت بحلم ابقی طیار .. کنت اطلع فوق سطوح بیتنا واستنی الطیارات تعدی وافضل اشاورلها.. کنت مستنی یوم الطیار یطلع ایده من الطیارة ویشاورلی هو کمان .

( هی بتضحك اوی ... هو بیتجنن .. کان دایما ییحس لما هی بتضحك ان الدنیا بتقف .. بتستنی لحد ماالضحة تخلص خالص وترجع تتحرك من جدید )

بیکمل حکایتہ :-



من کتر ما کنت بحب الطیارات فی یوم اشتریت کتکوت .. کانوا بیتباعوا قدام المدرسة بریع جنیه الواحد .. کنت ناوی اریه واکبره لحد ما یکبر ویطلعله جناحات ویطیر واشوفه بیطیر ازای واحاول اقلده .. قعدوا یقولولی ان الکتکوت مش هیطیر .. مکتتش مصدقهم کنت حاسس انه بس لسه صغیر وجناحاته صغیره .. لکن اول ما هتکبر جناحاته هیطیر عادى وبعدها انا کمان هطیر معاه .. حیته اوی .. عشت معاه احلی عشر ایام فی حیاتی .. کل یوم اخده ونطلع فوق السطوح ونلعب مع بعض .. هو کمان حبنی علی فکرة .. کنت اول مارجع من المدرسة وافتح الباب یجرى علیه .



( وشها وهو بيحكى اترسمت عليه ملامح بنوته صغيرة ..  
عنيها نورت .. سندات خدها بأديها واندمجت جوه حكايته )  
هو بيكمل :

— فى يوم ١٢ اكتوبر سنة ١٩٩٢ .. كنت بعمل واجب  
المدرسة .. فجأة لاقيت البيت بيتهز .. مكنتش فاهم  
حاجة .. امى وجدتى بيصوتوا بصوت على وعمالين يقولوا  
البيت بيقع .. زلازال .. القيامة قامت .. امى دخلت خدتى ..  
شدتى من ايدى جامد ونزلت بيه الشارع .. كل الناس كانت  
فى الشارع .. كل الناس اتجمعت فى الشارع .. فضلوا كثير ..  
حكوا .. واتكلموا .. واتصالحو .. اللى قال ده غضب ربنا ..  
واللى قال القيامة قريت .. تخيلى انى دلوقتى وانا بكلمك  
سامع كلامهم وشايف الصور .. كنت فى رابعة ابتدائى .  
المهم فى اخر اليوم طلعتنا البيت .. واستغريت وافتكرت ..  
الكتكوت .. راح فىن .. ازاي مجريش عليه زى مايعمل كل  
مرة .. دورت عليه فى كل مكان فى البيت وانا بعيط .. قلبت  
الدنيا عليه .. وفى الاخر لاقيته .. تقريبا خاف هو كمان ..  
جرى عشان يستخبي ورا الكنبه .. الزلازال حرك الكنبه قفلت  
على رقبته .. مات .. مخنوق .

( فى اللحظة دى وهو بيحكيها . سكت فجأة ... بكى ...  
هى شافت فى عنيه الدموع .. صدقته .. قالتله كمل )  
— دفنته فوق السطوح وقعدت جنبه اعيط .. اقولك  
على حاجة غريبة واحساس جواية مش قادر اغيره .... مش

عارف ليه حاسس انه لو كان عاش كان هيطير .. وكنت  
هتعلم منه ازاي انا كمان ممكن اطير وكنت فعلا هطير .  
يمكن بعدها مات حلم الطيارجواية .. حاولت اصحيه  
اتعلمت ازاي اعمل طيارة وازاي اطيرها بس كل طيارة كنت  
بعملها كانت بتشبك في عامود نور أو في اريال تليفزيون .  
بعد كدة حلمت اني ادخل هندسة .

تاني يوم اتقابلوا وتالت يوم ورابع يوم وبقي معاد  
يومي الساعة عشرة الصبح يتقابلوا ويروحوا نفس المكان  
عند الكافتيريا .. يتكلموا عن المستقبل والماضي والحاضر .  
هى : اول ماكبرت شوية وبقيت بنت وكدة يعنى ....  
بابا مبقاش يحضنى ولا يبوسنى زى زمان مش عارفة ليه .  
ساعات كتير ببقى عايزاه يعمل كدة .

هو : اول مرة شريت سيجارة كنت في خامسة ابتدائي ..  
واحد صاحبي سرقها من علبة ابوة وندهللى انا وواحد كمان  
وقالنا تعالوا نشربها ... بعدنا جامد عن المنطقة ورحنا  
مكان بعيد عشان محدش يشوفنا وولعنا السيجارة .. اول  
نفس شربته نفخته .. صاحبي اتريق عليه .. قاللى يا عبيط  
لازم تاخده على صدرك عشان تحس بيه .. خدت النفس  
التاني على صدرى .. اتخضيت واترعبت .. حسيت ان فيه  
كتلة حديد نزلت على صدرى .. سحابة سودة كبيرة دخلت  
جواية كحيت جامد ودوخت و كنت هاقع من طولى لكن  
مسكونى وحلفت انى عمرى ماهشرب سجاير تاني .

( كان بيحكيها وفيه سيجارة في اديه ... بصيئله بتريقة  
وهو عمل عبيط وتوه الحوار )

هى : مكانش حب اوى يعنى .. هاقولك بس ماتزعلش..  
طب احلف انك مش هتزعل .. اول حد حبيته كان استاذ  
الانجليزى اللى كنت باخد معاه درس .. كان حلو قوى  
وشعره كان ناعم ويينزل على عينه كل شوية ... ( هو شوية  
بيزعل وهى بتلاحظ ) ايه ده لو هتزعل مش هكمل ... )  
بيتسم ) كنت استنى الحصه بتاعته طول الاسبوع وكنت  
ماذاكرش حاجة غير انجليزى عشان لو سأل في اى وقت  
ابقى انا اول واحدة اجاوبه ويشوفنى شاطرة قد ايه .. في  
يوم عملنا امتحان في الدرس .. حليت الاسئلة كلها بسرعة  
وكتبتله في اخر حته في ورقة الإجابة ( اى لاف يو ) ورسمت  
قلب طالع منه سهم وكتبت عليه اول حرف من اسمى  
واول حرف من اسمه .... ( بتبصله وبتسأله ) ... اكمل؟...  
( بيهز راسه بالموافقة ) استنيت انه ياخذ باله أو يبصلى..  
ولا كأنه هنا .. قبل الإمتحانات قررت انى اقوله وواجهه  
بحبى بس قولت اسأل صاحبتى اقولهاله ازاي .. حكيتها  
فضحكت عليه .. وقالتلى انها كمان كانت بتحبه بس  
نسيت الموضوع لما عرفت انه متجوز ومخلف وابنه في  
رابعة حقوق ( هو بيتفاجئ وهى كمان بتضحك قوى ..  
ضحكتها اللى بتقلب الدنيا .. وبتكمل حكيتها ) ايوة كان  
عنده ٥٦ سنة بس كنت بموت فيه ( بتضحك .. كل اللى

قاعدین عند الکافتیریا بیصوا علیها .. بس هیه مایهمهاش  
وعادی جدا .. هتکمل ضحك )

هو : کتیر بحس انی هموت صغیر .. وساعات اصحی  
من النوم مفزوع واحس ان الموت خلاص جای عشان  
یاخذنی .. اخرج جرى من الاوضة على البلكونة عشان لو  
قرب منی اصرخ بأعلى صوتی واصحی الناس اللى نایمة  
فی البیوت یمکن یبعده عنی .. دایما بحس ان الموت  
هیستفرد بیه وانا لوحدی

مع اول مشكلة بینهم .. بعدوا عن بعض یومین ..  
تعبوا واتجننوا ورجعوا تانی وعرفوا انهم بیحبوا بعض کل  
اللى كان فاضل انه یقولها بحبك .. وبعدها بكام یوم  
قالها .... بحبك

– ایه اللى حصل ؟ ایه اللى اتغیر ؟

هو ماشی بیسأل .. شایل على ضره شنطة ملیانه  
معجون وفرش أسنان ویسأل .

– هو انا كنت بحلم بأیه ؟ ... حلمت احلام کتیر وكل  
حلم كان یموت كنت بیدله بحلم تانی .. لكن دلوقتی  
بحلم بأیه ؟

الشنطة ملیانه وتقیلة .. حاسس ان اللى فیها هموم ..  
لازم بیبع فرش السنان کلها .. لو باعهم کلهم هیطلع  
بحوالی ٧٨ جنية .. حلوین .. رضا . بیطلع التلیفون من

جيبه يتصل برقم لكن محدش بيرد عليه .. بيايق شوية.. لكن عادى اذا كان مش هيرد عليه يبقى مفيش قدامه غير انه بيع .

من ساعة ماشتغل مندوب مبيعات وهو اتعلم حاجة من صحابة المندوبين التانيين .. ان اول زبون ده اهم زبون... لأنه اسمه فى عرف الشغل الإستفتاح .. يعنى لو باع لأول واحد يقابله اليوم هيبقى حلو .. ولو معرفش بيعله هيبقى يوم شقا وتعب وحناقات وقرف .. وعشان كدة يمكن يمشى كتير لحد ما يحس انه فى منطقة معقولة مناسبة للبيع الى معاه . وهو اصله كل يوم يبيع حاجات شكل .. يوم ينزل شايلى شامبوهات .. اسبوع ينزل بساعات .. برفانات .. يومين بس نزل بشربات رجالي وكان حاسس انه متضايق .. كان حاسس انها قلة قيمة . الإسبوع الى فات كان نازل بكام حزام فوقهم محفظة هدية وكان اسبوع حلو .. باع كتير وكان يخلص البضاعة الى معاه ويجرى على المخزن ياخذ دفعة تانية وبييها .. طلعه بحوالى ٤٨٠ جنيه بس على اول الاسبوع الجديد راح المخزن مالقاش ولا حزام واحد .. الدفعة الصيى خلصت .. نصحوه يبيع عرض فرش الاسنان عرض جديد وكله هدايا ومش غالى .. وفعلا ملى الشنطة بالعرض الجديد ونزل .. واخيرا لقي واحد حس انه ممكن يشتري .. رسم الابتسامة الجميلة ودخل عليه .

## على المسرح ....



( يدخل حاتم الذي يقوم بدور مندوب المبيعات الى المسرح حاملا فوق ظهره شنطة كبيرة وفي يده مجموعة من فرش الأسنان ثم يتجه الى مصطفى الذي يقف في احدى بؤر الإضاءة وفي اذنيه سماعات الموبايل ويسمع احد الأغاني الشعبي الحزينة ويبدو على وجهه التأثر الشديد بالأغنية )

( حاتم يحاول ان يلفت انتباه مصطفى .. إلا ان مصطفى لا ينتبه .. يحاول مرة اخرى و بعد ان تفشل محاولاته يطرق بإصبعه على كتفه ... فينتبه مصطفى .. يخرج السماعات من اذنيه . ويبدأ الحوار )

مصطفى : ( في غضب ) نعم .. عاوز ايه ؟

حاتم : ممكن اخد من وقت حضرتك دقيقة ؟

مصطفى : لأ شكرا

**( مصطفى يهم ليضع السماعات في اذنيه .. الا ان حاتم يوقفه مرة اخرى )**

مصطفى : فيه ايه ياعم انت ؟ انت عايز ايه ؟

حاتم : يا أستاذ خد فكرة وماتشترش

مصطفى : ( في غضب ) نعم .. اتفضل .. عايز ايه ؟

حاتم : بص يافندم .. ده معجون سنان حضرتك مش هتلاقيه في الصيدليات ولا ف اى حته تانية غير عند العبد لله ... معجون السنان ده يا فندم عليه مادة فلوريد الأمونيا .. بالاضافة الى مادة الفلوريد الفعالة اللى بتقضى على التسوس من أول غسلة .. مفاجئاتي خلصت ؟

مصطفى : ( في زهق ) خلصت

حاتم : ( مبتسما ) لا ماخلصتش .... لو حضرتك خدت المعجون ده انهاردة يافندم .. هنقدملك مع المعجون ٣ نكهات مختلفة .. نكهة الفراولة ونكهة التفاح .. والنكهة اللي كلنا بنحبها .. النعناع .... مفاجئاتي خلصت ؟

مصطفى : ( في زهق ) خلصت

حاتم : ( مبتسما ) لا ماخلصتش .. لو حضرتك خدت المعجون ده انهاردة هنقدملك معاه مفاجئتنا مع المجموعة كلها .. وهى السواك .. مفاجئاتي خلصت ؟

مصطفى : ( في زهق وغضب ) خلصت

حاتم : ( في ابتسامة ) لا يا فندم مخلصتش . لو حضرتك خدت المعجون ده يا فندم هتاخذ معاه تلت فرش أسنان بمقاسات مختلفة .. لحضرتك وللمدام ولليبي الصغير مفاجئاتي خلصت ؟

مصطفى : لا مخلصتش

حاتم : لأ خلصت انا مش علاء الدين يافندم .. هاجيب لحضرتك ايه تاني اكر من كدة ؟


مصطفى : طب اتكل على الله يا حبيبي .. وربنا ينورك طريقك

حاتم : طب اسالني السعر كام

مصطفى : سعر ايه .. ياعم انا لاق اكل .. لما هاغسل سناني ... ده انت رايق اوى

( يضع مصطفى السماعات في اذنيه ثم يتجه ليخرج  
تاركا حاتم يقف وحيدا .. بينما تدخل مروة التي تقوم  
بدور الفتاة الى المسرح .. تنظر في وجهه الباهت الذي  
غابت عنه ابتسامة العمل المصطنعة وتسأله )

مروة : ها يا حبيبي ... عملت أليه ؟



خارج المسرح .

## ( هـ )



بتشتغل كاشير في كنتاكي .. اكيد  
في يوم شوفتها .. ايوة هي اللي  
بتبقى لابسه ( التي شيرت ) الأحمر  
وفوق راسها الطاقية الحمراء وتحت  
الطاقية التحجبية الكحلي

( الإسبانش ) هي اللي  
بتقعد تستعجلها لو  
الوجبة اتأخرت .

اكيد شوفتها .. مش  
بعيد في يوم تكون عاكستها ..

او جايز تكون بعدت عينك عنها عشان شوفتها متبرجة  
وحاطة مكياج كتير .. وممكن برضه تكون استخسرت في  
يوم تقوملها في المترو بحجة انها فيه مش بتركب عريية  
السيدات .. ومين عارف جايز تكون قومتلها بس أكيد  
شوفتها .

ايوة هي اللي بعينها اللي كانت راكبة جنبك في  
الميكروباص وكانت بتحاول تبعد رجليها عنك وانت  
استغربت عشان مكانش قصدك حاجة .. بس اعذرنا  
وما تاخدش في بالك غيرك كان اكيد قصده يضايقها ... لو

مش فاكلها بص من الشباك او من البلكونة هتلاقيها ماشية حاطة سماعة الموبايل في ودنها عشان ماتسمعش اللي بيقلوه عن جسمها .. وهتلاقيها بتمد عشان خيفة حد يمد ايده ويلمس صدرها .

هى اللي بقالها فترة كبيرة مخنوقة وتعبانة ومش طايقة الدنيا وكل يوم بتتخنق وتتموت بألف طعنة .. هى اللي طول الوقت في الشغل وفي البيت وفي اى مكان بتضحك ضحكة عالية كدابة بتخرج فيها صرخة مكتومة مش عارفة تصرخها من سنين .

في يوم فكرت في الموت .. تخيل فعلا فكرت في الموت؟ .. قامت بسرعة اتوضت وصلت .. وعلى سجادة الصلاة نزلت دموعها .. بقالها كتير ماتكلمت مع ربنا .. حاسة بقالها فترة كبيرة انها بعيده عنه وبصراحة مكسوفة تكلمه .. مكسوفة تدعى .. وبقالها فترة بتنفخ كتير بتتخانق على اى كلمة صغيرة .. في الشغل بداوا يهزروا معاها ويسموها العسكري الأحمر .. بيندهوها كدة تخيل ؟ .. هما بيضحكوا وهى كمان بتضحك بس من جواها بتموت

من اسبوعين كان عيد ميلادها .. تمت ٢٩ سنة .. احتفلوا بيها في الشغل وجابولها تورته كبيرة كانوا كلهم فرحانيين ليها لكن هى ... كانت بتموت .. شافت نار الشمعتين حريقة بتولع في المكان نفخت فيهم نفخة شديدة عشان بسرعة يتطفوا .. مسكوها السكينة عشان تقطع التورته ..

مسكت السكينة وقتلت التورثة .. واستنتت تسمع كل الكلام  
الجميل



– كل سنة وانت طيبة

– انت شاء الله السنة الجاية  
نحتفل بيه وانت ف بيتك

– كل سنة وانت طيبة .. والسنادى  
بقى نفرح بيكى انت ( وهو )

– يارب سنه سعيدة عليكى يا

(هى).. الا صحيح هو ( هو ) مجاش ليه ؟

امبارح طالت بينهم المكالمة .. تقريبا كانوا بيتخانقوا..  
بس الفرق بينها وبينه انه كان قادر يزعق .. الساعة  
كانت اتنين الفجر بس هو كان قادر يزعق .. غضبه كان  
قادر يعدى سور المخدات الى اهله كانوا حاطينها على  
ودانهم عشان يعرفوا يناموا .. لكن هى مش هينفع تقلق  
اهلها .. مش هينفع تعرف اهلها .. هما عارفين الحكاية  
لكن برضه مش هينفع .. هى مفهامهم انها اسعد واحدة  
فى الدنيا ... من كام سنة حاربت اهلها والناس كلهم ..  
رفضت العرسان والخطاب واتحدثهم كلهم .. ازاي دلوقتي  
تعلى صوتها فى المكالمة ؟ ازاي ممكن تتحمل نظرة الشماتة  
الى هتخرج من عيونهم .. من كلامهم .. من ابتسامة  
الصعبنة والطبطة الكدابة الى ممكن تكسر ظهرها....  
لازم تخنق صوتها فى المكالمة ... وفعلًا خنقته .. كل

الغضب كان مخنوق يدوب بس بيرعش الهمس اللى خارج  
من صوتها.. لو كنت سمعتها كنت هتضحك .. تخيل كدة  
معيا .. غضب جامد مكتوم خارج بحرقه وحرقة دم..  
عارف .. كان صوتها عامل زى الحصان لما بيصهل .. كنت  
هتחס ان حصان بيتكلم وهو بيبيكى .. كنت هتضحك..  
لكن هى كانت بتموت .. كانت بتلف وتدور فى اوضتها.  
كانت مش ثابتة . كنت تحس كأن الارض مولعة وهى مش  
قادرة تدوس عليها .. كنت هتضحك . لكن هى كانت  
بتموت .. كانت لو ثبتت هتموت .. لو وقفت هتموت ..  
لو سكتت هتموت .. كانت بتعافر يمكن روحها متخرجش..  
كمان خافت تعيط يفلت صوت العياط فيصحي الناس  
الى نايمة .. والنايمين لو صحوا مش هيكتموا ودانهم  
بالمخدرات لكن .. هيكتموها .. كانت دموعها بتتكتم بتسد  
شريان قلبها فتحس بيه بيتنفض .

طالت بينهم المكالمة ... لحد ماخلصت الدموع فى  
عنيها وعنيه .. وخلص كمان كل الكلام اللى اصلا كان بقاله  
كثير خلصان من يبجي اكثر من سنة .. نامت على السرير  
وكالعادة نامت ملامومة .. بتنام على جنبها اليمين . رجليها  
بتحضن بطنها وتحط اديها تحت راسها والمخدة فوق  
وشها وتموت لحد الصبح .. هو كمان بعد المكالمة نام..  
بينام على بطنه ويفرد درعاه كأنه مصلوب ع السرير .

لما زمان من كام سنة جابلها دبodob هدية فرحت بيه  
اوى مكاتتش واخدة بالها ان الدبodob شكله حزين .. من

كثر الفرحة حضنت الدبدوب واول ماروحت حجزتله مكان فوق المكتب عشان كل شوية تشوفه وتبص عليه .. وبعد وقت شافت وشه الحزين ولأن قماشة قطيفة بمقتش عارفة تشيل التراب اللى بهدل هدومة .

اول هدية جابهاها مصحف .. جابه تانى يوم بعد ماقالها بحبك .. فرحت بيه اوى . جسمها قشعر ... لسه فاكرة اليوم ده كانه امبارح .. مسك المصحف وقالها

— فكرت كثير ممكن اجيبك ايه .. وبصراحة كان كل اللى معايا خمستاشر جنيه .. فمالقيتش هدية احسن من كدة .

كانت عنيه مليونه طيبة وصدق .. وكان يلمع فيها حلم .. فى الأول كانت فاكراها دموع .. اصلها لمعة جامدة .. كل مايتكلم عن نفسه عينه تلمع . كل مايحكيها هو شايف مستقبله عامل ازاي وشكله ايه .. عنيه بتلمع .

هو : اول ماتجوز هنخلف .. سيبك من شغل نستنى سنة او سنتين والكلام ده .. وبعدين انا عايز ولادى يكونوا صحابى .. مش اخلفهم وانا كبير ويبقى الواد عنده ١٥ سنة وانا داخل ع الخمسين ..

هى : بس دى مسئولية

هو : واحنا قدها وقدود .. ايه .. هنخاف من ايه ؟

هى : طب هنجيب فى الاول ولد والا بنت

هو : هو احنا اللى هنختار

هى : لأطبعا .. بس احنا نقول واللى يجيبه ربنا بعد  
كدة كله كويس

هو : ماشى ياستى .. بصى احنا فى الاول نجيب ولد ..  
عشان يبقى اكبر من اخواته البنات ويعرف يحميهم

هى : بس يحميهم مش يغلس عليهم

هو : هنخليه يصاحبهم

هى : طب وهنسميه ايه ؟

هو : فارس

هى : كدة لازم تجيله حصان

هو : مش لازم .. عادى .. هيبقى فارس من غير حصان  
.. زى ابوه .. اخلاقه اخلاق فارس كلمته كلمة فارس .. يوعده  
مايخلفش .. يقول الصدق والناس تحبه يحمى الضعيف  
ويحارب الفاسدين ..

هى : نعلمه رياضة كويسة .. ونعلمه يعزف موسيقى .

هو : عود أو كمان

هى : وبيانو

هو : ماشى

هى : ولازم يحب السيمة .. ايه رأيك نطلعه فنان ؟

هو : واحنا مالنا هو يطلع زى ماهو عايز .. هو اللى  
لازم يختار حياته .

هى : طب والبنت ؟

هو : نسميها حلم أو امل

هى : مش قديم شوية اسم امل ده ؟

هو : كل اسم له معنى .. ومفيش اجمل من معنى  
كلمة امل

هى : انت ازاي متفائل كدة ؟

هو : عشان حلمى كبير .. ومش ناوى اكون انسان  
عادى جاى الدنيا عشان يتجوز ويخلف وخلص على كدة .

هى : يعنى انت مش بتحلم تتجوزنى

هو : لا .. لان كل احلامى انتى فيها .. انتى مش حلم  
نفسى احققه .. انتى شكريكى فى كل حلم .

من كام يوم وهما بيتكلموا .. كانت عايزة تفكره بالكلام  
القديم اللى كان بيقلهولها . كانت عايزة تسأله راحت فى  
احلامك بس خافت احسن يقولها ركنتها كلها علشانك ..  
لكن سألته راحت فى اللمعة اللى كانت فى عنيك ؟ معرفش  
يرد .

اول عريسين يجولها كانت لسه بتدرس فى الكلية ..  
اتحججت بالدراسة . ولما اشتغلت اول شغل بعد الشهادة  
فى مكتب طباعة رسائل علمية فى شبرا جمب كلية هندسة  
وقع المهندس فلان فى حبها . كان بيحضر ماجستير . كان  
شيك ونزيه . وكان بيتلكك يجى يكتب رسالته فى المكتبة

ويقعد ساعتين معاها يعدل كلمة يعدل حرف معدول  
اصلا . يكبر فنتظ . وفي يوم صارحها وهى طبعا رفضته ..  
هى مش بتحب غيره مش شايفه غيره .. رفضت عرسان  
كثير .. كانت بتحاول ترفضهم قبل مايروحوا البيت عندها  
ويسألوها اهلها الرفض ليه .

الكارثة كانت لما جالها استاذ فلان .. صاروخ الرياضيات  
في روكسى كان عندها في الوقت ده ٢٥ سنة وكانت بتشتغل  
سكرتيرة في سنتر تعليمى في مصر الجديدة شافها صاروخ  
الرياضيات قال هى دى ومكلمهاش طلعت البيت عدل ..  
ازاي هترفض الصاروخ شقتين في جسر السويس ورصيد في  
البنك ودروس خصوصية .

ابوها : طب يابنتى فهمينا .. ايه سبب الرفض

هى : مفيش

ابوها : ازاي مفيش ؟ ماهو لازم يبقى فيه سبب مقنع

هى : انا مش عايزة اتجوز بالشكل ده .. مش عايزة

اتجوز جواز صالونات

امها : امال عايزة تتجوزى ازاي .. كل البنات بيتجوزوا

كدة .. وبعدين هو فيه واحدة دلوقتى لاقية عريس ..

وافقى يابنتى وبلاش عبط بدل ماتعنسى وتقعدى في البيت

تكلمى الحيطان والبروايز وماتلاقيش حد يعبرك .. انا وابوكى

مش عايشينلك العمر كله واحنا عايزين نطمئن عليكى .

هى : مش هتجوزه .. انا بحب واحد تانى

هى قالت كدة وحصل العادى ... العادى جدا .. حصل  
الى بيحصل دايمًا لما البنت بتقول بحب انفجرت قنبلة  
الاسئلة الى كل اجابة لسؤال فيهم يفجر الف سؤال تانى  
مين ؟ ... اسمه ايه ؟ ... تعرفيه من امتى وعرفتيه  
فين؟ ... يشتغل ايه ؟ ... شغله ثابت ؟ ... يياخد كام ؟ ...  
عنده شقة ؟ ... ابوه يشتغل ايه ؟ ... جاهز يتجوز ؟ ...  
هيجيبك شبكة بكام ؟ ... طب ومجاش يتقدم ليه ؟  
الإجابات بتاعتها بتخفقها .. كل ما بتجاوب على سؤال  
بتلاقى اجابة تانية منهم .. اجابة هدفها انها تكفر بإيمانها  
بيه

ده صايح ... بيضحك عليكى ... فاشل ... هتتهدلى  
معاه ... طب هتجوزوا ازاي ؟ ... يعنى ايه ايجار جديد ؟  
... مفيش حاجة اسمها حب ... مالهوش مستقبل .

## هو و هي

**هو** .. بقالة كثير عايز يبيع ومش عارف .. شغال بياع بقاله سنين ومش عارف .. لسه فاكر أول يوم نزل يقابل دكتور يعرض عليه جهاز الإشاعة الجديد والدكتور اشترى منه الجهاز .. كان ايامها شغال ( سيلز ) في شركة اجهزة طبية .. احتفلوا بيه في الشغل واتعاقدوا معاه على مرتب الفين جنيه وادوله مكافأة ١٥٠ جنيه .. نزل فرحان .. جابلها سلسلة فضه مكتوب عليها آيه الكرسي .

**هي** .. من يومين مسكت آية الكرسي اللى متعلقة على صدرها اول ماشافت ولد وبنت صغيرين اديهم حاضنه بعض ومستنين وجبه الكنتاكي مسكت السلسلة الفضة عشان تحس انها هي كمان لسه صغيرة .. لسه قادرة تحب .. كانت عايزة تقولهم انا كمان والله فيه ولد يبجبنى وانا بحبه .. استعجلوها اتترفزت وسابت الكاشير وخرجت للشارع وبصت للسما .. كانت عايزة تدعى ربنا .. حاولت تقول اى حاجة .. حاولت تدعى بأى كلام معرفتش .. حضنت بأديها السلسلة جامد فاتعورت .. شدت السلسلة من على رقبته وشالتها في الشنطة .

**هو** .. لما اشتغل ( سيلز ) في شركة التأمين قعد شهور مايجيبش في الشهر كله غير بوليصة او اتنين .. وفجأة ربنا فتحها عليه .. سنتين كاملين الدنيا بتضحك .. دخل

جمعيات وحوش فلوس .. قتل السجاير وكان مستنى يترقى .. هو مكانش متدايق انه شغال ( سيلز ) وكان مايقولش على نفسه سيلز .. كان يقول انا مندوب مبيعات .. انا بياع .. كان اصلا يبيلم يبقى حاجة كبيرة فى شغلانة البيع .. مصر كلها شغاله ( سيلز ) الشاطر هو اللى يتفوق .. حلم بمشاريع كثير هيعملها وينجح فيها .. حوش كثير .. ومرتبته وصل لـ ٣ الاف جنيه غير العمولة

هو : عارفة احنا كدة ممكن سنين بكتيروا أوى ونتجوز

هى : اهم حاجة الشقة .. انت عارف ماما وبابا اكثر حاجة متمسكين بيها هى الشقة

هو : ان شاء الله ... انا دلوقتى معايا ٣٠ الف وممكن ارحم عليهم فى البيت واخليهم يدونى عشرة كمان وعلى اخر السنادى ممكن ناخذ شقة قسط فى فيصل او سوق القنال

**هى** .. فى اليوم ده روحت فرحانه .. غنت .. كانت ماشية بتغنى .. حتى اللى ماشيين فى الشارع عاكسوها كثير وهى ماهمهاش .. اصلا ماسمعتهمش .. فضلت تغنى .. وجابت فستان جديد .. فستان ابيض عليه ورد ازرق .. حلمت بالبيت وفكرت فى المسئولية اللى مستنياها لكن قالت جواها انا قدها وقدود .. مسكت صورته حضنتها وباستها. واستنتت معاد بكرة .

**هو** .. اتصل بيها عشان يكنسل المعاد .. نزل مع  
ابوه يعمله اشاعة عشان يتأكد ان اللى عنده مش ورم ...  
وطلعت النتيجة .. ورم .

ابوه : سامحنى يابنى ..تعبتك معايا .

هو : ماتقولش كدة يا حاج .. المهم تقوم بالسلامة

ابوه : سلامة ايه يابنى .. انا كنت مت وريحتكم من  
الهم اللى اتتوا فيه .. عارف يابنى انا عمرى ماعيتت ..  
عمرى ماتعبتت .. كنت عارف انى لو تعبتت فى يوم البيت  
كله هيقف ويتعطل .. لما نظرى ضعف من كام سنه  
خفت اروح للدكتور ويعملى نضارة .. كنت خايف احسن  
صاحب الشغل يقول ان انا كبرت ويقلل اليومية .. يعنى  
مش كفاية انى مش هعرف اصرف على البيت وعليكوا كمان  
ازود حمل فوق حملكم .. انا يابنى اللى زى لازم يموت .

هو : ليه بتقول كدة بس .. اكيد هتخف وهتتعالج  
وهترجع زى زمان .. وهاخد منك المصروف كمان .

ومع اخر جنينه دفعه من تحويشة الحلم .. مات  
الحاج .. مات حزين .. فى غيبوبة موته كان يبكي .. كان  
بيخترف بكلام كله اعتذار واسف .. وهما شايلىنه وطالعين  
بيه ع القبر عشان يدفنوه كان بيجرى .. كان مكسوف وعايز  
يتدارى فى الارض بسرعة من كتر حزنه وكسفته ... ( يارب ...  
يارب ... يكون له مكان حلو فى الجنة )

هى .. مع مرور الوقت صاحبت المراية .. كانت عايضة  
تحس ان جمالها لسه ماضعش .. كرهت صورها القديمة..  
بعديت عن صَحْبَاتِهَا اللى اتجوزوا .. هاجرت الأفراح ..  
واستنتت الأمل

هو .. مابقاش يبييع .. مشوه من شركة التأمين .. اشتغل  
فى مكتب محامى تابع لبنك .. شغلته يطارد اللى عليهم  
فلوس للبنك .. يكلم اللى اقترضوا فلوس ومايسددوش ..  
كان بيستغرب ازاي زمايلة فى المكتب بيكلموا الناس كده ..  
بيشتموهم ويهددوهم ويعملولهم فضايح فى منطقتهم ..  
سألهم قالوله الناس مابتجيش غير بكدة .. فكر يجرب ..  
اتصل بواحد هدده .. شتمه .. قاله ياحرامى عليك شهر  
متأخرة للبنك .. الراجل خاف لكن معرفش يعمل ايه ؟ فتح  
محل عصير قصب جنب بوابة الهرم وبعد الثورة فلس  
.. راحله ( هو ) البيت عشان لو مدفعش يعمله فضيحة  
.. رسم نفسه جامد .. كشم وشه وفرد ريشه واتفكلم من  
نبرة صوت مصطنعة .. الراجل كان شكله جامد برضه .  
كبير فى السن لكن ماسك نفسه وشادد حيله . استقبله  
بحزم من غير خوف .. ودعاه للدخول فى اوضة الضيوف..  
وقفل عليهم الباب .. وبسرعة وطى على ايده باسها .  
من سرعة الراجل مالحقش ( هو ) يسحب اديه .. البوسة  
علمت على ايده . ومعهاها كمان كام دمعة من عين الراجل  
... يالله .. ازاي بيتقهر الرجال بالشكل ده ؟ ازاي بتموت  
الأحلام بالشكل ده ؟

**هو وهى ..** امبارح طالت بينهم المكالمة .. واتفقوا انه خلاص لازم يسافر .. هنا مفيش امل .. يسافر وبعد كام شهر يرجع يكتب عليها .. وبعدين يرجع ياخذها . الراجل الكفيل كلمه من اسبوعين وعرض عليه السفر .. هو رفض لكن خلاص لازم يوافق .. وانهارده من اول اليوم عمال يكلمه .

## عودة الى المسرح .



( يخرج مصطفى ولم يشتري شيئاً بينما تدخل مروة  
التي تقوم بدور الفتاة الى المسرح .. تنظر في وجهه الباهت  
الذي غابت عنه ابتسامة العمل المصطنعة وتسأله في  
ابتسامة تجاهد من اجل تبدو له ابتسامة امل )

مروة : ها يا حبيبي ... عملت أيه ؟

حاتم : معملتش حاجة

مروة : طب والراجل اللي قال انه هايسفرك ؟

حاتم : بتصل بيه مش بيرد عليه

مروة : طب وأهلى اللي مستنينك ؟

حاتم : قوليلهم يستنوا شوية

مروة : يستنوا كتير؟

حاتم : يعنى لحد ما اخلص كل فرش السنان اللي

معايا

مروة : ( تصمت لحظة لاتدرى ماذا تقول ثم تسأله )

طب وانا ؟

حاتم : استنى شوية

مروة : يعنى بمعنى اصح بتقولى امشى

حاتم : انا مقولتش كدة

مروة : انا عندى تسعة وعشرين سنه

حاتم : سنتين كمان

مروة : وعايزنى أصدقك ؟

حاتم : لأ...عشان انا فعلا بكذب

مروة : بس انا هاصدقك

حاتم : ليه هتصدقيني ؟

مروة : عشان مبقاش فيه حاجة قدامى غير انى اصدقك  
... خلاص ..مبقاش فيه حد يخطع الباب .. استنيتك  
كثير لحد مالمحطة فضيت عليه ومفيش مواصلة جاية  
تاخذنى .

حاتم : انت كدة بتجرحيني .. انت واخدة بالك ؟

مروة : واشمعنى انا ..واشمعنى انا طول الوقت عيون  
الناس بتجرحنى وافضل طول الوقت اسمع فى كلام بيدياق  
من ناس مبتحسش

حاتم : بس انا حاسس بيكى .

مروة : ( تضحك بسخرية بينما تظهر الدموع فى عينها)  
يافرحتى ... لأ تصدق فرحتى ..طب مادام انت حاسس  
ببيه اوى كدة .. يبقى اسمع بقى وخذ عندك ... ( تنفجر  
لتخرج بعضا مما تكتم .. كانت دائما ماتدارى وتكتم الا  
انها لا تستطيع الآن .. اما ان تبصق ما بداخلها او تموت  
.. ستتحدث وستصرخ .. وستتعهد أن تجرحه وتؤلمه  
.. وهاهى تبدأ فى تشخيص هؤلاء الذين لا يكفون عن

**الكلام** ) إلا انت يا حبيبتى ليه ماتجوزتيش لحد دلوقتى ؟ ..  
واللهى يا حبيبتى احنا خايفين لمحدث يجيلك ... الا صحيح  
هو لسه فيه عرسان بيتقدمولك ... ايه مش هنفرح بيكى  
قريب ؟ ... يابنتى العمر بيعدى ومحدث هيرضى ياخذك  
بعد الثلاثين ... بنت خالتك عندها عشرين سنه وفرحها  
بعد يومين ... تحب تسمع تانى والا كفاية عليك كدة ؟  
.. تحب اكلمك عن نفسى لما بقف قدام المرايا .. تحب  
اقولك عن السواد اللى بقى تحت عينى والا عن الثلاثين  
شعرة البيض اللى ما بقتش عارفة اخيهم وسط شعرى ...  
حاسس بية ازاي بقى ... بدخل كل يوم واقفل على نفسى  
الباب هربانه من عيون الناس وكلامهم . بس الباب  
مبيمنعش الكلام ولا بيخينى عن عندهم ... انا هصدقك  
وهستناك .. لانى لو كدبتك مش هاقدر اعيش ... هاصدقك  
بس عشان مصدقش انى بموت .

( تخرج مروة من على المسرح بينما يبقى حاتم  
وحيدا .. ينظر إلى سماء المسرح وإلى الجمهور ... لا يرى  
منهم احد .. لا يسمع منهم احد .. ربما كانوا فى صالة  
المسرح ويكون لها وربما كان بعضا منهم يتألم من  
تلك المرأة التى فضحت ما بداخلهم .. ينظر الى اضاءة  
المشهد الخافته التى لاتتير له الطريق .. تظهر فى عينيه  
الدموع .. دموع الالهانة والإنكسار ثم يتجه الى ( على )  
الممثل الذى دخل لتوه على المسرح .. يخرج فرشاة

الاسنان من حقيته لعله يبيع منها شيئاً يتسم ويحاول  
بكل ما يستطيع ان يدارى دموعه .. ويفشل (

حاتم : ممكن اخذ من وقت حضرتك دقيقة ؟

على : ( فى تجاهل ) لأشكرا

حاتم : هتندم صدقنى خد فكرة ومتشتريش .. بص  
ده معجون سنان .. بيبوظ السنان .. ودى فرش أسنان  
بتبوظ من اول غسلة ... (يخرج على ) إذ يرى ذلك البائع  
مجنوناً بينما يصرخ حاتم فيه ) بس اشتريه ... اشتريه  
عشان واللهى العظيم رجلية تعبت من كتر اللف والتدوير  
ومحدش عايز يشتري .. وشى تعب من كتر التمثيل بابتسامة  
بهتانة راسمها بالعافية وبرضه محدش عايز يشتري  
...لسانى متكسر بكلام محفوظ مدروس مالهوش اى معنى  
وبرضة محدش عايز يشتري ...مع ان مفاجئاتي مبتخلصش  
.. بس العمر بيخلص والحيل بيتهد والسنين بتجرى بجهن  
وخبث وسرقة مش عايزة حد يحس بيها لكن انا حاسس  
بيها ومش عارف اعمل حاجة ...مشلول ...ماشى فى طريق  
مقفول من كل مكان وكل ما اسرع الاقيني ماشى فى الطريق  
بالعكس .. وفيه بنت عندها تسعة وعشرين سنة مستنيانى  
.. واقفة فى محطة مستنيانى والدنيا برد عليها وعيون الناس  
تلج بينزل مبيرحمهاش بيمحى الزكريات ويهد المشاعر ..  
وانا تايه .. مش شايف .. وخلص تعبت ومش قادر ..  
مش هاقدر اكمل ....مش هاقدر اكمل ....(يرمى الحقيبة


التي يحملها مستسلما وقد نوى الا يكمل .. لقد قرر انه  
لن يستطيع .. يقف وينظر الى الحقيبة الثقيلة بكراهية  
ثم فجأة وكأنه قد تذكر سنواتها في انتظاره .. يتقدم في  
ضعف واستسلام ناحية الحقيبة ويسال صارخا)....ليه  
صدقتيني ؟ .. ليه هتستيني ؟ (يحمل الحقيبة مرة اخرى  
.. ويرسم الابتسامة .. لعله يبيع )

( المسرح بظلم )

## صور خاصة



صورة كبيرة متجمع فيها كل صورها القديمة والجديدة  
الصور كلها محطوطة في الألبوم .. والألبوم مكتوب  
عليه من بره ( صور خاصة )



# الصور الخامسة

( صور خاصة ) .. مش اى حد ينفع يشوف صورها..  
ضحكتها فى الصور ممكن تفتنك .. جمال وشها ممكن  
يشير غريزتك .. ولو هى وحشه صورها هتمنع العرسان  
يتقدمولها .. وبعدين غالبا هى دلوقتى محبة وصورها  
القديمة هى كانت فيها لابسه شورت او كتفها باين او  
شعرها رغم الضفيرة نعومته ظاهرة فى الصور ... خبي  
الصور .. وهى تبقى توريها لجوزها او لعيالها لما يحين  
الوان .

البنات البنات .. الطف الكائنات .. غنوا يا تلميذات ..  
طافا طيفى طاطاطا .

سعاد حسنى بتغنى .. وجوا صوتها حياة وفرحة  
وجنون وانطلاق وتحدى .. البنت حبت نفسها والاغنية  
واحنا صغيرين كل يوم بتتذاع فى التلفزيون .. والمسلسل  
( هو وهى ) عمال يتنقل من القناة الاولى للتالثة .. للقناة

السابعة والثامنة والرابعة والخامسة .. وكل يوم في برامج الاطفال الصبح بعد برنامج ( بابا ماجد ) يشغلوا الاغنية..

الولاد الصبيان بيغيروا . ( **البنت زى الولد ... ماهيش كماله عدد !!** ) ثورة الاطفال الولاد بتاخذهم .. البنت زى الولد ازاي يعنى ... لأطبعها البنت مش زى الولد .. واكيد هى مجرد كماله عدد ... وبعدين لأتعالوا نحسبها كدة ... مافيش أغنية بتقول مثلا في كلامها ( **ان الولد زى البنت ماهوش كماله عدد** ) .. يبقى فيه ( إن ) في الموضوع ... واضح كدة ان في وقت من الأوقات البنت كانت كماله عدد ... واضح اوى ان الولد احسن .. وإلا ليه الأغنية هتقول كدة؟؟ وعموما الولاد قرروا انهم يغيروا الاغنية ويحوروها وبقت ( البنات البنات ... صراير البلاعات )

يوم ميلادها بمقاش زى زمان .. الدنيا اتغيرت .. احنا دلوقتي في الثمانينات والتسعينات وداخلين على سنة ٢٠٠٠ .. والبنت زى الولد واللى يجيبه ربنا كله خير .. عادى جدا الاب والام بيبقوا مبسوطين .. وبعدين مبيتفاجئوش انها طلعت بنت .. هما عارفين من قبل ولادتها بكام شهر ان المولود الجديد هيبقى بنت .

بس الأب يوم الولادة بياخذ ركن لوحدة ويفكر .. لازم من دلوقتي احوش وأشيل فلوس ليوم جهازها .. وبعدين لازم أربيها كويس ولازم اخاف عليها من الناس ومن نفسها . ( شرف البنت زى عود الكبريت ) ... البنت مش زى الولد .

يوم سبوعها بيصوروها .. بسم الله ماشاء الله زى القمر  
... وهى فى اللفة لو شوفتها مش هتعرف هى ولد والا  
بنت . كلهم وهما صغيرين بيقوا شكل واحد . وحتى بعد  
فترة ممكن تشوف البنت ولد والولد بنت .. لحد ما ابوها  
وامها يجيولها الحلق ويعلقوه فى ودنها .

— هى لسه صغيرة خالص .. رقيقة خالص .. جواها  
حنية غريبة .. لو ليها اخ او اخت صغيرة بتبقى عايزة  
تشيله .. تحضنه .. تبوسه ... عندها عامله زى الشمس  
بتطلع نور .. وفيها جرأة مش عادية .. لو حاولت تهزر  
معها تبص لامتها عشان تفهم منها انت بتهزر فممكن  
هى تضحك عادى والا انت شريير وغريب فمتضحكش ..  
ورغم الجرأة اللى فى عندها برضه بتتكسف .. لما تحس  
انها مبسوفة وعايزة تضحك تخبي وشها فى حزن مامتها  
... ( **البنت عين امها وابوها يحبها** ) . مش بس يجيها  
ده بيعشقها كل يوم يلعب معها وكل كام يوم يجيها  
عروسة تحضنها وهى نائمة .

متعرفش ازاي مع انهم هما البنات فى اول يوم فى  
المدرسة او فى الحضانة مش بيعطوا اوى زى الولاد .. يمكن  
تفاصيل اليوم بتخليهم يحسوا انه عيد او احتفال ..  
اللبس مكوى والشعر متسرح يبىرق او معمول ضفيرة وفى  
اخرة فيونكة حمرا .. الجيبة واسعة وقصيرة ( مضبوطة عند  
الركبة ) تحس ان فيها حرية ولو جريت شكل الجيبة مع  
الهوا هيحسسك انها طيارة والشنطة الجديدة على ظهرها

ألوانها البناتى مغيرة شكل النهار .. واضح جدا إنه عيد  
وهى مبسوة وغالبا شاطرة بتعمل الواجب أول بأول .

فى برنامج ( البرلمان الصغير ) فيه بنت غلباوية مكسرة  
الدنيا وقالبة البرلمان عن حقوق البنات الصغيرين .. ولما  
فيلم ( الحفيد ) بييجى مابتفوتيهوش وتقعده تشوف البنت  
الغلباوية بنت كريمة مختار وعبد المنعم مدبولى ...  
فيروز فى حياتها حلم بتعلم تحققة وانور وجدى فارس  
احلامها ... فؤاد المهندس فى ( هالة حبيبتى ) ابوها اللى  
بتتمناه .. وكمال الشناوى فى مسلسل ( هند والدكتور  
نعمان ) جدها الطيب .. افلام كتير ومسلسلات كتير  
بطلاتها بنات صغيرين .. أليس فى بلاد العجايب .. وفوازير  
نيللى وشريهان وأغانى صفاء ابو السعود . وعشان كدة هى  
مبسوة انها بنت .. بس ليه سعاد حسنى بتغنى البنت  
زى الولد ماهيش كماله عدد ؟!!! .. وبعدين ليه زى الولد  
ماهى احسن اهيه ؟

اكد ليها بنت صاحبتهأ هى بتحبها اوى .. وكمان ليها  
صحاب كتير ولاد .. لو المدرسة مشتركة يبقى صاحبها  
الولاد هما اللى معاها فى الفصل ولو مدرستها بنات بس  
ف ابن الجيران صاحبها وابن خالتها وابن عمها .

مامتها وباباها وهى لسه صغيرة فى يوم راحوا عند  
خالتهأ فى زيارة عادية زى اى زيارة انكلموا وضحكوا .. وهيه  
كانت بتلعب مع ابن خالتها .. سمعت خالتها بتقول لمامتها

انها خلاص من دلوقتي لازم تعمل حسابها ان بتكم من نصيب ابني .. وانهم يعملوا حسابهم من دلوقتي انها لما تكبر هنتجوزه ... لما سمعت سألت ابن خالتها ( هوه احنا هنتجوز فعلا لما تكبر ؟ ... طب هو يعني ايه نتجوز ؟ )

في كل عيد ميلاد بيجيلها عروسة شكل بس هي بتحب اوى ( ساندى وباربى ) .. وماتعرفش ليه بتعتبر العروسة دى بنتها .. تسرح لها شعرها وتغيرلها الفستان وتنام بالليل والعروسة في حضنها . وفوق دولابها عروسة المولد الحلاوة اللى ماتشالتش من فوق الدولاب غير لما النمل عرف طريقه ليها .

كلمة عروسة محيراها .. يعني ايه عروسة ؟ ... طب وهو انا عروسة ؟ ... دايمًا لما تروح مع عيلتها فرح يلبسوها فستان ابيض واسع ويلمع ويقولولها ده فستان ( عروسة ) .. حتى دايمًا كانت تسمع برنامج ( عروستي ) واللى مايعرفش برنامج عروستي هو كان عبارة عن لعبة اول ماتقول عروستي تتطلعلك عروسة وتقولك جزء من فوزة وتفضل تجمع الفوزة لحد ماتحلها في الاخر ...



فهمت وهى صغيرة ان العروسة هى الدمية اللى يمسكها واحد ويقعد يحركها بصوابعة او هى اللعبة البلاستيك اللى لما بتنيمها على جنبها بتغمض عنها ولما بتوقفها بترجع تفتح عنها تانى .

مع كل يوم يبعدي على البنوتة الصغيرة فيه حاجة  
بتنقص ... حاجة بتسرق . بتختفى . بتضيع وماترجعش  
.. هى غالبا مش بتاخذ بالها ايه اللى ضاع بس بتحس ان  
فيه حاجة نقصت .. يعنى هيه مافهمتش ليه باباها لما  
دخل فى يوم عليها وهى بتستحمى اتأسف بسرعة وخرج ..  
ماخذتش بالها ان الشورت القصير اوى اللى كانت بتلبسه  
بدأ يطول حبتين اول ماكملت الست سنين .. بعدها بسنة  
عدد اللى كانوا بيحضونوها ويوسوها بيقل .. الافلام اللى  
بتتفرج عليها بتقل .. سعاد حسنى ساعات بيقلبوا فيلمها  
لما فى يوم بتقرر تسهر معاهم وتتفرج على التلفزيون  
... كمان مامتها نهت على الجيران اللى فوق مايبعثوش  
ابنهم ييجى يلعب معاها . ( الشورت بيطول والاحضان  
بتقل ) .. كل يوم بتنقص حاجة فى حياتها .

فى اخر يوم امتحان ليها فى ابتدائى خرجت من المدرسة  
بتجرى ومبسوطة وقعدت تلعب مع صحابها البنات  
والولاد .. وبعد شوية سلمت عليهم وودعتهم وهى بتعيط  
.. عيطوا كلهم فى لحظة الوداع وهما مش عارفين انهم  
السنة الجاية هيشوفوا بعض تانى لكن غالبا مش هيتكلموا  
مع بعض تانى . البنات والولاد غالبا هيتحط بينهم ستارة .  
انت خلاص مبقيتيش صغيرة .

لأهي فعليا كانت لسه صغيرة .. بس ده الإنذار ..  
المعاد قرب والخوف بيزيد ( هيه مش فاهمه ) القوانين

بتتخط والدستور يجتمع الاب والام كل يوم عشان يكتبوه .. والدستور مفيهوش حقوق .. كله مواد ارهاب وتخويف (هيه مش فاهمه ) بس القانون لازم يتنفذ وعقابة شديد والاحكام غالبا فورية .. المجتمع حوالها بيقل . بيتقسم نصين ومالهاش نصيب منه غير نص واحد .. الستارة بالتدريج بتتحول لحيطة كبيرة من حديد .. المعاد قرب والخوف عليها بيزيد .. اقعدى عدل وضمى رجليكى وانت قاعدة .. ماتضحكىش بصوت على وماتبينيش سنانك .. فلان ماتكلميهوش .. مع كل حركة بتعملها مامتها تبصلها بتهديد وتحذير .. .حظر التجول يتفرض الحرب قامت وهى مش فاهمه .. قايمة كبيرة من الممنوعات تتعلق بمسار مدقوق جوا راسها .

### وفي يوم يجى المعاد ...

– ( عروستى ؟ )

### – خرطها خراط البنات .

تتغير القوانين .. تتعقد .. يختفى الشورت ويبتدى يظهر فى حياتها دور الحجاب .

لازم تلبس الحجاب .. بتستغرب !! كل الصور القديمة بتاعة مامتها مكانتش لابسه حجاب وهى فى سنها .. دى كمان تقريبا مكانتش لابسه حجاب لحد ماخلفتها .. طب ليه عايزانى انا البس الحجاب وانا لسه صغيرة؟! .. وليه بابا يقوللى لازم تلبسيه مع انه اتجوز ماما وعاش معاها

كام سنة وهى مش لابساها ؟ ... وساعات البنت تمام بالليل وتحس بلحظة ايمان حقيقية تبكى وتقوم تصلى الفجر وتقرر انها مش هتبطل صلاة ابدا وتانى يوم تنزل بالحجاب ( الصبيان كمان فى حياتهم بيعدى نفس الموقف .. فى يوم نسهر نحس ان ربنا قريب منا فى اليوم ده .. نبكى وبرضه نصلى الفجر ونقرر اننا مش هنبطل صلاة ابدا ) وبعد مااليوم بيتدى نصلى الظهر والعصر وبعدين ننسى المغرب والعشا ونرجع زى ماكنا تانى بس البنات غير الولاد .. الولد خلاص كان يوم عبادة وخلص .. اما البنت فتبقى لبست الحجاب والناس شافتها بيه ومش هينفع تخلعه ... وطبعا فيه بنات يلبسوه عن اقتناع .. اقتناع دينى طبعا .. بس ساعات بيبقى اقتناع له علاقة بالموضة او بمشكلة تسريح الشعر او خشونته الشعر .. او لأنه بقى الزى الرسمى للبنات .. او لأنه ييكمل منظر اللبس والألوان والإكسسوارات ... وساعات بيتلبس وهى نازلة من البيت ويس ويتقلع عند اول ناصية بعيده عن البيت ... بس أجمل حاجة بقى لما البنت تلبس الحجاب وتنزل خصلة شعر صغيرة الجميل فى الموضوع ده ان البنت بتبقى ماسكة العصاية من النص بترضى المجتمع والناس وبتقولهم انها مؤدبة ومتدينة وفى نفس الوقت بتعرفهم ان شعرها ناعم وحلو . ومع الحجاب بتتغير حاجة فى روحها سواء للاحسن او للأسوء .. تتغير حاجة فى ضحكتها فى طريقة مشيتها وف

صوتها ونظراتها ( بتغير ) للأحسن ساعات وللأسوأ برضه ساعات .

اغنية سعاد حسنى مبهتتش بتيجى كثير فى التلفزيون ..  
المسلسل كمان ( هو وهى ) بقاله فترة كبيرة ماتداعش ...  
بس افلامها عايشة جواها ( الأبيض والأسود ) سعاد شقية  
وغلباوية وساعات رقيقة بتغنى وترقص وقادرة تنتصر ..  
بتجنن حسن يوسف واحمد رمزى ... ورشدى اباطة مش  
قادر عليها .



( رشدى اباطة ) يالهوى ع  
العسل ... شادية فى الزوجة  
١٣ جنته .. عفرتته .. ضربها  
بالقلم غنتله ( فى ايدك قوة  
تهد جبال ) وبعدين ردته  
القلم ... وبدات تحلم  
بنفسها وهى بتديله بالقلم  
على وشه .

بس هيه لما بتتعاكس  
بتسكت .. مش بتعرف تعمل  
ايه ؟

وساعات لو الواد اللى بيعاكسها دمه خفيف بتضحك  
جواها .. وشوية ممكن تتبسط .. هى لسه صغيرة وفرحانه  
ان فيه واحد شايفها جميلة .

بتصاحب المرآة وبتحب جمالها .. بتكثر الأسرار ويتخلق  
جواها حاجة إسمها الغيرة ... بتحب صاحبها وتشوفها  
جميلة زيها .. لكن البنات الثانية مش حلوين .. او حلوين  
بس دمهم واقف .. او دمهم خفيف بس جواهرهم مش  
حلو .

وتبتدى تنقى بين المشاهير ( فتى الأحلام ) .. ليوناردو  
ديكابريو في تيتانيك على نص ( اكسيرات ) البنات في شبرا  
.. وحمادة هلال وهانى شاکر بوستراته مالية حيطان اوض  
بنات مدراس الصنایع .. بنات البلد بيحبوا ايهاب توفيق  
ويلزقوا ( استيكر ) بصورته على الكشاكيل .. والرومانسيين  
بيعشقوا حنية مصطفى قمر .. وبقية البنات واغلبهم  
يتخانقوا عمرو دياب والا راغب علامة .

كاظم الساهر .. مدرسة الحب ( ثورة الدبائيب )



مع ظهور كاظم الساهر في  
مصر حدثت الفتنة الطائفية  
بين والولاد والبنات .. بين  
الرجالة والستات .. مش بس  
كدة .. ده الفتنة حصلت بين  
الولاد والولاد .. وبين البنات  
والبنات .. ومين يقدر ينسى  
الألف دبوب اللى اترموا عليه  
في الحفلات .. ومين يقدر في

يوم ينسى ( يوم ان هتفت تلك السيدة في احدى حفلات ليالى التلفزيون وصرخت بصوت عالى ... بحبك يا كازيم )  
واتغير شكل الحب .. ومع المراهقة يتولد الحلم بالحب ..  
والحب بس .. مش اى حاجة غير الحب .. وتتكون مواصفات فارس الأحلام .. قوى . شجاع . يخاف عليه .  
وسيم . اطمن وانا ماشية معاه . يحمينى . يغير عليه بس من غير مايسرق حرיתי . وزى ماهو بيدور بين البنات مين هيعلقها ؟ .. هى بتستنى تحب بجد وبتستنى حد يحبها بجد ..

علمنى حبك سيدتى اسوأ عادات ..  
علمنى افتح فنجانى فى الليلة الاف المرات ..  
واجرب طب العطارين واطرق باب العرافات ..  
علمنى اخرج من بيتى لامشط ارفصة الطرقات  
واطارد وجهك فى الامطار وفى أضواء السيارات



وعادت الرومانسية .

مع اول قصة حب .. ( اللى هيه مابتكلمش دى ) بتبتدى وهى ماشية تلمح فساتين الفرحة .. تشتري المجلات وتبص

في آخر صفحتين فيهم على صور الأفراح وتبص على العروسة وتأمل شكل ضحكتها .. تعدى على محلات التصوير وتفرج في الفتارين على صور العرايس والعيسان . لكن بعد وقت قليل مش كثير وبعد ما بتعدى الهوجة الجديدة بتاعة التغيير اللي بيحصل في حياة الولاد والبنات بيرجع حلم المستقبل تاني ينده عليها .. حلم الكلية .. تحقيق الذات .. الحلم اللي ممكن تكون حلمته لما شافت مامتها بتضرب من ابوها .. او لما مرة اخوها فرد نفسه وبدأ يحاول يفرض قوانينه عليها هو كمان .. او جايز وده غالبا هو الاكيد أنها اصلا كان ليها حلم عمره في يوم ماسبها .. حلم اتولد جواها من زمان من قبل ماتفهم يعني ايه بنت ويعنى ايه ولد .. في عالمنا احنا الذكور بنشوف البنت او الست هي الزوجة او الام .. هي كمان بتشوف نفسها كدة بس برضه هي ليها حلم تاني .. احنا في عالم الذكور دايمنا نقول ( مش هخلي مراتي تشتغل ) لكن هي في خيالها عمرها مافي يوم شافت نفسها قاعدة في البيت ويدوب بتنقى الرز وتقمع البامية .. احنا الرجالة دايمنا نقول ( لو قادر أكفى بيتي يبقى أحلى مراتي تشتغل ليه ؟ ) لكن هي مالهاش علاقة باللي إحنا بنقوله .. هي يا أخى مش عايزاك تصرف عليها .. مش عايزاك تتحكم فيها وتيجى بعد كدة لو في يوم رمتها تستنى منك نفقة صدقة عشان تعرف تعيش .. هي مش شايفة نفسها اتخلقت ليك ... احنا نقول ع القهوة ( لو البنات قعدت في البيت مشكلة

البطالة هتتحل ) لكن هى بترد علينا جواها ( ماتحججوش  
ينا .. احنا هنشغل وهننجح مش هنسلم نفسنا ليكوا  
تتحكموا فينا .. احنا زينا زيكوا ) .... بعد وقت احنا الرجالة  
بنفهم حقوقها وبنقبلها .. لكن هما بعد وقت ساعات  
كتير بينسوا كل الكلام اللى فوق ده ويبسلموا نفسهم لينا  
... ويبخسروا .

فى امتحانات الثانوية العامة كل الجرايد والصحف  
والمجلات والمواقع بيروحوا يقفوا قدام مدارس البنات لأن  
هما اللى عندهم الإثارة الحقيقية .. الولاد بيخرجوا زعلانين  
او عادى ممكن اصلا لو الامتحان صعب تلاقيهم يبضحكوا  
على خبيتهم .. او غضبانين وعازيزين يتخانقوا .. لكن البنات  
بعد امتحان صعب مثلا تلاقيهم بيعيطوا .. يبصوتوا ..  
عرييات الاسعاف رايحة وجاية من كتر الإغماءات .. يزعقوا  
فى كاميرات التليفزيون ويشتموا اللى حط الإمتحان .. ازاي  
عازيهم بعد ده كله يقعدوا فى البيت ؟ ..... الغريب انهم  
فعلا أو كتير منهم فعلا بعد الجواز يقعدوا فى البيت ؟!!

مع أول يوم فى الجامعة يتشابك حلمين جواها .. حلم  
المستقبل والنجاح .. وحلم فارس الأحلام .. وياسلام لو  
الحلمين يتحققوا .. هى بتحضر المحاضرات أو بتحاول ..  
بتحلم بإعلام او على الاقل اداب إعلام .. ممكن برضه  
تحلم بألسن .. صيدلة .. طب .. بس ماتعرفش ليه  
اغليبتهم بخشوا اداب .. والجامعة حلم وطريق للحلم ..  
هنا القوانين هتتفك شوية .. الدستور مواده هيتلعب

فيها.. حذر التجول المفروض هيزيد وقته .. الضحكة  
هترجع تانى والمكياج الخفيف هيرجع يجمل الصورة ...  
والحرية فى النهار هتتعاش .

هو فجاة بيظهر فى حياتها .. يقول نكت .. يعنى ..  
بيكلمها كل يوم .. اهتم بيها .. قعد يومين يجيلها  
شوكلاته .. عمل ثقيل .. او كان خفيف .. بعضلات .. او رفيع  
وشقى وروش فى نفسه .. وساعات يبقى مثقف .. شاعر ..  
لعيب كورة .. بينزل مظاهرات .. بيتحدى الدكاترة ... كل  
واحد وله طريقة وكل بنوته ليها دَخلة وسِكة أول ما بتفتح  
تتحول الايام فى حياتها ايام سعيدة .

كل يوم بيتكلموا بالساعات الصبح .. وبالليل برضه  
ساعات كتير بتعدى وهما بيتكلموا بهمس فى التليفون ..  
هو يحبها اه .. لكن هى بتديله كل مكان فى الحب جواها ..  
بتصدقه .. بتستسمله .. بتشوف بعينه .. ودانها بتحجب  
كل صوت الا صوته .. رسول واتبعت ليها .. نبي نور لمبة  
الحب فى حياتها .. وهى من زمان بتحب العروسة .. مع انه  
فارد شخصيته فى افعالها لكن هى بتبقى مبسوطة بتحس  
فى اوامره بالإحتواء .. بتحس ان غضبه غيرة وخوف عليها  
(بتستسلم ) وتتحط القوانين الجديدة ويتشرع القانون من  
جديد ..

— ماتكلميش فلان وماتضحكيش لفلان ولو فلان كلمك  
اشتميه

— إلبسى الحجاب وماتلبسيش البنطلون البيج عشان  
لونه لون الجسم

— لو خرجتى بالليل اتصلى بيه وعرفينى

— امسحى أرقام الولاد اللى على موبايلك

— ماتبوسيش اخوكى ومتحطيش الروج ده تانى

— ماتسلميش على ولاد وابعدى عن صاحبتك فلانه

ورغم إن القوانين شديدة .. بتتنفذ بحب .. وبتبقى  
مبسوطة وعشان كدة ماتستغريش لما تلاقى الشعب  
ساعات ينزل يرقص للقوانين الجديدة اللى هتكلبش كل  
الحرية اللى فى يوم حلم بيها لمجرد انه حب اللى حاطت  
القوانين

هو دايمما ييمنطق الأمور لصالحه .. هو دايمما صح  
مايغلطش .. وساعات يحاورها بديموقراطية عشان يثبتها  
فى الآخر قد ايه هى حمارة .. كل حكاية بتحكيها له عن  
حياتها بيحللها ويفسرهما ويلاقى ليها الحل .. هى بتحب  
تعيط اوى .. وهو بيعشق انها تعيط معاه عشان يمسح  
دموعها

— هى غالبا مابتبصش لغيره .. وهو كمان يفهمها انه  
عمره مايبشوف بنت غيرها ( بس هو ساعات بصراحة  
يبشوف وييص ويلقح مع صحابه على جمال وحلاوة  
البتت اللى معدية قدامه فى الشارع )

— هى بتحب دايمًا تكلمه بس مايحلاش ليها الكلام  
غير فى التليفون !!! يمكن لأنها لما بتشوفه بيبقى هو غالبًا  
الى بيتكلم ويخطب ... بس هو بعد وقت وتحديدًا بعد  
مابتخلص فترة الأهتمام الى بيبقى محتاجها بيكره الكلام  
فى التليفون .

— هى بتشوفه فى احلامها دايمًا .. لكن هو مايعرفش  
بيشوفها فى احلامه والا لآ .. لأنه غالبًا يقوم من النوم  
مش فاكر هو حلم بايه

— هى بتستنى اليوم الى هيجى ويتقدم فيه لجوازها  
... لكن هو بيتمنى اليوم ده مايجيش عشان مرعوب منه  
وقلقان وحاسس انه هيصغر

— هى بتحس جواها بقوة غريبة ممكن تخليها تتحدى  
الدنيا كلها وتستناه مهما طال الوقت .. بس احساسها  
ساعات بيبقى غلط وكثير مبتقدرش تقاوم ... هو بيبقى  
حاسس انه عنده استعداد يهد الدنيا كلها ويعمل  
المستحيل عشان يفوز بيها بس ساعات هو كمان بيبقى  
احساسه غلط وميقدرش يهد حاجة ولا حتى بيعمل ربع  
المستحيل

( هو غالبًا مبيقاش وحش .. هو بس بيحاول يحسسها  
طول الوقت برجولته )

( هى برضه مش ضعيفة ولا بتحب انها تتذل لكن هى  
بتفرح انها مسئوله منه )

لكن مع الوقت وبسرعة بتفتكر حاجات كانت ناسياها ..  
بتفهم وبتتعلم ومع تكرار التجارب ومع الجروح اللى دايمًا  
بتسبب جواها اثر بتتغير وبتتمرد وبتعترض ... وهو كمان  
( ساعات ) بيفهم وبيتعلم وبيتغير ... عقله وعقلها اتغيروا  
واتبدلوا كذا مرة .. تطور الحياة السريع والتكنولوجيا  
والثورة والغضب والكبت خلاهم يكبروا بسرعة .. يشيخوا  
وهما لسه صغيرين ومع الشيخوخة بسرعة قدروا يكتشفوا  
الحكمة واتخلق جيل فيلسوف .

قولوا يا بختنا ... يا بختنا يا بختنا  
قد ايه كلنا .. كلنا .. كلنا  
فرحانين اننا .. اتولدنا بنات

سعاد حسنى بتغنى .. وبتتحدى احمد ذكى اللى كاره  
البنات ( فى الحلقة دى ) صوتها كله حياة وفرحة وحب  
والبنات حوالها بيرقصوا ويغنوا ويعزفوا .. ابتسامتهم  
بتخلى شاشة التلفزيون بتضحك ... والبنات تسأل نفسها  
بعد وقت ... ياترى فعلا كلنا فرحانين إننا إتولدنا بنات ؟  
طب ازاي وكل القوانين والموانع والتحذيرات مفروضة  
علينا؟؟

طب ازاي والعقاب كل يوم فورى فى الشارع وحتى من  
غير مانعمل ذنوب ؟ .. ازاي وكل يوم بنتشتم ونتلمس  
ونتقفش ونتهوش ولما نمد فى خطوتنا ييلحقونا ويطاردونا  
وفى الأعياد يزفونا؟؟

طب ازای والرجالہ لیها حور عین فی الجنة واحنا بس  
من نصیبنا هما ؟ والا یكونش لینا بس ربنا مقالناش ؟  
طب ازای ولو واحدة فینا اترزعت بالقلم مابتردهوش ؟  
ولو رضته هو اقوی فهتضرب تانی ؟

طب ازای وهو الی یدفع النفقة والمؤخر وهو الی  
یکتب القايمه وهو الی یقول انتی طالق وهو الوکیل  
ساعة الجواز وهو الی یرفض العریس وهو المرشد  
والإمام والمحافظ والقائد والرئيس ؟

لأول مرة هی بتركز فی ملامح سعاد وهی بتغنی ( البنات )  
بتكتشف .. كانت عنیها فیها تعب وإرهاق .. كانت بتقفل  
عنیها كتیر عشان مش قادرة تستحمل الإضاعة .. وكانت  
بتمثل بعصیبة فی لقطات كتیر .. كانت بتحاول ترسم  
الضحكة بالعافیة فمكانتش بتطلع حلوة .. كانت بتحاول  
تستدعی روحها القديمة لكن مكانتش قادرة .. كان علی وشها  
مکیاج كتیر بتدارى بیه الحزن والتجاعید والمرض .. ولأنها  
كانت دايمًا بتشوف سعاد حسنی هی الروح والحرية شیء  
جواها إنطفی .. بکت البنات .. افتركت سعاد فی ( الكرنك )  
وهی بتغتصب .. وفی ( أهل القمة ) وهی بتستسلم للحياة  
وبتوافق تتجوز زعتر الحرامی .. افتركتها فی ( المشبوه ) أم  
وزوجه مهمومه .. وفی ( حب فی الزنائة ) منبوذة من الناس  
والدنيا .. ولما شافت اخر افلامها نسیت الأغنية خالص ...  
وافتركت كمان ان معظم أفلام نیلی ( غم ) ... كل أفلام  
شیریهان ( غم ) وسعاد حسنی ماتت منتحرة .

بس هى مش هتستسلم أكيد .. هى غير .. هى هتغير .. صوتها على .. ليها حلم وأكيد هتحققه .. ماهى اللى نزلت فى ( الميدان ) فى يناير ووقفت فى وش الموت وصرخت ومهمهاش .. غنت وباتت فى الميدان ومهمهاش وكل يوم بتدخل تشتم فى النظام ع الفيس ومبيهمهاش .. وهى اللى نزلت فى ( مصطفى محمود ) تلعن الثورة فى يناير وتشتم وبرضه مهمهاش .. وهى اللى نزلت فى رابعة وفى ٦/٣٠ ومهمهاش ... هى صوت قادر يقول ويصرخ ويشتم ويعبر . هى بس تصدق نفسها .

## على المسرح

### آخر لقطة فى المشهد

( الإضاءة باهتة .. الموسيقى تصرخ .. الممثلين فى ذروة المشهد وفى حالة انفعال )



( بنتين واربعة رجال .. يقذف الرجال بالبنتين بعضهم الى بعض .. ويتبادلون محاكمتهما .. بينما البنتان تدافعان عن نفسيهما بقوة وانفعال )

رجل ١ : حييتي قبل كدة ؟

بنت ١ : مغلطتش

رجل ٢ : مش خايقة ؟

بنت ٢ : لأ

رجل ٣ : اوعى تكونى بتحلمى ؟

بنت ١ : ليه هو انت مابتحلمش ؟

رجل ٤ : ماترديش عالسؤال بسؤال

بنت ٢ : من حقى اسألك مادام بتسألنى

رجل ١ : انا دايمى صح

بنت ١ : محدش فينا ما بغلطش

رجل ٢ : مش لابسه حجاب ليه ؟

بنت ٢ : ربنا هو اللى هيحاسبنى

رجل ٣ : اوعى يابت يكون فى حد كاسر عينك ؟

بنت ١ : انا لو حد كاسر عيني هموت

رجل ٤ : الناس بتتكلم عليكى

بنت ٢ : مايعرفونيش .

( يخرج الرجال من على المسرح بينما تنظر الفتاتين  
بعضهما الى بعض ويتحدثان كأنهما مرآة تطل كل واحدة  
منهما على مرآتها وتخاطبها )

بنت ٢: بتيصيلي كدة ليه ؟ بدل مابتيصيلي وانت  
ساكته ردى عليه ؟

بنت ١: مليون سؤال وسؤال ومفيش اجابات

بنت ٢ : اتغير والا متغيرش ؟

بنت ١: احلم والا محلمش ؟

بنت ٢ : اقول الصدق والا الكذب ؟

بنت ١ : اغنى والا صوتي حرام ؟

بنت ٢ : اضحك والا الضحك ممنوع ؟ ...ردى عليه بدل  
سكوتك ده


بنت ١ : مش من حقى ابقى انسانة ؟ ..مش من حقى  
ابقى نفسى ؟.

بنت ٢ : ليه محدش قادر يفهم انى انسانة ومن حقى  
اعيش .. واحلم .. وافرح .. واحب ..ردى عليه .... لو  
عندك اجابة .. ردى عليه .

إِظْلَام



وليد ... بقاله  
١٣ يوم في مصر  
ومش عارف يجمعهم ..



# الصورة السادسة

هيرجع يسافر تانى بعد بكرة .. هو هيتجنن ويرجع يعيش يوم من أيام زمان .. من ساعة ما سافر السعودية من ٣ سنين وهو عمال يفكر فى اليوم اللى هيرجع فيه ويجمع صحابه بتوع زمان ويخرجوا خروجة من خروجاتهم القديمة .. هو فى السعودية شغال ليل ونهار والمصريين اللى هناك مش صحابه قوى .. يعنى ايدهم ناشفه حبتين ويحافظوا ع القرش زى عنيهم هو عازرهم طبعاً .. اللى وراه بيت واللى مديون واللى عايز يتجوز واللى بيبعت فلوس لأمه العيانه وبعدين كل واحد ادرى بظروف حياته .. طب ماهوه كمان مسافر عشان الفلوس هيكذب على نفسه يعنى . كل يوم يخرج الورقة اللى عاصم ادهاله قبل مايسافر على طول ويقعد يقرأها

مش عارف اكتبلك ايه .. مهما حاولت اقولك  
انا متضايق قد ايه مش هعرف اوصفلك اللي  
جوايا .. لكن على قد مضايقتي هكون مبسوط  
عشان انت هتكون مبسوط .. بس عمال افكر  
من دلوقتي مين هيناكفني ويغلس عليه بعد  
مانت تسافر .. ومين اللي هشكيله همومي  
واقعد اتكلم معاه لحد الفجر واروح ابات  
عنده لما ابوية يطردني .. لكن ارجع واقول  
هرتاح وفلوسى هتبقى بتاعتي .. ده انت خربت  
بيتي وخلصت فلوسى .. جمع فلوس على قد  
ماقدر عشان لما ترجع نعيش كلنا على قفاك  
واهو تسدد شوية من اللي عليك .. ومن  
دلوقتي هستنى لحد ماتنزل اجازة عشان  
هتوحشني .. ربنا معاك يا صاحبي .. ويارب  
ترجعلنا بالسلامة.

عاصم رمضان

اول مارجع قعد يتصل بيهم واحد واحد .. قابلهم كلهم .. بس كل واحد لوحده .. مش عارف يجمعهم ازاي . عزمهم على كتب كتابه ومحدثش جه غير زيزو .. وكان باين عليه وهو في كتب الكتاب انه زعلان عشان محدش منهم جه .. اصله كمان مكانش فرحان اوى بجوازه .. يعنى جواز عادى كدة .. بنت مؤدبة وجميلة وبنت ناس أمه اختارتها له بعد مازنت عليه كتير اوى .. بعنتله صورتها فوافق ونزل يكتب الكتاب ويسافر تانى .

الأجازة بتخلص .. ويوم ورا التانى بيفشل يجمعهم .

لسه فاكر يوم ماسافر ازاي كلهم جم يوصلوه المطار وكان يوم عياط ابن لذينه عمره ماهينساه .. إيهاب كان بيعيط زى المجنون لدرجة انه خرجهم من حالة الشجن اللى كانوا فيها وقعدوا يضحكوا ضحك هيستيرى عليه .. عتابى هو اللى كان زعلان اوى وكان حتى مش عايز يسلم عليه .. كان رايه انه يستنى هنا ويسعى ويفضل يدور على حلمه لكن وليد ماسمعش الكلام .. لكن هقول ايه برضه فى اللحظة الاخيرة ساعة السفر سلم عليه وحضنه جامد وانفتحت حنفيه عنيه عياط وبكا .

وليد : يا ولاد الكلب ... عايزين نتجمع زى زمان .. انتوا فين ؟

بيطلع المحفظة من جيبه وهو واقف على كوبرى قصر النيل عشان يدى خمسه جنيه للبت الشحاته اللى بتبيع

فل ع الكوبرى .. ويلمح بعينه جوة المحفظة الربيع جنيه  
الى قسمه مع مصطفى ومكتوب عليه محمد رسول الله  
... ويسأل نفسه ياترى مصطفى لسه معاه النص التانى .  
خال البنت اللي كتب كتابه عليها عميد فى شرطة  
السياحة .. اتصل بيه كلمه وطلب منه خدمه .. العميد  
اتجنن .. من اولها البيه عايز وسطه وخدمة الجوازة دى لا  
يمكن تتم .. بس البنت زى ماتقول حسنت ان وليد مقبول  
ودمه خفيف وبعدين خلاص دول كتبوا كتابهم .. البنت  
اتحايلت على خالها ينفذله الخدمة اللي طلبها منه ..  
وبعد محايلات كتير العميد قالها انا مش هكلم حد ..  
هو يحاول انه يتصرف وكل اللي ممكن اعمله انى ماخليش  
العين عليه بس اوعى يعمل حاجة تخالف القانون ..  
وفعلا وليد اتصرف وكلم واحد من الهجانه العريجية  
بتوع الهرم واداله خمسميت جنيه عشان يتصرف ويلاقيه  
طريقة يدخله ويسهر هو وصحابه فوق الهرم .. ومبقاش  
فاضل غير انهم يتجمعوا . اتصل بيهم واحد واحد ..  
اتحايل عليهم وحلفهم بأعلى عزيز ان كلهم لازم ييجوا  
.. المعاد يوم الخميس الساعة ١٢ بالليل تحت الهرم  
الكبير .. ووصفهم ييجوا منين واداهم رقم الراجل اللي  
هيدخلهم سر من ناحية الصحرا . وقالهم برضه احطياطى  
عشان لو الراجل ده حب يثبتهم مايجوش بفلوس كتير  
وياريت مايجبوش الموبايلات معاهم .

## .. الساعة ١١ ..

**عتابي ..** يفكر هيروح والا لأ .. هما واحشينه اوى ..  
بقاله كتير ماشفهمش ومايعرفش عنهم اى حاجة .. يدوب  
كل فين وفين ممكن يتقابل هو وزيزو على اى قهوة وكمان  
مايقعدش كتير .. يقعد يحكى ساعة .. يسأله على باقى  
الشلة عاملين ايه ويحكى لزيزو هو نفسه عامل ايه ويمشى  
على طول .. المشوار بعيد . ساكن فى اكتوبر ويشتغل فى  
اكتوبر .. محاسب فى معرض موبيليا مع انه خريج حقوق  
.. كتير بيحس انه فى غريبه ويسأل نفسه مادام كدة كدة  
مش بعرف اشوف حد .. وكدة كدة نسيت كل اللى كنت  
بحلم بيه .. ايه اللى قعدنى ؟ ليه ماسافرتش ؟

الأيام فى حياته شبه بعضها .. يروح الشغل .. يرجع ..  
بعد شهر يقبض .. مراته تاخذ القبض وتديله المصروف ..  
ممكن بس اللى يكون بيكسر الملل فى حياته ان ابنه يعيى  
او يتعب .. يبحب ابنه بجنون ويخاف عليه من اى حاجة  
.. وكمان يخاف ويترعب من المستقبل بتاعه .. لما يشوف  
العيال الصغيرة فى الشارع بتشتتم وتسب يتجنن .. طب  
هعمل ايه عشان الواد ميقاش صايح كدة .. فضل يوم  
كامل واقف قدام مدرسة خاصة عشان يشوف العيال فى  
المدرسة دى محترمين وكويسين والا لأ .. واتصدم ومشى .  
بقاله شهرين هيتجنن .. فيه بوادر كرش طالعله هيجننه  
مش عارف يعمل ايه ؟ .. كل مايقعد شوية على مكتبه

يتجنن ويقوم .. يتحرك في المكان .. الكرش عامله هسهس في دماغه .. ومراته للأمانه طباحة عظيمة .. هى كمان تخنت اوى بعد الخلفة كل مايصلها يبقى عايز يقولها احنا ماتقناش على كدة .

طب ايه هروح للشلة القديمة والا ايه ؟ الساعة بقت ١١ ونص .. اتأخرت .. انا خلاص هاقعد مش رايح في حته ... وبعدين انهارده الخميس ووراه التزامات زوجية مأجلها بقاله اسبوع .. ايه ده ؟ ... هى بقى اسمها التزامات .. مش كان زمان ده اسمه حب ؟ .. مش هى دى اللى انا وهى فضلنا نحب بعض سنتين وفضلنا نحلم باليوم اللى هيتقفل فيه باب علينا .. خلاص بقت التزامات ؟ .. يانهار اسود .. دى بتزوق .. كدة خلاص انا قاعد مفيش خروج .. احسن برضه . قام ودخل اوضة النوم .

مش عارف ليه دايمًا بيحس ان نور أوضة النوم باهت ومضلم .. جاب اعلى لمبه بتطلع نور ولسه نور الأوضة ضلمة .. مراته كمان عندها نفس الإحساس .. وفي مرة هما الاتنين اتشغلوا اوى وركبهم هسهس ان اللمبة بتطلع صوت .. كان يوم خميس برضه .. فكوا اللمبة وركبوها .. جابوا لمبة الليفنج يجربوها .. وبعدين جربوا لمبة الاوضة نفسها في الليفنج .. وجاب المفكات وفضل طول الليل يفكك في الكهربية وهى معاه .

بيصلها في المرايا الى هى واقفة قصادها عينه بتسألها  
.. لسه الأوضة مضلمة مش كدة ؟ عنيا بتجاوبه .. ايوه  
لسه مضلمة

عينه : طب ليه ؟ تفتكرى ايه السبب ؟

عنيها : مش عارفة

يقوم يلبس هدومة وينزل عشان يروح الهرم ... وهى  
بتختارله هدومه بكل رضا من غير مضايقة .

## .. الساعة ١١ ..

ايهاب .. اصغرهم .. شغال فى الدعاية والإعلان .. واخذ  
كورسات كتير فى الجرافيك وتصميم الديزاين .. واتعلم  
مونتاج كمان .. ونسبيا بيكسب كويس .. بيكسب كتير ..  
بيشتغل بس ... نهاره شغل وليله شغل .. يمكن شوية  
معندهوش وقت يسأل هو سعيد والا لا .. دايم حاسس ان  
فيه حاجة ناقصاه .. بعيدا طبعا عن شعره .. هو اتعود  
من زمان على شكله بالصلعة .. تقريبا اصلح من وهو  
عنده ٢٣ سنة وبقى يكمل الصلعة ويشيل الجناح كمان ..  
بس مش ده اللى ناقصه .. هو بصراحة مايرتبطش عاطفيا  
.. بس خطب ييجى ٥٠٠ مرة وهو متعود دايم يخش على  
العيلة على طول يتقدم ويخطب وبعد كام شهر يفشكل

الخطوبة .. مش عشان لعبي ولا بتاع بنات .. لكن السبب ايه محدش يعرف ؟ .. هو نفسه مش عارف السبب .. وكثير بيسأل .. ايه اللي بيحصل ؟ .. بيحس انها مش فاهماه او مايبحسش انها بتحبه او هى نفسها بتزهق منه ؟ .. جايز ؟ كلامه كله عن شغله .. لأ ياريت ... كلامه كله عن الفنيات الدقيقة فى شغله وعشان كدة محدش يفهمه .. كمان يمكن التكنولوجيا والانترنت مسحوله دماغه .. تحس طول الوقت انه قاعد فى ساير . تقريبا ماييسبش الموبايل لحظة .

من كام يوم موبايلة باظ .. الراجل بتاع الموبايلات قاله ساعة وتعالى خده .. كان هيتجنن فى الساعة دى .. قعد على قهوة واول ماالقهوجى نزله الشاى قام وماشربوش .. اتمشى شوية .. وبعدين قعد على قهوة تانية وعمل نفس اللي عمله تانى .. وعدت الساعة عليه كأنها سنة .. وبعدين راح محل الموبايلات وخذ الموبايل وخذ مع الموبايل روحه اللي كان حاسس انها راحت منه خلاص .. اول ماخرج من المحل عدى موتوسيكل نتشه من اديه والواد الحرامى عمله ( باى باى ) لسه هيشتم الواد مقدرش يمسك نفسه من الضحك .. ضحك كتير اوى ... ضحك ضحك هيسستيرى لحد ماعينه دمعت ... وفجأة افتكر انه بقاله كتير اوى ولا ضحك ولا عينه دمعت . بقاله كتير اوى ولا زعل ولا فرح .. ايموشن الفيس بوك الاصفر هو اللي ساعات بيضحك بداله او بيتسم بداله ... ايموشن الفيس بوك المدور

الاصفر ده هو اللي ساعات بيكشر ويبكى ويدايق ويتكسف بداله .. ولأنه اصلع بقى بيحس كتير وهو باصص فى المراية انه شبه الايموشن وخصوصا لما يلبس نضارة الشمس السوداء اللي اشتراها بفلوس كتير عشان يت رسم بيها قدام العملا بتوعه .

انهارده عنده شغل مهم ورايح يقابل عميل طالب منه شغل فى كافيه فى المعادى الساعة ١٢ .. مستحيل يروح معاد الشلة القديمة .. هو مقرر معندوش اصلا وقت للتفكير ... ركب عريته وانطلق ماتقهمش ايه اللي خلاه عند مفترق الطرق يطلع على طريق الهرم وينسى المعادى .. لما العميل كلمه كنسل وقفل موبايله وسابه فى العريية ونزل ... عشان محدش يطارده بالاتصال وعشان كمان الموبايل الجديد مايتسرقش

## .. الساعة ١١

عاصم .. رغم كل الهموم لسه قادر يحافظ على ضحكته الصافية بتاعة زمان .. لسه ماتغيرش ابن اللذينه .. اقل حاجة تضحكه .. اى مشكله تقابله على طول يرميها فى الزبالة .. اى حاجة هتخليه يفكر او يقلق مايبسبهاش تنخرله فى دماغه على طول يرميها فى الزبالة .. بس لانه متعود ودايما جاهز يرمى اى حاجة فى الزبالة فى يوم نسي ورمى كل احلامه . لما افكرها فى يوم وهو ماشى ، ابتسم

وضحك وكمل مَشى عادى .. لما قامت الثورة كان خايف على صحابه اللى فى الميدان .. كان هيتجنن انه مش عارف يوصلهم .. كان عايز يقولهم ارجعوا .. ثورة ايه وبتاع ايه احنا مالنا .. لما يوم ٢٩ يناير قالوله فى الشغل اقعد فى البيت لحد مانكلمك شتم ولعن فى الثورة والثوار وفى صحابه .. وحبس نفسه فى البيت واكتتب كام يوم .. يوم ١١ فبراير مكانش عارف ايه اللى نزله من البيت وخلاه يجرى على ميدان التحرير ويرسم علم مصر على خده اليمين .. صحابه نفسهم استغربوا .. كان فرحان اوى وقعد ساعتين يرقص فى الميدان .

شغال فى شركة الكهرباء .. من ٢٠١٢ .. موظف حكومة .. (ابناء عاملين ) .. وهو مش بس ابناء عاملين ده يعتبر ابناء واحفاد واعمام عاملين ... العيلة كلها شغالة فى الكهرباء ابوه وامه وخاله وعمه ده حتى ابوه حكاه مرة ان جده كان من اللى الانفار بنوا السد العالى ومتصور مع عبد الحليم حافظ وجمال عبد الناصر .

خاطب بقاله سنة ونص وهيتجوز قريب .. خطيبته شغاله معاه فى شركة الكهرباء برضه ابناء عاملين واهو عشان يضمنوا ان اولادهم واحفادهم هيستلموا اليا من بعدهم .. المشكلة بقى انه مش عارف يحوش .. يدوب يقبض المرتب من هنا ويطيير ف لحظة .. ميزانية الحشيش اللى بيحبيه فى الشهر لوحتها حوالى ٩٠٠ جنيه

الحشيش في حياته مش مجرد حاجة بتسطله وتخليه  
يفصل عن الدنيا وعن المشاكل شوية .. لأ .. الحشيش  
في حياته اكر من كدة بكتير .. زى ماتقول الحشيش في  
حياته هدف وغاية وانتماء .. رحلة بيخوضها كل يوم عشان  
يوصل في نهايتها لَنَفَس السيجارة الجامد اللي هيكتمه  
وبعدين يخرج دخانه بالراحه ويقعد يشوف جماله وهو  
بيختفى زى ما كل حاجة في حياته بالتدريج بتختفى ..  
الحشيش في حياته هو مغامرة كل يوم اللي عشانها بيروح  
الشغل في معاده عشان المرتب مايتخصمش منه فتقل  
كمية الدخان .. يهرب من الكماين فيحس بالسسبنس ..  
يدفع فيه فلوس فيحس ان تعبته في الشغل ماراحش هدر  
.. يشربه في قلب الشارع فيحس انه بيثور على القوانين ..  
يجرب كل يوم ديلر شكل فيحس انه قادر يختار ويميز  
ويجرب .. يتسطل فجسمه يتهد ويتعب وينام من غير  
مايفكر .. كمان سيجارة الحشيش بالنسباله زى بيت العيلة  
الكبير اللي بيتجمع فيه فئات وطبقات المجتمع حوالين  
سيجارة او اتنين يتلفوا بضمير ويتشربوا بمزاج .. في يوم  
من الايام فكر بيطل جاله اكتباب بدأ يفكر في حاجات  
كان نسيها .. بدأ يفكر حاجات كان مش عايز يفكرها  
.. قعد يومين مايروحش الشغل وفكر يقدم استقالته .  
اتخانق مع مديره وماستحملش اهاتته ليه .. وضرب زميله  
المرتشى من غير حجة او سبب كان هيتجنن .. عنيه  
الى كانت بتحمر بعد مايشرب الحشيش رجعت للونها

الحقيقى وبدأت تشوف الزبالة والوساخة والبيوت الحزينة  
الى قايلة للسقوط .. بدأت تشوف الزحمة وطفح المجارى  
والعيال اللي بتنام ع الرصيف وتحت الكبارى .. عنيه بدأت  
تشوف التراب ودخان المصانع والشحاتين وقطاع الطرق  
وتشوف الهم اللي راسم ملامح الناس .. بدأ كمان يسمع  
صوت الكلاكسات اللي بتزعق والاغانى اللي بتصرخ وبتضرب  
ايقاعها الممل فى الدماغ وقال يعنى بتفوق .. بدا يشم  
ريحة العفن والاحتضار والموت فى كل الشوارع والطرق  
.. كل مكان مقفول تابوت .. كل مكان مفتوح خطر .. كل  
الكلام شتيمة وسب دين .. كل العواطف كره بس .. كل  
كلمة بتتقال حروفها بتعترف ببجاجة انها بتكذب .. تعب  
وزهق مكانش قادر يستحمل لكن فضل مصمم على  
موقفه .. ( مش هيشرب حشيش تانى ) نصجوه يتفسح  
كل يوم ويخرج ويحاول ينبسط وفعلا خرج مع خطيئته  
فى يوم بعد الشغل . راحوا ياكلوا فى مطعم شيك على  
كورنيش النيل .. فضلت ساعة مكشرة ومش مقتنعة ..  
(ليه ندفع كل الفلوس دى فى اكلة اول ماهنزوح هنخرجها فى  
عين الحمام ؟ ) لما حسنت انه اتضايق واتقرف من المعنى  
والتعبير قررت تبتمس وتنسى وتتكلم معاه .. كلمته عن  
الشركة وعن المدير وعن هناع رئيسة القسم وعن سوسن  
الى لسه متعينه جديد .. حكيتله ازاي بهاء زور امضة  
رئيس مجلس الادارة . وفهمته ان مدير الحسابات متفق  
مع بتاع المخازن والمراجعة ويسرق الميزانية .. كلمته عن

باهرالفراش وميشيل المراجع وسميرة السكرتيرة وام عاطف  
وعبد اللطيف واستاذ فهمى .. بعد ماوصلها البيت على  
طول فى اليوم ده جاب صباغ حشيش كبير وشربه لوحده  
.. ومن ساعتها تقريبا يشرب كل يوم .. لكن للأمانه فى  
رمضان بيقلل .

هو متعود كل يوم خميس يسهر مع شلة البسكوته  
.. وشلة البسكوته دى اتجمعت بالصدفة .. واحد جاب  
جاره .. اتنين اتصاحبوا ع القهوة .. واحد جاب المدير  
بتاعه .. راجل كبير جاب جوز بنته .. المهم اتجمعوا ..  
وخصوصا لما لقوا انهم كلهم بتربطهم نفس العلاقة  
والحب لقطعة الطين البنية المسماة بالحشيش .. سماوا  
نفسهم البسكوته برضه على اسم حته حشيش حلوة  
ظهرت فى قبل الثورة بشوية .. كانت ناعمة وقوية ويتلسع  
فى الدماغ وتاخذها وتوديها وتشغلها وتهديها وتعمل احلى  
شغل ضحك وافيهات ورقص وغنى للصبح يامعلم .. هما  
بقالهم كتير بيدوروا على البسكوته دى .. بقالهم شهور  
طويلة فى رحلة بحث عن البسكوته .. اللى يوصى ويجيب  
حته من الاسكندرية وتطلع مقلب .. واللى بينزل الشارع  
المشهور فى ميت عقبة ويلاقى نفسه جايب حته كاوتش ..  
فين وفين كل كام اسبوع لما يوقعوا حته حلوة تعملهم  
الدماغ القديمة .

انهاردة الخميس .. الساعة ١١ وعاصم واقف في ميدان  
روكسى مستنى حته مغربى وصاية هيدفع فيها ضعف  
الثلثن .. حته انما ايه بيقولوا انها حشيش صافى ١٠٠٪ طبيعى  
ولا محقونة ولا مخلوطة بكيميا ( ايوة بقى ياابوالمعاصيم )  
السهرة انهاردة صباحى .

– طب ومعاد الساعة ١٢ ده هعمل فيه ايه ؟

بيسأل نفسه .. هو فاكر كويس ازاي كان بيبيكى زى  
العيال الصغيرة يوم ماعرف بس ان وليد هيسافر .. ومع  
انه متعود يرمى اى حاجة فى الزبالة الا انه عمره مارمى  
زكرياته مع شلته القديمة .. هو فاكر العلقه اللى اتضربها  
عشان ايهاب يوم مالعبوا كورة قدام مسجد النور .. وفاكر  
يوم مازيزو باع موبايله عشان يدفعه جزء من مصاريف  
الكلية بعد ماتخرج عشان ياخذ شهادته قبل مايفقد دفعة  
فى الجيش .. فاكر ايام ما كان بيضحك من غير مايعمل  
دماغ .. وعمره ماهينسى الاسبوع اللى قضاه عند عتابى لما  
ابوه طرده من البيت .

– طب هروح معاد الساعة ١٢ ده والا مش هروح ؟ انا  
عندى معاد مع شلة البسكوته .. والبسكوته المغربى معايا  
يعنى هاتلاقيهم مستنينى من دلوقتى وماينفعش اتأخر  
عليهم ؟

بعد تفكير طويل عاصم يقرر ... انا هروح اقعد مع صحابى القدام ساعة بكتيروا اوى وبعدين اطلع على شلة البسكوته .

بيوقف التاكسى

– هرم ياسطى ؟

سواق التاكسى يوقف يفتح الباب وينطلق على الهرم

## الساعة ١١ ..

مصطفى .... ( الباشمهندس مصطفى ) بقاله كتير مالعيش كورة .. بقاله اكثر من سبع سنين .. من كام يوم شاف عيال بتلعب كورة فى الشارع حاول يعمل زى محمد فؤاد فى اغنية فاكر ك ياناسينى ويهزر معاهم وكدة .. وبصراحة زودها حبتين فاتكعبل فى الكورة والعيال ضحكوا عليه بس اللى أثر فيه فعلا انه نهج جامد ومكانش قادر ياخذ نفسه بعد دقيقة واحدة ..

شغال كويس ومرتبته كبير بس هو هيتجنن ليه مش بيكفيه ؟

مع انه اهلاوى متعصب لكن بطل يشجع كورة من بعد احداث بورسعيد .. حياته ماشية زى مالكتاب بيقول .. يصحى يروح الشغل ويروح بالليل ينام .. يمكن بس يكون بيخرج مع بنات كتير .. شوية كمان برضه ساعات مفيش

مانع لو شرب سيجارة والا اتين حشيش كل كام يوم ..  
يعنى تفاريحي كدة .. ( بس هو منضبط )

ساعات برضه احيانا يزودها حبتين مع البنات اللى مش  
كويسين .. وفي الأعياد ممكن قليل يشرب خمور .. ولسانه  
ينقط سفالة .. ( بس هو فى العموم منضبط ) .

يصحى يروح الشغل بالنهار وبالليل يروح ينام .. وبين  
الشغل والنوم بيعمل كل المويقات والسفالات وقله  
الادبات

من خمس سنين ربي دقنه .. التزم يعنى زى مايقولوا  
.. وبعد عن كل صحابه ولعنهم وحرّم عليهم حياتهم  
كلها .. فرمت الكومبيوتر واشترى خط تليفون جديد .. كسر  
شرايط الكاسيت القديمة والسى دى هات .. وطى صوته ع  
الآخر ورسم ابتسامه جميلة على وشه مكانتش بتفارقه ..  
ابتسامه طول الوقت !! .. وهو بيتكلم وهو ساكت وهو  
يياكل حتى وهو نايم كان بيبقى مبتسم وكان بيوزع دعوات  
بالهداية والتوبة والمغفرة لكل الناس .. وشه نور ولمعت  
فى دماغه زيببة الصلاة .. واشترى سبع جلايب بيض  
يتحرك بيهم .. قرا كتب كتير وبدا ينشر رسالته للناس  
بالحسنى .. لأبوه ولأمه وللجيران وللصحاب .. ( وكان دايم  
بيبقى مبتسم ! ) الموسيقى حرام . الفن مكروه . الكورة  
تلهى عن ذكر الله . وجه المرأة عورة . الداعية فلان كافر  
والشيخ فلان قديس .. ولما كان حد يسأله ليه ؟ .. واياه

دليلك ؟ .. او مثلا يقولوله العقل يقول كدة ؟ .. ( كان يتسم ابتسامته الجميلة ويدعى لى يسأله ان ربنا يهديه ويمشى بهدوء وادب ) وكل يوم قبل ماينام كان يعيط ( وبرضه على وشه ابتسامه ) عشان كان حاسس ان كل الناس اللى بيحبهم هيخشوا نار جهنم وبئس المصير ... وفضل كدة حوالي ٦ شهور لحد ما في يوم دخل اوضته وحبس نفسه فيها يومين وخرج بعدها مسقط البنطلون ومن غير دقن .. ولحد دلوقتى محدش عارف هو ربي دقنه ليه او شالها ليه ؟

بس هو دايمًا من وقت للتاني بيقوم من النوم الصبح يقرر انه يرجع تاني زى ماكان .. لكن وهو راجع بالليل ينام بيكون نسي .. هو لسه شايف برضه ان الموسيقى والفن حرام وشايف برضه ان حاجات كتير في الدنيا حرام .. يمكن اصلا تكون كل حاجة حرام .. بس هو بالنسباليه هيعمل كل الحاجات الحرام دي عادى لانه خلاص سلم بانه ( زنديق !! )

ساعات بالليل يبكي على حاله .. يقف قدام المراية ويلعن وشه وشكله ويشوف نفسه الشيطان ويحس ان باب التوبة اتقفل .. هو مصدق نفسه اوى انه في الـ ٦ شهور اللى عدوا عليه وهو مبتسم كان عايش في الجنه وانه عمل زى ابليس رفض السجود واتطرد ومالهوش رجوع تاني .. من كتر مايكلم بنات شمال ويمشى مع بنات شمال بدا يحس ان اليمين اختفى . وعشان كدة مش ناوى يتجوز

.. وبيزيد من نيته انه مش هيتجوز انه خايف لو اتجوز  
وخلف يخلف بنت تطلع شمال .

في يوم كان ماشى استنجدت بيه ست كبيرة عجوزة اوى  
عشان تتسند عليه .. سندها ومشى بيها حبه حلوين ..  
وفضل يتكلم معاها طول الطريق .. هي بتيجى من مدينة  
السلام كل يوم عشان تقف على طاسة الطعمية اللى على  
ناصية شارع المدرسة في غمرة .. طردوها من بيتها القديم  
في غمرة من يبجي سنتين وراحت قعدت مع بنتها المطلقة  
في السلام .. وبتيجى كل يوم من السلام لغمرة عشان  
الناس هنا عارفها وساعات بيعدى ناس ربنا يباركلهم  
بيمدوا اديهم في اللى فيه النصيب ويدوها اى حاجة ...  
ولو محدش اداها حاجة هي راضية ... ورغم التهابات  
الركب والمفاصل بس هي راضية .. ( رجلى كل يوم بتنقح  
عليه .. بس بسكتها بالترومايسين ويقولها استحملى احسن  
لو وقفتى كل حاجة هتقف .. اول ماقولها كدة بتسكت  
وتهدى وتستحمل )

هو : طب وليه بنتك ماتجيش هيه وتبيع الطعمية  
للناس

الست العجوزة : بتيجى ساعات بس اصل انهارة  
وراها شغل كثير

هو : هي بتشتغل ايه ؟

الست العجوزة : كل حاجة .. تمسح سلالم .. تنفض  
سجاجيد .. تلف الصبح على كام بيت كدة تجيب للناس  
الطلبات من السوق .. وربنا بيكرم .

هو : مالكيش اولاد رجاله ؟

الست العجوزة : كان عندى ياسر بس ربنا اختاره وخده  
عنده من شهرين .. هو اللى كنت بتسند عليه كل يوم  
وانا ماشية الطريق الطويل ده .

هو : كان بيشتغل معاكى ؟

الست العجوزة : لأ .. كان بيوصلنى ويروح يلعب مع  
العيال فى الشارع

هو : كان صغير ؟

الست العجوزة : كان صغير وكبير .. كان جسمه بيكبر  
بس عقله لأ .

هو : معاق ذهنيا ؟

الست العجوزة : يقولوا كدة اه ... عاش فى حضنى  
عشرين سنة بس كان زى ما هو عقله واقف عند الخمس  
سنين .. لما خلفته وفهمت اللى عنده اتمنيت انه يموت  
... وبعدين حبيته .. بس كنت شايله همه .. كنت خايفة  
عليه احسن لو جوالى حاجة هو مش هيعرف يعيش ..  
مكانش له سند غيرى .. انا كنت فاهمه كدة .. لما كبرت  
اوى كدة والسنين لطشت فيه زى مانت شايف كدة ..

عرفت ان انا اللى كنت بتتسد عليه . يمكن لو كان عاقل  
مكانش سندنى فى اواخر ايامى  
هو : ربنا يديكى طولة العمر  
الست العجوزة : طولة العمر اكر من كدة .. ده العمر  
زاد وبوخ وبقى دمه ثقيل .

هو مش عارف ليه ميينساش اليوم ده .. وتحديددا  
ميينساش لما الست العجوزة دى كلمته عن ان ليها مكان  
محجوز فى الجنة  
سألها .. انت بتصلى يا حاجة ؟

جاوبته .. من كام سنة ولاد الحلال حاولوا يحفظونى  
الفاتحة بس كانت صعبة ماعرفتش احفظها .. حفظت قل  
هو الله احد .. وبقولها كل يوم اول ماصحى وكل مااسمع  
صوت الاذان

ضحك وكان الصوت فى سره بيقول

– وعايضة تخشى الجنة !!!?

– بقولك مكاني محجوز .. انا شوفته .

لما ردت عليه كان هيتجنن .. هو فعلا مانطقش باللى فى  
سره .. طب ازاي هى سمعته ؟

واللى كان هيجننه انها طول الطريق اللى مشيه معاها  
وهو ساندها كانت مبتسمه بس ابتسامه ليها شكل تانى غير

الابتسامة اللى فضلت على وشه لمدة ٦ شهور زمان من خمس سنين ... اول ماوصلت دعيتله ربنا يكرمه .. قام هو مد ايده فى جيبه واداهها عشرين جنيه .. رفضت تاخدهم بس هو اتحايل عليها وحلف ... ومشى .... بعد ربع ساعة ادايق قوى انه اداها حسنة .. كان حاسس انه مكانش ينفع يعمل كدة .. ازاي يعمل كدة وهو .... ( الشيطان ) ... فى نفس اليوم اول ماراح الشغل ادوله مكافئة كبيرة عشرين الف جنيه ... كان هيتجنن .. بعدها بكام يوم راح عند فرشة الطعمية بتاعة الست عشان يديها فلوس تانى وعشان تدعيله تانى مالقاش الفرشة والناس قالوله انها ماتت ... فهم على طول انها مكاتش حقيقة .. دى كانت رسالة من ربنا .. ملاك ظهرله عشان ينورله الطريق .. لكن لما بص كويس لقى مكان فرشة الست بقعة كبيرة سودة على الارض من كتر الزيت اللى كانت بتقلى بيه الطعمية طول سنين عمرها ... مكاتش معجزة .. كانت حقيقة .

الجنة والنار عاملينله قلق فى دماغه .. الموت والحياة شاغلينه طول الوقت .. ساعات لما يقعد مع نفسه ويسألها ويواجهها بيلاقى انه بيعاند مع نفسه او بمعنى جريئ شوية بيعاند حبيبه اللى محبش حد قد ماجبه و كان نفسه دايمًا بيعتله ملاك يقوله ويرسيه ويدله ويطنه ان الحب متبادل .. طول الوقت يهرب مالتفكير .. بيعاقب نفسه فى بعده وفى محاولته طول الوقت انه مايقربش .. هو

عارف انه مش لاقى الطريق .. عارف ان كل اللى فات كان غلط .. ( كله ) وعارف ان كل اللى جاى كمان غلط .

زمان اوى حلم يلعب كورة .. وفي الجامعة كان دايمًا يفوز بجائزة احسن ممثل في فريق التمثيل .. كان كمان اشطر من زيزو اللى لسه لحد دلوقتى بيحاول يكمل في رحلة الفن اللى اتوييسها مش عايز يوصل .... كمان كان بيكتب اغاني وبعد سعى كتير نزلته اغنية كسرت الدنيا من ٧ سنين في البوم النجم الكبير

انهاردة الخميس .. الساعة ١١ ... كان بيوصل ( سارة ) لبيتها في فيصل .. لسه عارفها من اسبوع .. معدة برامج شاطرة اوى ... انهاردة قرر يحطها في اختبار الادب .. رصلها كل قواميس الشمال مفهمتش .. شغل عنيه بكل نظرات الشمال مفهمتش .. لمح .. قلقته .. تبجح .. غضبت .. نزلها .. انبسط ( وكان بقاله كتير مانبسطش كدة ) ... اتحرك ناحية الهرم وكان في دماغه بداية مطلع لاغنية جديدة هيكتبها .

## الساعة ١١ .

زیزو ... محمود عبد العزيز ... ٣١ ديسمبر ١٩٩٩ .. كان يوم احتفالية الألفية الجديدة ... كان العالم كله يحتفل .. التليفزيون المصرى كان يبث احتفالات كل دول العالم بث مباشر .. وكانوا يقولوا ان اللى عايشين دول محظوظين لأنهم هيعيشوا الفيتين ... وبعدين من اول ماتولد وهو بيسمع عن سنة ٢٠٠٠ .. وعن النقلة والحضارة والتكنولوجيا اللى مستتية العالم سنة ٢٠٠٠ .. كان عنده ساعتها ١٤ سنة .. هو فاكر كويس انه الساعة ١٢ بالدقيقة وفي اللحظة الحاسمة اللى هنتقل فيها وهنتقل فيها العالم لألفية جديدة طلح فوق السطوح .. واول ما إنطفى النور ... بص للسما وللنجوم وقال ( يارب نفسى ابقى حاجة كبيرة ... نفسى مبقاش مجرد انسان عادى ... نفسى انجح واكبر وأغير فى الناس شئ ... يارب نفسى احلم واتعب وانجح وافشل .. بس فى الاخر احقق كل احلامى ) كان حاسس إن اللحظة دى من عمر الزمن بتاعته هو لوحده .. وان ربنا فى اللحظة دى مش سامع حد غيره

من اول يوم فى الجامعة ماسابش فريق التمثيل .. بدأ فى الأول بدور صغير فى مسرحية فلاحى .. وتوالت الأعمال بعد كدة فى فريق تمثيل الكلية ... هو كان فاكر فى الاول ان فى يوم عرض المسرحية اللى بعملوها بروفات اكثر من ٣ شهور ان اكيد هيبقى فيه مخرج بيتفرج او ممثل هيبقى

العرض ويكتشفه ويأخذه يمثل في التلفزيون وفي السيمبا ..  
لكن مع مرور الوقت فهم ان محدش بيخوف مسرحياته  
في الجامعة غير اهله وصحابه وفرق التمثيل الثانية الى  
بتنافس في باقي الكليات ..

اكتشف من زمان اوى ان المشوار طويل .. وان رحلة  
بحته عن حلمه هتطول .. مش بس كدة ده ممكن السنين  
تعدى وفي الآخر مايوصلش لحاجة .. بس هو قرر يخوض  
المغامرة ويدخل الرهان .. هو قرر من زمان اوى إنه  
هيلعب الجيم ويا إما هيكسب وييقى حاجة .. يا إما  
هيفخس وساعتها هتبقى الخسارة كبيرة .. هتبقى خسارة  
عمر وسنين ومشوار وحلم مفارقهوش في لحظة .. حلم  
هو قرر انه ممكن يضحي بكل حاجة وكل حياة طبيعية  
ممكن يعيشها عشان يوصله .

قعد ٧ سنين في الكلية .. ولو سألته هيقولك انه  
مش ندمان على اى سنة سقطها .. رأيته ان مفيش سنين  
بتروح من عمر الانسان .. لان كل السنين بتتعاش .. كل  
سنة بتعدى عليه بيتعلم فيها حاجة جديدة ويعرف  
ناس جداد وبيخوض تجارب جديدة بيتعلم منها حاجات  
مكانش يعرفها . وهو اصلا في الجامعة عاش حياته بالطول  
والعرض .. صحاب كتير وبروفات مابتخلصش من الساعة  
عشرة الصبح للساعة ٧ بالليل وبعدين يطلع ع القهوة  
يلعب استميشن او يخرج هو وصحابة على كورنيش النيل  
يغنوا ويحكوا للصبح .. كان في ليل الشتا المتلج تلاقيه هو

وصحابه بس اللى ماشيين فى الشارع ولما كانت الدنيا تمطر كان يقلع كل الهدوم اللى متقلاه ويخرج يجرى فى المطرة ويدعى لربنا .. كان طول الوقت حاسس ان الدنيا بتاعته وملكه .. كان كتير جيبه ييقى فاضى بس هو مش هامه هو كدة كدة ملك هيشرب فى القهوة ع النوتة او هيلعب استميشن ع المشاريب وهيكسب ومش هيدفع حاجة .. ولما يبجى وقت المرواح هياخذها مشى لحد البيت .. او هينام ع القهوة لحد معاد البروفة بكرة .. علب السجاير بتاعة صحابة هو بيخلص عليها . شعرة منكوش .. وعادى الجزمة فى رجله مقطوعه وهو ولا كأنه هنا .. كان يمشى فى الشارع يمثل او يغنى بصوت على ولو بيعمل دور تلاقيه ماشى بيراجع كلامه ويحفظه .. الناس كانت تشوفه تقول عليه مجنون .. بس هو عمره مافرقت معاه الناس هتقول عليه ايه .

يوم وقوفه على المسرح عشان يعرض المسرحية كان بيبقى أهم يوم فى حياته كلها .. يلبس هدوم الشخصية ويعمل المكياج ويستنى فتح الستارة وهو بيقرا قرآن .. والستارة بتتفتح ركبه دايمًا بتخبط فى بعضها .. خلاص هيواجه الجمهور .. والجمهور له هيبه وجلال .. وخشبة المسرح مرعبه بحر كبير محدش بينجح فيه غير اللى بيعرفوا يعوموا .. الضوء كله عليك والناس فى الصالة كلها مش شايفين غيرك .. دايمًا والستارة بتتفتح ركبه بتخبط فى بعضها لكن مع اول جملتين يقولهم على المسرح يتحول

وحش وغول قادر يقول الكلمة بقوة .. وقادر يسحر الناس بأدائه .. يبيكهم .. يضحكهم .. يلعب بمشاعرهم ويحركها او يدعوهم للتفكير وللثورة وللحب .. وبعد العرض هيستنى النتيجة وهي فهم من كلام الناس له هو كان كويس والا كان خيبان ... مرتين في حياته نسى الكلام وهو واقف على المسرح منهم مرة لحق نفسه وقال كلام تانى له نفس المعنى وعدت عادى والجمهور ماخذش باله ( اصلا الجمهور عادة يببقاش عارف ايه بالظبط الى مكتوب في النص فيبقى عادى لو لحقت نفسك ) .. والمرة الثانية كانت فضيحة نسى الكلام ومعرفش يقول حاجة والممثل الى قصاده معرشف يلحقه بأى كلام وكانت فضيحة .. المسرح سكت فجاة ٤ ثوانى عدوا في صمت كأنهم ٤ سنين .. ( الثانية على المسرح عمر كبير .. والمشهد الى الجمهور يفصل منه وبيزهق بيعدى على الممثل كانه الف سنة .. بتلاقى الممثل على المسرح لو حس مثلا ان الجمهور مش معاه بيعجز ويشيخ ويعرق ويتمنى المسرح يولع بيه ) المهم انه في ال٤ ثوانى دول الجمهور فهم انه نسى وضحك .. كان يتمنى ان المسرح ينشق ويبلعه .. المخرج فهم ان مفيش فايذة ومحدث هيعرف ينقذ الموقف قام نازل بالأغنية الى المفروض هتنزل بعد مشهدين .. وكملت المسرحية من غير المشهدين الى في نص المسرحية والناس خرجت مش فاهمه حاجة لأن المشهدين دول كان فيهم كل احداث المسرحية .. وفي اليوم ده لما دخل بعد

المسرحية عشان يحيي الجمهور محدش سقفله .. وعشان كدة بيعتبره من اكثر ايام الحزن في حياته .. وهو الممثل اصلا بيمثل ليه غير عشان بعد مايخلص يسمع صوت الجمهور وهو بيسقفله . وف مرة تانية عمره ماهينساها كانت بيمثل دور كوميدى في مسرحية كوميدية .. قعد يعملها بروفات شهرين.. وعلى المسرح كانت الكارثة .. محدش من الجمهور كان بيضحك .. كل مايقول افيه يسمع صوت الصمت .. كل افيه يرميه في المسرحية يرد في وشه .. اتشققلب وعمل اراجوز عشان الناس تضحك وبرضه يسمع صوت الصمت.. خرج عن النص المكتوب وبدأ يقول نكت .. لكن الناس برضه مكاتتش بتضحك .. نزل مساعدين الاخراج في الصاله عشان يضحكوا ويشجعوا الناس انها تضحك لكن الناس صممت على موقفها ومحدش ضحك .. وف لحظة خرج عن النص وبص للناس وهو متعقد وسألهم

— اتتوا ساكتين كدة ليه احنا بنموت على المسرح يا جماعة .. اتتوا واكلمين ايه قبل ماتيجوا ؟

( الناس بدات تضحك )

— مراتكم منكدة عليكموا للدرجادي ؟

( الناس ضحكت اكثر )

— انا فكرت اموت نفسى وانتحر وانا واقف دلوقتي .

( بيعل صوت الضحك اكثر )

— یعنی انتوا موجودین فعلا ؟ ... انا كنت بدأت احس  
انى اتجننت وعینی شایفة ناس فی المسرح لكن هما اصلا  
مش موجودین ؟ یا جماعة ردوا علیه ؟ قلبی بیقوللی ان  
المسرح فاضی وان الناس اللى انا شایفها دی مجرد تھیئات  
. وان انا عندی انفصام

### ( الناس بتضحك ضحك عالی وبتسقف )

— لآ الناس موجودة اهی ... انا سلیم .. انا کویس ..  
انا مش عیان

( بدا یأفور ... والناس بدأت تضحك بهستيرية .. وهو  
یأفور اکثر .. والناس تضحك اکثر .. کمل المسرحية والناس  
بدأت تتجاوب معاها وتضحك .. والمسرحية دی كانت فی  
مهرجان الجامعة واخترعوله جايزة مخصوص علشانه ..  
وهی جايزة اسوأ ممثل ( عشان خرج عن النص )

قعد حياته كلها فی الجامعة نفسه يعمل دور هاملت  
ودایما كان حاسس انه يقدر يعمل ( بس معملهوش )

لما اتخرج من الكلية اتسدت فی وشه كل الطرق ..  
المكان الوحيد اللى بیحتويه ویقدر فيه یمثل ویخرج فيه  
كل موهبته راح خلاص .. الـ ٧ سنين اللى عاشهم فی فريق  
التمثيل خلصوا واتبقاله معركته مع الدنيا . هیمثل فین  
وازای ... بدأ يعمل مسرحيات مع صحابه فی فرق الهواه ..  
ومحدث كان بیتفرج علیها .. راح کاستنج افلام ومسلسلات  
یمكن یختاروه .. حاول یقدم فی معهد الفنون المسرحية

وماتقبلش . اشتغل في ورش مسرحية .. وبالتدريج بدأ يحس بالفشل وخصوصا لما عدى عليه حوالى سنتين كل اللى نجح فيهم انه يعمله .. انه صور اعلان لشيكولاته وكمان ماتكلمش فيه .

ولأنه غاوى شوارع وقهوة .. كان دائما يصطادوه امناء الشرطة بالليل .. ومرتين خدوه على القسم .. ومرة نام جوا الحجز ... مع الوقت شلته وصحابه اللى شاركوه كل احلامه بدأوا بالتدريج ينسحبوا من الطريق واحد ورا التاني .. كل يوم واحد ينسحب .. يسافر . يتجوز . يتوظف .. وهو الوحيد اللى لسه عاوز يكمل .. القهوة وشلة القهوة بتتقص بالتدريج .. كل يوم الشلة تقل .. لحد ما في يوم مالقاش حد قاعد معاه .. ولقى نفسه في رحلته بيكمل لوحده .

كمان لسه فاكر اليوم اللى هي قالتله فيه يا تختارني انا يا تختار انك تكمل في الفن .. كان هيتجنن .. هو بيعشقها .. حبه ليها مش مجرد حب عادى .. هي مش حلم في حياته .. هي جوه الحلم اصلا ... ازاي هي دلوقتي عايزة تقسم الحلم نصين وبتخيره بينها وبين حلمه . مستحيل . كل مستقبل رسمه لحياته كانت هي اللى ملوناه .. كل صورة اتخيلها للعمر اللى جاى هي كانت ملكة الصورة . ازاي هختار او هفاضل .. ازاي وانت اصلا اللى طول الوقت كنتي بتقوليلي لازم تكمل .. ازاي وانت حبتيني من البداية عشان كان عندي حلم .. بعد تفكير مش كتير

مكانتش هي اختياره وسابوا بعض .. ( هي دلوقتي متجوزة ومخلفه ولدين وهو بيدعيها ربنا يسعدنا مع جوزها وف حياتها الجديدة ) .

الحياة بتسود يوم بعد يوم .. السيارة بتتولع من اخر السيارة اللي قبلها .. اخر هدوم اشتراها كانت من سنتين او اكثر .. وكل يوم يتقفش في كمين ويتفتش بشكل مهين .. ولو في يوم مثلا راح يمثل في اعلان او جاله مشهد جملتين في مسلسل بياخد اجره ويقسمه على شهوره العجاف اللي مستنياه .. كل واحد يشوفه يسأله .

— ايه يافنان مش هنشوفك بقى في التليفزيون ؟

— ايه يا نجم يعني سامعين انك بتمثل ومشوفناكش في حاجة ولا حتى في طبق اليوم ؟

— انت لسه يازيزو شاغل نفسك بالفن ده .. ماتشوفك شغلانه تنفعك ؟ تحب اشوفك شغل عندى ؟

الايام بتمر بسرعة .. ومن كتر سرعتها في لحظة بتتكون وتتجمع وتبقى سنين .. تجاعيد في وشه بدأت تضايقه .. شعره بيقع .. وبطنه كل يوم بالليل بتتنفخ من القولون .. طعم الحاجات بيتغير بالتدريج .. المطرة مبقاش بيشوفها خير .. النجوم مبقتش بتسحره .. القمر بقى بيشوفه دايمًا وهو ناقص .. كل طريق ييمشيه ييبقى حاسه من البداية انه مسدود في النهاية بس ييمشيه يمكن ... جايز .

كل حاجة ضاعت .. عليه مشاريب على القهوة بأكثر من سبعين جنية .. يحاول يغيب عن البيت فترات كبيرة لانه دايمما بيبقى خايف مالسؤال ( ايه يابنى مفيش عندك اخبار حلوة ؟ ) كمان بيستخبي من صحابه .. يخاف يشوف في عنيهم نظرة زعل عليه .. هما يبجوه بس نظرة الحب اللي في عنيهم كلها شفقه وحزن .. حزن حقيقى وهو مش ناقص . لكن ساعات يضطر يقابلهم عشان يستلف منهم فلوس .

إمبارح بس اتصل بيه مخرج مساعد في مسلسل كبير لنجم كبير .. المساعد قاله تعرف تيجلى دلوقتى شركة الانتاج .. ف لحظة كان في التاكسى .. وف لحظة كان بينزل مالتاكسى جرى عشان مش معاه فلوس يدفعه اجرة العداد .. ( بس سابه فوق الكرسى عدة موبايله اللي تمنها يجيله بحوالى ٣٠ جنية ) ... دور حلو ٢٢ مشهد كويسين منهم مشهدين جامدين قوى وكمان مع نجم المسلسل .. قراهم قدام المخرج ... فوافق المخرج واداله الدور .

مدير الانتاج : هتاخذ كام ؟

زيزو : ٤٠ الف جنية

مدير الانتاج : لأ ده مستحيل هما ٥٠٠٠ مش اكثر

زيزو : موافق

مدير الانتاج : خد الورق من المخرج المساعد .. بكرة  
تصوير أول مشهد



انهاردة الخميس .. الساعة ١١..  
الدنيا مقلوبة في اللوكيشن .. النجم  
الكبير مصمم انهم يغيروا الممثل  
( زيزو ) بممثل تانى .. يقول  
عليه ضعيف .. بقالهم ٤ ساعات  
بيصوروا المشهد .. من الساعة ٧

لحد دلوقتي ولسه مخلصين تصوير .. بس النجم مش  
عاجبه .. زيزو حفظ الدور كويس .. مثل الدور بحرفنه  
.. بعد اول مرة تصوير سقفوله في اللوكيشن .. ( سقفوله  
وهما مش عارفين انه بقاله اكثر من عشر سنين بيمثل  
ومستنى الفرصه دى .. سقفوله وهما مش عارفين انه من  
امبارح مانمش وفضل متسمر قدام المراية بيمثل المشهد  
فوق المتين مرة .. سقفوله وهما مش عارفين ان النجم  
هيتدايق من تسقيفهم ليه ) .. النجم زعق .. ياريت تصور  
مرة كمان .

النجم كان بقاله كتير متعود على نفسه .. عارف هيقول  
ازاى .. هيكشر ازاى وهيضحك ازاى .. هو اتعود وحافظ  
طريقة ادائه والجمهور كمان عارفين .. بس تمثيل الولد  
صحى جواه موهبه كان راكنها من سنين .. عادوا المشهد  
والنجم ابدع في الاداء .. بس زيزو ابن مسرح هو كمان  
قلب الدنيا

النجم : مرة كمان .. ياريت نصور المشهد مرة كمان

المخرج وافق طبعاً ... صوروا .. والنجم قرر يبدع في  
الاداء اكثر واكثر .. لكن زيزو مسكتش .. المرة الثالثة كانت  
احلى .

عادوا مرة واثنين وثلاثة .. لحد ما في اخر مرة النجم  
كسر الدنيا في الاداء .. لكن كمان زيزو غلبه .

النجم الكبير إعترض

— هاتوا ممثل تاني .. الممثل ده ضعيف .. مش قد  
الدور .

المخرج إتدخل

— الولد جامد يا استاذ فلان ... وعمل دوره كويس  
قوى .

قامت خناقة كبيرة بين النجم وبين المخرج .. وزيزو  
واقف برة اللوكيشن مستنى النتيجة .. هيغيروه والا هيكمل  
... النجم كبير وزيزو طول عمره بيحبه .. ليه بيعمل  
معايها كدة ؟ .. أدخله .. أشرحله .. أقوله اني عايش بقالي  
سنين بمثل لقزاز العرييات وانا ماشى في الشارع واتمنى انه  
يكون كاميرا بتصورني ... أحكيه اني في يوم نزلت في الشارع  
وعملت دور شحات عشان اختبر نفسي بعرف أمثل والا لأ  
.. وجمعت في اليوم ده ١٨٠ جنيه ... أشرحله ازاى ان كل يوم

عيني بتمطر دموع وانا بمثل قصة حياتي لنفسي واتفرج عليها واديني جايزة كبيرة اكبر من جايزة الاوسكار .

فكر كثير يعمل ايه .. المخرج والنجم الكبير بيتخانقوا .. هو لازم يعمل حاجة .. لازم يتدخل .. واخيرا خد القرار .. وإتحرك عشان يلحق معاد الشلة القديمة عند الهرم

## تحت الهرم

يااااه ... من سنين ماتجمعوش ... من سنين مايعرفوش عن بعض حاجة ... حكاياتهم القديمة لسه محفورة جوه قلوبهم ماتناستش .. لكن حياتهم الجديدة بينهم وبين بعض ( غربة ) .. ولان الوشوش متغيرة والكروش خرجت لبرة حبتين والهم علم برتوش بسيطة معلمة تحت عينهم .. ساد صمت بينهم طويل بعد ما الأحضان خدت وقتها ... سكتوا فجأة ... ماتعرفش بقى الكلام خلصان .. والا مليون لدرجه انه خايف ينفجر .. المهم ان السكات طال .. والصمت اتسمع .. طب ايه خلاص اتقابلنا وكفاية كدة نرجع بقى وكل واحد يروح لحاله .

وليد رفض ... يلا بينا نطلع الهرم

زيزو : ايه شقاوة ؟

وليد : ايه يعنى .. كبرنا ع الشقاوة والا ايه ؟

عاصم : ياجدعان ماتهزروش

وليد : مابهزرش ... يلا نطلع الهرم .  
عتاي : احسن نطلع ومانعرفش نزل  
زيزو : انت هتفكر في النزول من دلوقتي .. نطلع الاول  
وبعدين نبقي نشوف هنزل ازاي  
ايهاب : وبعدين لو معرفناش نزل .. نبات فوق لحد  
مايجيبولنا طائرات هليكوبتر تنزلنا  
مصطفى : ياعم احسن واحد فينا يقع تتقطم رقبتة ..  
وبعدين الدنيا ليل ومش هنشوف  
وليد : يلا ياعم منك ليه بلاش جبن .. واحنا من امتي  
كنا بنخاف  
( بَصُوا لِبَعْضِ شَوِيَّةٍ ... عَنِهِمْ ابْتَسَمْتَ لِبَعْضِ ...  
لَمَعْتَ الْفِكْرَةَ فِي عَنِهِمْ ... بَدَأُوا يَطْلَعُوا )

## فوق الهرم



### على المسرح ..

( الديكور عبارة عن  
تكوين هرمى يرمز الى  
قمة الهرم.. الإضاءة  
زرقاء حالمة.. بينما  
تضاء دائرة بيضاء في  
خلفية المسرح كأنها  
القمر .. الممثلين

يوصلون الصعود الى قمه

الديكور .. ثم يبدأ المشهد )

عاصم : شدوا حيلكو يارجاله .

عتابى : ياجدعان كفاية كدة .. ( يوقفهم ) احنا بعدنا

قوى ومش هنعرف نازل

زيزو : ياعم مش مهم نازل المهم نكمل طلوع

عتابى : ايوة هنطلع اكر من كدة ايه تانى ؟

زيزو : هيه صخرة واحدة بس هنطلعها ونبقى في أعلى

مكان

وليد : شايفين البلد من هنا عاملة ازاي ... زى ماتكون  
ماكيت صغير لبلد لسة هتتبنى

ايهاب : بس لو بينها محتاجين نشيل شوية التراب  
اللى هناك دول

مصطفى : ونخفف شوية من الاضاءة العالية اللى فى  
الشمال دى

عاصم : بصوا هناك ... القمر كامل انهارة

ايهاب : ياخسارة ياريتنى كنت جبت معايا الكاميرا

مصطفى : ( ناظرا الى القمر ) بس مش ملاحظين انه  
حزين مبيضحكش

زيزو : لو طلعتنا لأعلى صخرة هاضحك وهايشاورلنا  
كمان

عتاي : اهو انت دايم متفائل كدة

زيزو : يابنى طول ما انت شايف الدنيا حلوة وجميلة  
رينا عمره ما هيكسفك ابدا

وليد : بقولكوا ايه .. مش ملاحظين ان دى اول مرة  
نتجمع فيها من سنين ؟

مصطفى : ياعم اطلع منها انت بس وبطل حسد  
واحنا نفضل متجمعين على طول

وليد : ده على اساس إن أنا اللى مفركم ؟

ايهاب : ياعم الزحمة هي اللي فرقتنا

وليد : فاكرين اخر رحلة طلعتها من ثلاث سنين ؟

زيزو : رحلة ايه ؟

وليد : لما روحنا دريم بارك

عتابي : (يضحك ) ايوة صح

وليد : ( الى مصطفى ) كنت انت معلق حته دين بنت

دايس على وشها قطر

(يضحكون )

مصطفى : انا !!! ... انا مطلعتش معاكوا

ايهاب : اه ياجدعان مطلعش معانا ... ( ثم بXBث )

وهو حد شافوا من ساعة ماركبنا الاوتوبيس غير واحنا

مروحين (يضحكون )

مصطفى : ايوة هنبتي نفتح لبعض وكل واحد فيكوا

انا حافظ تاريخه الاسود حته حته .. فهانلم الليلة بقى

والا ايه ؟

زيزو : انا رأيي يا رجالة نلم الليلة احسن

مصطفى : ايوة كل واحد يركنله في خرابه ويركن على

جنب

زيزو : لا متزودهاش بقى

مصطفى : لا ازودها اوعى ياعم انت وهو

(يدخلون في مشاجرة بمزاح وهم يضحكون )

عتابي : يا جدعان احنا كده هنقع

مصطفى : ( الى زيزو ) وبعدين بقى يا حبيبي تعالى هنا  
... فين البدلة اللي انت خدتها منى من خمس سنين  
وقولتلى هاروح بيها الميتينج بتاع موبينيل ؟

زيزو : بدلة ايه ؟

مصطفى : بدله ايه ايه ؟؟ البدلة البيضة والا مش  
فاكر ؟

زيزو : انت هتمثل يله .. انت مش واخذ منى متين  
جنيه من اربع سنين وقولتلى هارجعهملك بكرة . اصل دول  
فك زنقة .. ومشفتش منك حاجة لحد دلوقتي

ايهاب : ( الى زيزو ) واللهم واخذ منك متين جنيه

زيزو : اه واللهم واخذ منى متين جنيه من اربع سنين

ايهاب : ده واخذ منى انا كمان تلتमित جنيه ... ( ثم الى  
مصطفى ) انت حرامى يله والا ايه ؟

( يمسكونه بمزاح وكأنه لص )

مصطفى : ايه يا جدعان هيه الليلة هتقلب عليه انا  
والا ايه ؟ .. اوعى ياله منك ليه احسن والله

( مصطفى يرفع ايديهم عنه بمزاح .. ويضحكون )

( عتابي ينظر في ساعته )

عتابى : يا جدعان احنا مش اتاخرنا كدة ؟

عاصم : اتاخرنا مين ياعم .. انهاردة الخميس والسهرة  
تحلى

عتابى : ايوة ياعم بس انا غيركوا .. انا ورايا بيت

عاصم : ايوة ياسيدى ... خميس وبيت واسرة يا بختك

عتابى : لا خميس ولا جمعة ... مفيش حاجة جابتنا لورا  
ياخويه غير القر بتاعكوا ده

عاصم : ايه ده هو فيه مشاكل والا ايه ؟ (يضحكون)  
ثم يكمل عاصم كلامه بخبث مازح الى عتابى ( لو فيه  
حاجة فضفض قول

عتابى : اه ... واضح كدة ان الليلة هتقلب عليا .. انا  
هانزل

( عتابى يهم للنزول بينما يمسكه وليد )

وليد : لأ خلى بالك عشان النزول صعب

عتابى : طب حد ييجى ينزل معايا

وليد : مادام كلنا طلعلنا مع بعض يبقى كلنا ننزل مع  
بعض

زيزو : صح كدة ياليدو

عتابى : ماشى ياعم وادى قعدة

مصطفى : يااااااه ..... يالهووى يا جدعان

الجميع : ايه مالك

مصطفى : ياخراي ياجدعان ...لو سجارة من بتوع زمان

عتابي : سجارة ايه ؟

مصطفى : سجارة حشيش

عتابي : حشيش ايه ؟

مصطفى : حشيش ايه ايه ؟!!! ... انت نسيت اننا كنا

مسمينك المدمن

(يضحكون )

عتابي : ياعم الحمد لله .. ربنا تاب عليه

عاصم : ربنا يتوب عليكوا زى ماتاب عليه انا وعتابي

( لم يكن عاصم يريد ان يشرب معهم فهو على لقاء

خاص مع شلة البسكوتة .. وسيشربون فيه الى الصباح

والى ان تعمى اعينهم .. ولهذا قرر عاصم ان يظهر لهم

انه غير مهتم بأمر الحشيش هذا ... فابتعد عنهم

قليلا )

وليد : طب بصراحة كدة ياجدعان محدش مخبي

حته كده والا كدة ..عايزين نعمل دماغ اهرامات ونشوف

الفراغنة كانوا بيفكروا ازاي

زيزو : ياجدعان انا عن نفسى اعرف واحد معاه

الجميع : مين ؟

زیزو : لا مقدرش اقول عليه .. هو كدة كدة هيطلعها  
لوحده

ايهاب : ياعم قول وخلص

زیزو : ياجدعان مقدرش افتن عليه (وهو يشاور على  
عاصم ) هوه كدة كدة هيطلعها لوحده .

**( كان زیزو يدرك ان جيب عاصم لا يخلو ابدا من  
الحشيش )**

مصطفى : عرفته

وليد : وانا كمان عرفته ( عاصم ينظر في المطلق وكأنه  
لا يسمع )

ايهاب : وانا كمان عرفته

( يقترب منه وليد )

وليد : ماتعرفش حد نقضى منه ؟

عاصم : مانت عارف ياوليد انا مبطل من زمان

( ينظر عاصم في عين وليد وفي عين الآخرين فيدرك انه  
لن يستطيع الفرار بالسكوته .. ويدرك ان عليه ان يستسلم  
ويخرج قطعة الحشيش من جيبه )

عاصم : طب بصوا ياجماعة انا معايا حتة بس هي  
بتاعة ابن خالتي . عنده مشروع تخرج في كلية علوم  
وبيعمل عليها ابحاث و ....

( يقاطعه وليد بينما ينزع من يده قطعة الحشيش )

وليد : اعتبرنا يا سيدى فى كلية العلوم

مصطفى : انا شارب

زيزو : وانا لافف

ايهاب : مفيش بفرة

وليد : معايا بفرة بمشيش من غيرها .

السحت : هات الف

ايهاب : لا هات انا

(يتشاجرون على من يلف سيجارة الحشيش .. يتجادبونها

.. يتخاطفونها .. فتقع .. وهنا تكون الصدمة بالنسبة

للجميع فيصرخون )

الجميع : لا!!!!!!!!!!!!!!!!!!!!

( ويسود الصمت ... وبينما ينظر الجميع الى الصخور

التي بأسفلهم عليهم يرونها يتقدم اليهم عاصم ليسأل

بهدوء )

عاصم : هى وقعت ؟!!!!

زيزو : ( الى الجميع ) طب وهنعمل ايه دلوقتى ؟

عاصم : تعملوا ايه فى ايه ؟ .... هي .... وقعت ؟!!!!

وليد : حد ينزل يجيبها ... اكيد هتلاقوها ع الصخرة  
اللى تحتينا دى على طول

عاصم : يا وليد رد عليه .. حته الحشيش .... وقعت ؟

ايهاب : ( الى وليد ) صخرة ايه ياعم انت مش شايف  
الدنيا تحت كحلة ازاي

عاصم : ( فى حسرة ) تبقى وقعت

ايهاب : ( لمصطفى ) ياريتك انت اللى وقعت مكانها  
ياخى

مصطفى : طب والعمل ؟

زيزو : خلاص ياجدعان عادى عادى ... ولا كأنها كانت  
موجودة

مصطفى : طب ما احنا عايزين نعمل دماغ

زيزو : طب مانعمل دماغ من غيرها ... واحنا هانغلب  
ياعنى يارجاله ؟.

مصطفى : ( الى زيزو فى فرحة شديدة ) يبقى انت معاك  
حته تانيه

وليد : ( يغنى على لحن اغنية ( فيها حاجة حلوة ) فيها  
حته تانيه . حته تانية منك

( ييدا زيزو فى لف الهواء تماما مثلما يلف الحشيش )

زيزو : الاقثى ولاعة يارجاله ؟ ....(يشعلون ولاعاتهم  
فيجدون سيجارة وهميه فى يد زيزو ...فيشعرون بخيبة  
الامل ) ( زيزو يستدعى من الهواء ولاعة وهميه ويشعل  
بها السيجارة الغير موجودة وياخذ نفس وهمى ) ياسلام  
...مين ياخذ يجرب ؟ ( ثم الى مصطفى ) ماتاخذ تجرب  
منى السيجارة دى يا صاحبي ؟

مصطفى : لاه دى هربت منك ع الاخر

زيزو : ياعم امسك بس خلى بالك على نفسك علشان  
دى اصطفة جامدة وانت اصلا مش قدها

مصطفى : امسك ايه يازيزو ؟؟ انت بتهرج يا اخى ؟؟

وليد : متجرب يامصطفى ما يمكن تطلع حلوة ( مصطفى  
ياخذ الوهم من زيزو ويشرب نفس وهمى فتعجبه اللعبة  
ويشعر انه بدأ يتسطل )

مصطفى : يالهووى ياجدعان .. ده احنا هنتشتتق  
ياجدعان .. الحته دى دماغها عاليه اوى (يتبادلون السيجارة  
الوهمية مع بعضهم البعض)

زيزو : اذا كان كده يبقى الف لكوا حته تانية

عاصم : طب وحياة ابوك يازيزو .. ابقى شيل حته  
لابن خالتى مكان اللى وقعت (يضحكون )

ايهاب : ( وقد اعجبته اللعبة ) طب بقولك ايه يازيزو  
ماتجيب نفس ؟

( ايهاب ياخذ السيجارة الوهمية ويأخذ نفس عميق  
يجعله يشعر ان راسه تحلق في السماء )

ايهاب : يا جماعة .. انا حاسس ان شعري بيطلع

زيزو : ( يضحكون .. بينما ينظر زيزو الى صلعة ايهاب  
ويبتسم ) بيطلع ايه بس يا عم ايهاب

ايهاب : بيطلع برا حياتي

( يسود الضحك .. بين الأصدقاء .. إذ يبدو ان تلك  
السيجارة الوهمية قد اسطلتهم بصدق )

ايهاب : ( يمد يده الى وليد بالسيجارة الغير موجودة )  
صباح الفل يا يا صاحبي

وليد : لا معلش اصلى بطلت

ايهاب : يا جدع امسك بس

وليد : لا ده واضح ان انا هزأت نفسي معاكوا

( يضحكون و يعلو صوت الضحك اكثر واكثر )

عتابي : طب بقولكوا ايه .. ماتجيبوا نفس

ايهاب : لأ .. انت مش قولت انك بطلت

عتابي : ياسيدي عايز اجر ب .. وبعدين القعدة حلوة  
وكلنا مبسوطين انهاردة .

زيزو : ياعم اديله الخير كتير

( عتابى يأخذ السيجارة الوهمية ويسحب منها نفسا عميقا .. يأخذ منها نفسا يغزوه بالكامل .. نفسا يتجول في قلبه وفي عقله .. يشعر لأول مرة منذ وقت بعيد انه يتخلص من كل توتره وانشغاله وتفكيره .. يسرى دخان السيجارة التى ليس لها وجود بداخله ليزيل كل ما يزحم راسه وقلبه ونفسه منذ ان اتى الى الهرم وقبل ان ياتي .. يشعر براحة غريبة لم يشعر بها منذ وقت طويل ... يهدأ .. يستكين .. يعبث في اوراق ايامه القديمة بينما يلاحظ بقية الأصدقاء وجه عتابى الذى تغير ولأول مرة منذ ان تقابلوا يتسم ابتسامة حقيقية )

مصطفى : ايوة ياعم عتابى .

( وكأنها كانت اللحظة التى ينتظرون فيها ان ينفجروا .. فيسارعون بالغناء ( وتاهت بينا تاهت .. ليالينا ليالينا )

عتابى : ياجدعان ( عتابى يصرخ وعينه تنطق بجمال اللحظة بل ربما كان جسده ينتفض من القشعة التى تسرى في وجدانه .. ويكمل ) الحته دى دماغها عاليه قوى

عاصم : ايه ياعم روحت فين ؟

عتابى : رجعت شويه لأيام زمان

عاصم : أحلى أيام ... أيام الجامعة

عتابى : لأ ابعد من كدة شويه .... أيام ما كنت لسة عيل صغير مش عارف حاجة ومش فاهم حاجة ... كان

كل اللي شاغل دماغى انى أجر فسبة ساعة من الراجل اللي  
قدام المدرسة

زيزو : فاكرين الاتارى ابو ايد واحدة

ايهاب : بتاع الطيارات

زيزو : اه ..ابويه يوم ماجابهولى حصل انقلاب فى  
الشارع كله

عاصم : وسوبر ماريو

مصطفى : والسيجا

وليد : فاكرين توم  
وجيرى ؟



زيزو : ومازنجر وكابتن ماجد

وليد : انا كنت بحب وليد وياسين

زيزو : وانا كمان

ايهاب : لسه فاكر لما كنا بنقعد نتلم قدام التلفزيون  
الساعة تمانيه عشان تتفرج ع المسلسل العربى

عتابى : طب فاكرين الحلقة الأخيرة من ذئاب الجبل ؟

زيزو : والا يوم ما اتعرض فيلم الطريق الى إيلات فى  
التلفزيون مصر كلها كانت قاعدة فى البيت بتتفرج عليه

السحت : وماتش السوبر بتاع الاهلى والزمالك اللي  
ايمن منصور جاب فيه جون من نص الملعب

وليد : طب فاكرين برنامج مواقف وطرائف ؟

عاصم : اه انا فاكراه

عتابي : لاً .. ده كان برنامج ايه ؟

وليد : مواقف وطرائف .. مش فاكرين .. مواقف وطرائف  
وعجائب ونوادر وبوعدكم كلها جديدة بطير اجيهاالكوا من  
كل انحاء الدنيا ومش اجييلكوا معايا منال رزق .. و ..  
يسرى غراب .. و .. جلال علام .

( يعلوا صوت الضحك اكثر )

عاصم : طب فاكرين اعلانات زمان

وليد : اه اعلان طاهر القويرى بتاع الشمعدان .. الراجل  
الاقرع ده اللى كان بيوزع هدايا

عاصم : والناموس عمال يقرص ياخوية .. مش عارف  
انام منه ياخوية

زيزو : واديه اديه اديه عزاز عليه

مصطفى : وبستك بستك بستك نو

ايهاب : واجرى بسرعة ياواد يا حسين . تقب وتغطس  
فى دقيقتين

الجميع : ( يكملون الأغنية ) شوفلنا ريرى يتباع فين ..  
هاتلنا منه باكوا واتنين

( يعلوا صوت غنائهم اكثر ويضحكون بأعلى ما يمكن  
لقلوبهم ان تضحك .. وعادة أيضا ما يصفق ويصفر  
جمهور المسرح في تلك اللحظة )

### خارج المسرح .....

رجعوا تانى لأيامهم القديمة .. افتكروا اللى عمرهم  
مانسيوه فى يوم .. لكن كانوا تايهين عنه ومش لاقينه ..  
افتكروا زكرياتهم وأحلامهم وتفاصيلهم الجميلة ومواقف  
الجدعنه وخرافات الجامعة والرحلات والبنات والضحكة  
اللى كان صوتها بيعدى كل الاسوار والسدود .

وليد .. نسى فى لحظة سنين الغربة اللى عدت عليه  
.. رجع تانى لقبل أيام السفر .. رجع لقبل أيام التوهة  
والشغل اللى مايخلص .. رجع لأيام جيوبه النضيفة  
قبل ما يطلع رحلة تجميع الفلوس اللى بيها كان فاهم  
انه هيقدر يعيش سعيد .. رجع لأيامه السعيدة .. فكر  
مايسافرش تانى او على الأقل يأجل سفره شوية .

عتابى .. افتكروا رحلة حياته .. ومن كتر ما فتكر تفاصيل  
كثير حس فى وسط ضحكه انه عجز وانه خلاص مستنى  
الموت .. كان فاكروا فى اللحظة دى انه شيخ عنده اكثر من  
ييجى سبعين سنة

ايهاب .. كان بقاله كثير محسش .. حس فجأة انه حس  
.. جاله شعور انه عنده شعور .. وشه نور واحمر وهو

الى كان دايمًا وشه اصفر زى الإيموشن .. الإيموشن بدا  
يطلع له صوت ويتحرك ويضحك ويغنى

مصطفى .. هو مش عارف ليه وهو بيضحك عينه  
لقطت القمر وشافته ... حس فجأة بشئ غريب وشاف  
قدام عينه صورة البنت اللى لسه عارفها وكان بيوصلها من  
شوية .. حس انها غير كل البنات الشمال اللى عرفهم فى  
حياته .. وهو مش عارف ليه حس انه مش هيبقى هو  
كمان شمال .. وفى وسط ضحكه قال .... ( يارب )


عاصم .. اتجنن .. ازاي اتسطل وعمل دماغ مع انه  
مشربش حاجة والدخان كان بس هوا نضيف احتل صدره  
... والغريب انه للحظة بدا يدور فى كتاب حياته على كل  
الحاجات اللى كان رماها فى الزبالة .

زيزو .. مفهمش ليه جاله احساس قوى .. ان النجم  
الكبير هيوافق عليه .. وانه هيكمل المسلسل والنجم  
هيجبه وهيمثل معاه تانى وتالت ... فى وسط ضحكه  
ابتسم ابتسامة حلم وحب وفرحة وامل . عينه لمعت  
وبص للسما لقي النجوم بتلمع زى عينه .

( مكانوش مصدقين للحظة الغريبة اللى عدت عليهم  
واللى هيه فعلا مش اكر من لحظة ... عتابى سألهم )

— كبرنا؟؟!!

## على المسرح .....



( بعد ان علت اصوات ضحكاتهم لمعت اعينهم  
بدموع الحلم والهم .. والعمر المنتظر .. والذكريات التي  
عبرت على اجسادهم وحجزت اماكنها المميزة في قلوبهم )

عتابي : كبرنا !!؟؟

ايهاب : لأمش قوى

عتابي : لأكبرنا

ايهاب : لما احنا كبرنا امال الشباب يبقوا مين ؟

عتابی : مش عارف .

عاصم : احنا الشباب يابنى

عتابی : امال انا حاسس ليه انى كبرت

مصطفى : انا كمان حاسس انى كبرت .....سبعة وعشرين

سنه وكبرت

عتابی : الحياة كبرتنا ؟

زيزو : احنا كبرنا عشان صدقنا اننا كبرنا ... انما احنا

لسه صغيرين ولسه شباب

عتابی : طب ليه مابقيناش زى زمان ؟

وليد : هو إحنا بنضعف والا بنقوى ؟

ايهاب : بنحلم والامات الحلم جوانا ؟

مصطفى : لسه فيه امل .. والا الامل سابنا وراح ع

الشط التانى ؟

زيزو : لسه بنفرح ولسه بنحلم ولسه الامل فارد

جناحاته وطاير بينا

عتابی : طب ازاي مش حاسين .. ماهو إحنا لو طايرين

هنعرف .. على الأقل هنخبط فى جناح عصفورة .. أو حتى

هنتكعبل فى غصن شجرة عاليه ومادة فروعها فى كل مكان

عاصم : طب مش جايز نكون طايرين فعلا بس دخلنا

فى سحابة كبيرة .. خليتنا نتوه من بعض ومانشوفش كويس

عتابى : بس اظاهر بقى انها سحابة كبيرة .. وباردة ..  
ومش عايضة تخلص

زيزو : طب مش جايز تخبط فيها سحابة دافية ..  
وفجأة تنزل مطرة تشيل التراب وتطهر الدنيا

عتابى : وبعدين معاكوا بقى .... هترجعوا الواحد يحلم  
تانى والا إيه

زيزو : محدش فينا بطل يحلم عشان يرجع يحلم من  
تانى ... احلامنا لسه قدام عيننا

عتابى : يبقى عيننا مبقتش بتشوف كويس

وليد : مايمكن انت اللى باصص الناحية الثانية

عتابى : ياجدعان ... إحنا اتسلطنا بجد

زيزو : احنا بنفوق .. بنفوق .. لازم نصدق ان احنا لسه  
صغيرين وان إحنا لسه شباب

عتابى : انا لازم امشى

زيزو : ولازم مانمشيش .. ولازم مانهريش .. ولازم نصدق  
ان احنا كبرنا بس يدوب اللى يخلينا نقدر نحقق احلامنا  
ومستقبلنا .

عتابى : تفتكروا ياعنى لسة ممكن ؟

مصطفى : انت حاسس بايه ؟

عتابى : مش عارف .. حاسس انى عايز اطلع فوق على  
أعلى صخرة

زيزو : كلنا هنطلع معاك وهانشبك لبعض

عاصم : بس كدة فيه واحد هيفضل لوحده تحت

زيزو : من فوق كلنا هنشده ونطلعه

عتابى : طب يلا بينا ... إحنا مستنيين ايه ؟

زيزو : احنا مش مستنيين يا خوية انت اللى مستنى


( يتماسكون بقوة ... كل واحد منهم يمسك بيد الآخر

ويهمون للصعود الى اعلى )

## إِظْلَام



صورقي انا ووليد .. ( سيلفي ) في البنزينة اللي  
دخلناها عشان نفول العربية قبل ما نطلع الرحلة .



# الصوره السابعه

## وفي العريية ..

كنا اتحايلنا على الباقيين انهم يطلعوا معانا لكن  
مارضيوش .. قولنا لهم ان دي رحلة العمر .. اجمل رحلة  
هنطلعها في حياتنا .. اصلا هي رحلة حياتنا .. لكن هما  
ماقتنعوش وفضلوا قاعدين على القهوة .

يمكن انا كمان مكنتش عايز اطلع لكن وليد اقنعني  
واتحايل عليه لحد ما وافقت .. وفي العريية اتكلمنا وحكينا  
وأفكرنا حاجات كثير عدت علينا .. افكرنا ذكرياتنا  
وطفولوتنا وأيامنا الجميلة .. والأيام الثانية اللي مش  
هنقدر ننساها من كتر أساوتها .

في أول الطريق رجعنا لأيامنا الاولى .. افكرنا العيلة  
واللمة وكحك العيد والعيدية والمراجيح وجدودنا اللي  
يدوب صورتهم بنفكرها بالعافية .. افكرنا البلى والكورة

وغطيان الحاجة الساقعة .. وليد حكالى عن ايام ما كان  
يسافر للفيوم في اجازة اخر السنة ويوت الطين واللمة  
حوالين النار في الغيط بالليل والدرة اللى بيتشوى على  
مهله فوق النار الهادية وانا كمان حكيتله على اجمل  
اسبوع كنت بقضيه في بلدنا في الشرقية في اجازة الصيف  
ونسهر احنا الولاد حوالين اهلينا الكبار يحكوا ويضحكوا  
للفجر .. كنا نقعد قدام بيت جدى في شارع العيلة .. كل  
البيوت ابوابها مفتوحة ورغم ان النور بالليل في البلد عندنا



كان بيتقطع لكن لمبة الجاز كانت تنور قعدتنا  
وتسحرها بلون اصفر يلمع زى الذهب .. كان  
النور اللى خارج من قلوبهم يغلب نور النهار  
.. والنجوم في السما تسهر معانا .. كل الكلام  
كان سحر .. والسهرة تطول لحد الفجر ومن  
كثر حلاوتها يسهر معانا الناموس ويأكد  
وجوده بقرصه لينا ... اه لحقت جدوى  
وسمعت حكاياتهم .. جدتى حكيتلى مرة  
ازاى زمان في البلد وهى لسه صغيرة مكانش

فيه غير راديو واحد بس موجود في بيت العمدة ولما كان  
عبد الوهاب يغنى في الراديو كانوا اهل البلد يتجمعوا  
قصاد بيت العمدة عشان يسمعه .. والعمدة مكانش  
ظالم ولا مفترى وكانوا اهل البلد يحبوه.... والصبح كنا  
نلعب احنا العيال في الجرن (والجرن هو ارض واسعة  
قدام البيوت ) كنا نلعب (جاى) والسبع بلاطات ..

والاستغماية .. وكهريا .. وولاد خلاني يعوموا في التربة وكنت هموت وانزل معاهم بس اعلانات البلهارسيا في التلفزيون ( بتاعة محمد رضا وعبد السلام محمد ) كانت بتمنعني .. ردموا التربة عندنا في البلد .. بقت طريق اسفلت ... وبيوت الطين بقت عماير كبيرة بالطوب الأحمر والمسلح .. الفلاحين من كتر الضيق راحوا اشتغلوا في المصانع والجرن اتبنى عليه بيت كبير .. ومن بعد موت جدى كل خيلاني قفلوا البيبان على نفسهم .. ولأن الكهرية مابتقطعش سحر لمبة الجاز اختفى والنجوم بطلت تسهر والناموس بقى بيعيش عصر الطوفان من كتر الصواعق اللى ملت البيوت .

وليد : كل حاجة بتتغير .. انت كنت بتشوف كل الحاجات دى سحر لأنك مش عايش معاهم لكن هما لآ .. من حقهم يطوروا نفسهم .



محمود : لسه قدامنا كتر يا وليد ؟

وليد : هو احنا لحقنا ده احنا لسه يدوب متحركين الدنيا ليل وعواميد النور اللى مزروعة يمين وشمال الطريق مش منورة .. لكن هنكمل أكيد .. يمكن فكرت ارجع

لكن ليه؟ ... اكمل .. مين عارف مش جايز في اخر الرحلة اكون مبسوط .. شغلنا موسيقى فيلم سينما براديسو

الإيطالى اللى بيحكى عن حكاية ولد وحبه للسيميا وقصة حبه للراجل العجوز اللى كان بيدور شريط الفيلم فى السيميا ( الفريديو ) . وليد بيغمض عينه .. بيتسم .. بسأله

محمود : انت هتنام والا إيه ؟

وليد : لأ انا بس افكرت حاجة

محمود : ايه ؟

وليد : مش فاكر

ياترى فكر فى ايه لما غمض عينه ؟ .. فكر فى اللى فات والا فكر فى اللى جاى ؟ .. مستقبل والا ماضى ؟ .. ياترى سرح عشان يفكر فى اللى انا فكرت فيه ؟ .. كنت فى نفس اللحظة بفكر أول مرة ادخل السيميا . واول مرة أحب .. وأول بنت اكلمها .. كنت فى الحضانة .. فى يوم معرفش ليه لمست خدها ... تانى يوم اهلها نقلوها فصل تانى ومكنتش فاهم ليه ؟ .. بس حسيت بالذنب رغم انى مكنتش فاهم ايه اللى حصل .. وانا سايق العربية بضحك .. ووليد مغمض عينه ولسه بيتسم .. بيكلمنى .

وليد : عارف انا حاسس ان عمرى اللى فات عشته كله ومبسوط بيه .. يعنى حاسس انى عشت كتير .. مش حاسس زى ما الناس دايمًا بتقول انى اتسرقت .. لأ .. ٣٠ سنة عشتهم بالطول وبالعرض .. فرحت وحننت وبكيت وضحكت وعرفت ناس كتير معظمهم كويسين وطيبين

.. عرفت ناس كثير وقفوا جنبي وساعدوني .. وناس كثير  
حبوني وكنت عارف ومتأكد انهم دعولى انى ابقى حاجة  
كبيرة وانى انجح ... انا مش زعلان خالص على اللى فات ..  
وماتسرفتش .. بس لسه حاسس برضه انى عايز اعيش اللى  
جاي وحاسس انه احلى .

**مع انى عارف وليد كويس وعارف انه عنده هموم  
الدنيا لكن مش عارف ليه دايمما هو سعيد .. ياترى  
كداب ويمثل انه سعيد ولا هو حقيقى .. طب ازاي ؟**

الطريق ضلمه ولولا الكشافات بتاعة العريية مكناش  
شوفنا احنا رايعين فين .. بنسكت كثير .. ( صوت موسيقى  
الفيلم الجميلة عاملة حالة من السكوت والصمت  
الجميل) .. اول ثورة فى حياتى خضتها كانت على مواعيد  
الرجوع بالليل .. كنت دخلت الجامعة .. قولتلهم فى البيت  
انا ارجع براحتى محدش له علاقة بيا .. وأطمنوا انا مش  
بعمل حاجة غلط .. ونجحت الثورة وبقيت حر وكنت  
فرحان .. لكن مرة شوفت حرس الجامعة بيضربوا شباب  
فى الجامعة خفت وعرفت ان حريتى ناقصة لأنى بخاف .

محمود : عارف يا وليد .. ساعات افكر فى الموت وأخاف  
منه .. وساعات من بعد ماعدت الثلاثين يجيلى تفكير انى  
خلاص بدات فى العد التنازلى لحياتى .. وواحدة واحدة  
هعدى نص العمر .. يعنى فاضلى قد اللى عشته وبعد  
كدة ابقى فى سن المعاش واستنى الموت .. لكن اسأل

نفسى اذا كنت انا .. وانا لسه يدوب مكمل نص عمرى  
بسأل نفسى عن الموت امال ابوية وأمى يعملوا ايه ؟ ..  
امال اللى عدى السبعين وعارف انه مش باقيه فى الحياة  
غير كام شهر او كام يوم يعمل ايه ؟ .. عارف هتقوللى  
الأعمار بيد الله .. اكيد طبعا .. لكن ده مايمنعش ابدا انى  
بدأت افكر ساعات فى الموت .

**وليد يضحك ... يمكن هو كمان بدأت رجليه تشد  
عليه .. خلعله كام ضرس .. ولينا صحاب لبسوا نضارات  
.. وصحاب تانيين فى سننا بدأ الشعر الأبيض يكسب  
مساحات بوضع اليد فوق روسهم .. وبدأوا يعملوا  
حساب لطلوع السلم وهما مروحين .. وليد يضحك  
بس جوه ضحكته ريحة حياة .. وكأنه عايز يقوللى لسه  
هنعيش كثير .. ولو حتى كان باقيلنا فى العمر ساعة لازم  
نعيشها .**

وليد : الموت ييجى وقت ماييجى لكن وانا عايش  
ومادام قادر اتنفس وافكر واحب مش هفكر غير فى الحياة.

محمود : تفكر هنتبسط فى الرحلة دى ؟

وليد : اكيد

محمود : نفسى اعرف انت جايب الثقة دى منين

وليد : دى مش ثقة .. ده امل .. وبعدين كفاية ان احنا  
بنحاول .. مش احسن مانفضل قاعدين .. اهو لازم نعمل

حاجة .. لازم حياتنا تتحرك . وإن متحركتش بمزاجها احنا  
هنحركها . نامت نصحيحها .. عطلت نصلحها .. زعلت نغنيها  
ونهزر معاها دي حياتنا يا اخى .. لازم نعيشها وندلعاها .

محمود : انت غريب

وليد : ولا غريب ولا حاجة انا بس بحاول اعيش ..  
خايف اتغفل فى يوم يضيع منى كدة والا كدة .

محمود : انت الأيام بتضيع منك انت كمان ؟

وليد : انا مايبضعش منى غير ايام وسنين بحاول الحق  
نفسى ... عارف فى يوم بصيت كدة لاقتنى حاسبها غلط  
خالص . لاقيت نفسى طول الاسبوع بقعد مستى يوم  
الجمعة عشان الأجازة .. وطول الشهر اقعد مستنى اخره  
عشان القبض .. وابقى نفسى السنة تعدى وتجرى بسرعة  
عشان اخذ الاجازة السنوية والمكافأة .. فجأة فوقت ..  
قولت لأ .. انا ليه بَجَرى حياتى كل ده عشان افوز دايم  
بيوم واحد . الجرى ده كله عشان يوم يبجى وفى الاخر  
يعدى هوا كدة ومحسش بيه .. راجعت نفسى وقولت لأ ..  
اليوم يوم .. يتعاش بكل مافيه . هوه مش محسوب فى  
حياتى .. محسوب فى حياتى والا مش محسوب ؟

محمود : محسوب فى حياتك

وليد : خلاص يبقى هعيشة غصب عنه حتى لو كان  
بلوى الدراع

الموسيقى بتعلا اكثر في اللحظة دي كان فيها ثورة  
وغضب. تانى مرة اثور في حياتي كانت لما سبيت شغلي  
الأولانى عشان المدير كان بيحاول يتحكم فيه .. زعقلته  
قولتله انت مين وعايز مننا ايه ؟ فاكر نفسك إله واحنا  
عبيدك طظ فيك وفي اللى يوافق انه يشتغل معاك  
وخرجت من عنده وانا حاسس اني حر كنت فرحان .. لكن  
لما افكرت اني مبقاش معايا اللى اصرف بيه على نفسى ..  
حسيت ان حريتي ناقصة لأنى حسيت بالعجز .

محمود : لسه فاضل كثير يا وليد ؟

وليد : هو احنا لسه وصلنا حتى لنص الطريق ؟ .. لسه  
بدرى .

من كتر مالطريق ممل فرصه هروبي الوحيدة هى اني  
اهرب لأيامى اللى فاتت .. كانت مجلة حائط فكرت مع  
صحابي في اعدادى نعملها ونعلقها في طرقة الفصول في  
المدرسة .. سمينها ( رأينا ) وانا كنت رئيس التحرير وكتبت  
شعر فيها بينقد في السياسة وفي النظام وفي كل حاكم وفي  
كل صاحب كرسي .. وكمان شتمت في المدير بتاع المدرسة ..  
وعلقنا المجلة .. واترعبت من رد فعل المدير المنتظر ..  
كنت كل يوم افرح لما اشوف طالب واقف يقرأها واستنى  
اللحظة اللى عينه هتنزل فيها على شعري وتقرأه .. لكن  
كنت مستنى اليوم الاسود اللى المدير هيعدى فيه وهيقرا  
الكلام ويعلقنى في قلب الطابور .. بس المدير طول الترم

ماقراهاش .. او قرا وعمل مش من هنا ... ايه يا عنى طالب  
كتب شعر فى بيت من بيوته بيشتمنى هعمل راسى براسه ؟

محمود : فاكر لما نزلنا الثورة يوم ٢٥ يناير

وليد : ( يضحك ) اه طبعا .

كنا شلة كبيرة انا ووليد وحاتم وجبر وعاصم والليثى  
وايهاب وخليفة وعتابى وزيزو ومصطفى وصحاب تانيين  
كثير ومحمد اخوية .. كنا متجمعين عند جبر .. مكناش  
مصدقين ان فيه حاجة ممكن تحصل او ان ممكن فى يوم  
يحصل تغيير فى اى شئ .. لكن لما عرفنا ان الموضوع مش  
هزار قولنا نزل ... ونزلنا الساعة ١٢ بالليل .. واحنا رايعين  
الميدان عرفنا انهم فضوه .. وان اللى فى الميدان اتحركوا فى  
مسيرة .. رايحة فى منعرفش .. لسه هنسأل فى المسيرة  
دى .. لاقيناها معديه علينا فى شارع عماد الدين فى وسط  
البلد مشينا معاها .. ( الشعب يريد اسقاط النظام )  
( سلمية .. سلمية ) ... هتفنا مع اللى بيهتفوا .. قابلنا ناس  
كثير نعرفهم .. قبل مانوصل نفق شبرا (خليفة صاحبنا )  
اختفى .. روح على بيته .. و ف نفق شبرا كنا اول مرة نعرف  
يعنى ايه غاز مسيل للدموع وليد اتقدم فى خطوط المواجهة  
واضح ان المسيرة اللى احنا كنا فيها كانت عايضة تتقابل  
مع مسيرة تانية فى شبرا .. بس الامن المركزى وقف عشان  
يمنعنا . بعد محاولات كثيرة قرروا اللى بيقدوا مسيرتنا اننا  
ندخل فى شوارع السبتية وفعلا مشينا فى شوارع وحوارى

ضيقة .. كنا فرحانين .. مكناش فاهمين احنا رايعين فين او ايه اللى ممكن يحصل .. كانت اول مرة معظمنا يهتف او يواجه او يتضرب عليه قنابل غاز ومطاطى .. كنا فرحانين كأنه عيد .. الساعة بقت واحدة والمسيرة ماشية والشوارع والحوارى الضيقة مبتخلصش .. الناس فى البلونات بتهتف معنا .. شباب بينزلوا من بيوتهم ويمشوا معنا .. فرن عيش ( فينو ) يدينا صاج قرص عشان يبقى شارك معنا ... ولأننا جوة الحواري ماشيين فى امان .. مش عارفين ايه اللى مستنينا او ايه اللى هيحصل او فيه فائدة من اللى بنعمله ده والا لآ .. بس الحقيقى اننا كنا فرحانين .. بعد ساعتين او ثلاثة مشى متواصل بهتاف متواصل المسيرة طلعت على كورنيش النيل فى روض الفرج .. بس المسيرة فى عزها كان فيها حوالى 5000 مش عارف ازاي وصلنا وبقينا 500 المهم طلعتنا وابتدى الدب الشديد ... طلعتنا نجرى .. كنا برضه شلة .. نفس الشلة .. قولنا نروح على بيوتنا .. لكن وقفت فجأة الميكروباصات ونزل منها الوحوش بتوع الداخلية وفى اديهم العصيان والشوم وطلعتنا نجرى وهما يجروا ورانا .. حاتم وزيزو وجبر وعاصم نزلوا استخبوا فى الشجر اللى جنب النيل .. وايهاب طلع استخبي فى عريية نقل ورا السواق .. وانا وعتابى ومصطفى واخوية محمد طلعتنا نجرى لحد مالقينا قهوة قعدنا عليها وطلبنا شاي ودلقنا نصه وفتحنا الطاولة ورصيناها قال يعنى بنلعب من زمان .. بس بنبص مالقينا ش اخوية محمد لانه وهو بيجرى

اتكعبل مسكوه هو وواحد صاحبا تانى واتضربوا حته  
علقة مش هينسوها .. اتضربوا لما اتمسكوا ولما طلغوا  
الميكروباص ولما راخوا القسم ولما خدوهم ع المعسكر..  
لحد ماطلعوا تانى يوم بالليل .

لما افتكرنا انا ووليد حكاية ايهاب وازاى نزل مالعربية  
النقل لقى نفسه فى فرن عيش بلدى فى امبابة قعدنا  
نضحك .. ولما افتكرنا محمد اخوية لما اتصل بينا وهو  
فى الميكروباص ممسوك عشان يقوللى انا اتمسكت وقام  
واحد ماللى ماسكينه خد موبايله ورد عليه وكلمنى وقاللى  
اقفل يا بن الـ وقام حاطت الموبايل فى جيبه وضرب عليه  
قعدنا نضحك .

**نزلنا الميدان .. وعشنا ايام الميدان .. ونزلنا حاجات  
كثير بعد ماتفض الميدان .. بس انا ووليد محكيناش  
كثير عنها .. كل اللى قولناه اننا قدرنا .**

وليد : طب ايه اللى حصل ؟

محمود : يمكن كل اللى صدقناهم طلغوا كدابين ..  
يمكن كل اللى صدقناهم طلغوا طماعين ؟ كل الوعود كانت  
نفاق .. كل صورهم اللى حاوطت حياتنا على الحيطان وفى  
المحلات وجوة القهاوى وفى الشاشات وفى كل مكان كانت  
صور اقنعة .. كلهم ... كلهم طلغوا كدابين .

وليد : طب واحنا كنا كدابين ؟

محمود : احنا مين ؟

وليد : احنا .. انا وانت واللى زينا

محمود : احنا الشئ الحقيقى وسط كل الكذب .. احنا  
الى كلهم بيتكلموا بلسانا .. ولسانا برئ من كل كلامهم .  
وليد : طب وليه احنا ما نتكلمش .. ليه سايبينهم يتكلموا  
بدالنا .

محمود : مش عارف ؟ .. يمكن صوتنا مكتوم مش  
عارف يخرج

وليد : كتموه ؟

محمود : أكيد

وليد : مين بالضبط ؟

محمود : كلهم

وليد : وجايز نكون احنا نفسنا توهنا ومش عارفين  
احنا عايزين ايه ؟

محمود : ممكن ... قربنا نوصل والا لسه ؟

وليد : نص الطريق قرب

محمود : ياه كل ده ولسه حتى ماوصلناش لنص الطريق.

كانت شبورَة بدأت ترمى لونها الرمادى على الطريق ..  
ونور الكشافات كان يدوب بينور الطريق بالعافية .

فى ٢٠٠٨ كتبت مسرحية اسمها ( طائر ) .. كانت بتدور  
احداثها فى زمان ومكان من الخيال .. كانت بتحكى عن ولد

اتولد من غير لسان ولأنه وهو لسه مولود كانت اديه بتعافر  
وبتتحرك جامد كأنه عايز يطير سموه طائر .. ابوه مات  
بعد ماتولد على طول من كتر حزنه على ابنه اللى اتولد  
من غير لسان .. وامه عزلته عن العالم والدنيا كلها عشان  
خافت عليه من الناس .. وسابته يعيش وسط الطيور..  
اتعلم لغتها كان يفهمها وتفهمه .. بس كان بيحلم طول  
الوقت انه يطير .. بعد وقت امه حست ان معاد نهايتها  
قرب قالتله انها هتموت وقالتله لما تحب تشوفنى بص  
لأى سرب حمام طائر فى السما هتلاقينى فيه... وفهمته  
انه لازم يخرج للناس ... ماتت ... وهو .. خرج للناس..  
خرج للعالم اللى عمره ماكان يعرف عنه شئ .... كان عايز  
يشتغل اى حاجة لكن اهل القرية الخيالية اللى خرج ليها  
كانوا فقرا محدش منهم يملك شئ عشان يشغله .. مفيش  
فلوس ومفيش حد يبشترى ولا حد يبييع من كتر الضرايب  
الى عمدة القرية وشرطيها فرضوها عليهم .. لكن طائر  
مايأس وقف قدام محل يبييع اى شئ ورقص للناس رقصة  
كلها حب وامل .. رقصة طيور.. فواحد من الناس اشترى..  
صاحب المحل كان اسمه ( إريوس ) كان شاب فى سننا ..  
إريوس حس ان فى طائر ده شئ عجيب .. سحر مختلف ..  
براءة مش موجودة فى قسوة الحياة اللى بنعيشها .. خلاه  
يشتغل معاه .. الناس حبت طائر .. بدأت برائته تغيرهم..  
بدأوا لما يشوفوه ويقارنه بينه وبين نفسهم يكتشفوا  
حقيقتهم اللى اتشوهت وبهتت مع الفقر والبؤس اللى

عايشين فيه .. بدأوا يتغيروا .. وبدأوا يصنعوا حاجات كثير  
بيبعوها للقري اللى جنبهم .. . المطرة اللى كان بقالها كثير  
مامطرتش هبطت على اراضى الفلاحين .. بدأت حياتهم  
تتغير وانتقل نور الشاب البرئ لقلوبهم .. وهو كان من  
وقت للتانى يبص للسماء كل مايشوف سرب طيور طائر فوق  
السحاب ويشاورله عشان كان بيبقى متأكد ان امه طيارة  
وسط الطيور .. شرطة القرية وعمدتها رجعوا يظهرها تانى  
لأهل القرية عشان ياخدوا منهم الضرايب بعد ما عرفوا ان  
اهل القرية بدأوا يعيشوا فى ازدهار لكن الناس كانت فاقت  
.. حصل فى حياتهم حالة من اليقظة .. صحبوا بعد نوم  
طويل .. اتحدوا الشرطى .. وقفوا قصاده .. طردوه من  
القرية هو والعمدة .. وراحوا لطائر وقالوله انت الملاك  
اللى ربنا بعته لينا من السماء عشان يطهرنا .. انت النبى  
اللى اتبعث فينا عشان يهدينا ويعلمنا ... وبدأوا يطلبوا منه  
انه يشفى مرضاهم وانه يحيى موتاهم .. بدأوا يطمنون انه  
لو الشرطى والعمدة حاولوا يرجعوا طائر هيدعى للسماء  
فهيزول الخطر .. و بدأوا يطلبوا منه انه ينزل المطر ..  
حاول يشرحلهم انا مش نبى ولا ملاك .. انا طائر .. مجرد  
شاب نفسه يطير .. مصاحب كل الطيور على امل فى يوم  
يطلع له جناحات يحلق بيها فى السماء ويطير .. لكن لأنه  
من غير لسان الناس مفهمتش غير اللى عايزين يفهموه ..  
انت النبى .. انت الملاك .. الشرطى رجع وحرقت القرية ..  
حرق كل الشوارع والبيوت والمحلات .. حلم الناس انكسر ..

حاکموا طائر لأنهم صدقوه .. قالوله مش انت النبی ازای سبت بیوتنا تتحرق .. حاول يتكلم معرفش .. قالوله انت مش نبی .. مش ملاک .. حاول يقولهم انا مقولتس غیر انی طائر .. لكن ضریوه .. عذبوه .. جرى علیه إریوس يحوشهم عنه .. وقاله ابعد عن هنا .. ابعد عن الناس .. إریوس کان بیکی .. قاله لیه جیت .. انا كنت عایش حیاتی کلها مستنی النور الی هییجی ویغیر حیاتنا .. مستنی الامل الی هیرجع لینا الروح بعد ما عیشنا سنین طویلة اموات . ولما انت جیت حسیت ان الحلم الی حلمته طول حیاتی اتحقق .. وان الأمل موجود .. لكن دلوقتی بعد مالامل جه وراح .. بعد الحلم الی كنت مستنیه ماتحقق وفي نفس اللحظة مات .. مش هعرف استنی حاجة تانی .. مش هعرف احلم تانی .. مات الأمل والحلم .. طائر بیتألم .. کل اهل القرية بیشفوه هو السبب فی الخراب .. إریوس بس هو الی بیفضل عارف ان طائر کان الثورة الی استناها عمره كله ولما جت الناس رفضتها . بیحضر طائر وفي احتضاره بیشوف امه وابوه جاینین یاخدوه ویركبوله الجناحات الی هیطیر بیها ... بیموت ... ویحقق حلمه فی الموت ویطیر .

یوم ما أخرجت آخر مشهد فی المسرحیة دی بکیت کثیر اوی .. مش بس انا .. لأ .. والفریق كله الی کان یمثل فی المسرحیة .. کلنا بکینا بکاء هیستیری زی الأطفال .. مش عارف لیه وانا ساییق افترکت المسرحیة دی .. یمکن الشبورة لما زادت فرضت شیء من الخیال قدام عنیه .. دایما الحلم

في الأفلام يجيبوه متغلف بشبورة ... بس الشبورة زادت لدرجة انها حجت اى رؤيا .. مش شايف اى حاجة .. مش قادر حتى اميز انا ماشى ع الطريق والا دخلت في الصحرا .....

كان لازم اوقف العربية ... كان لازم نقف وما نكملش .. وف ثورة غضب نزلنا .

## على المسرح



( محمود ووليد ينزلان من السيارة ويبدو عليهما  
الغضب الشديد )

محمود : ( في غضب وثورة ) طب ايه بقى ؟ ... ايه بقى ؟ ... هفضل كدة ماشين مش عارفين رايعين فين ولا جاينين منين والا هاييجى علينا وقت ونعرف ؟

وليد : ( وقد انتصر عليه اليأس الذى كان يحاربه  
طوال الوقت ) ايه اللى قدامنا وايه اللى ورانا ؟ ...مين  
مستنيننا ومين ومش فاكرنا ..هنفضل كدة تايهين ؟

محمود : انت بتسألنى انا ؟ .. منا واقف جنبك اهو  
فى قلب البحر والموج عمال يضربنى فى وشى يمين وشمال  
مش عارف اشوف

وليد: طب والحل ايه هنفضل كدة عميان .. بنعوم فى  
بحر مالهوش نهاية

محمود : هنفضل نسال بعض وبرضه مفيش اجابات

وليد : ( منفجرا ) طب اسال مين ...مين عنده اجابه  
يقوللى انا رايح فين وامشى من انهى طريق ... اكمل والا  
ارجع .. ولو رجعت هبقى صح والا غلط .. ولو كملت فيه  
حد هيدينى خريطة والا هخبط فى الصحرا واتوه .. وليه  
نص الطريق بالذات .. نص طريق العمر والحلم والرحلة  
والتدوير .. ازاي كل سؤال تبقى اجابته بالايجاب والنفى ...  
ازاي تتساوى الـ أه والـ لأ .. ازاي يتساوى القبول بالرفض  
والجد بالتهريج والعقل بالجنون .. كل المعانى المعكوسة  
بتختلط ازاي وليه ؟

محمود : عشان متعرفش تحلها ...وتفضل كدة تايه مش  
عارف تروح فين وتيجى منين .. تايه بين ميدان وميدان ..  
بين دين ودين .. بين لون ولون .. بين رحلة وسكون ..  
بين انتماء ولا انتماء .. ثورة وكنبة .. حقيقة وتزوير ..

وطنى وعميل .. فيزيد الضباب قدام عيننا ونفضل في مكاننا  
مستنيين الصبح لحد مايجى .. وييجى الصبح .. زحمة ..  
مليان دخان برضة ميخليناش نعرف نشوف الطريق كويس  
.... يالله بينا ياعم نرجع بلاش نكمل

### ( يسود الصمت للحظات )

وليد : خسارة ده احنا قطعنا نص الطريق  
محمود : مالناش نصيب ... مالناش نصيب .. نرجع  
احسن اكيدهنلاقهم مستنيين ع القهوة  
وليد : ( في يأس ) اكيدهنلاقهم .. واهو برضة نضيع في  
شوية وقت ... نتكلم . نلعب . نضحك  
محمود : تفتكر هنلاقهم ؟ ... ( صمت ) .. اكيدهنلاقهم .. هيروحوا فين ياعنى ؟  
وليد : الشبورة زادت قوى ... اكيدهنلاق ناس كتير  
راجعة مكملتش

محمود : اه اكيدهنلاق بينا نرجع

( يتجهان الى السيارة الا ان وليد لا يزال لم يفقد الأمل .  
يستوقف محمود في محاولة أخيرة )

وليد : طب ما نستنى شوية ... نستنى .. يمكن الشبورة  
دى تقل و نغير رأيانا ونكمل

محمود : ( ساخرا ) الشبورة دى تقل .. عارف انا لو  
عندى شك صغير إن الشبورة دى ممكن تقل انا كنت  
استنيت .. لكن انا عارف انها مالهاش نهاية ... ياالله بينا  
ياالله بينا

( يدخل في هذه اللحظة الاصدقاء كلهم )

عاصم : ايه رايعين على فين ؟

محمود : راجعين

مى : ايه عايزين تمشوا وتسبقونا ؟

حاتم : فاكرينا هنفضل قاعدين ع القهوة حاطين ايدينا  
على خدنا مستنينكوا لما ترجعوا ؟

ايهاب : انتوا عايزين رحلة زى دى تفوتنا ؟

محمود : لأ ده احنا كنا...

عاصم : ( مقاطعا ) ايه ياعم شقتك مش هتكفيننا؟

محمود : لا هتكفيكم بس ...

عاصم : لا بس ولا مابسش .. بص احنا هناخد شقة فى  
نفس الشارع المهم نكون كلنا مع بعض

وليد : ( فى فرحة وسعادة ) شقة فى نفس الشارع ايه ؟ ..  
احنا كلنا هنقعد فى مكان واحد

محمود : نقعد فى مكان واحد ايه احنا مش كنا هنرجع  
دلوقت و...

الليشى : جرى ايه يا جماعة احنا هنقعد نتكلم ونضيع  
وقت كدة كتير

مروة : يلا عشان نكمل طريقنا

سمر : السكة قدامنا طويلة ومفيش وقت نضيعه

محمود : طب نستنى لحد الصبح بتاع ربنا ما يظهر

مصطفى : صبح ايه يا عم .. احنا عايزين الصبح يبقى  
طالع علينا واحنا هناك

محمود : هنمشى فى الضلعة يا عنى ؟

عتابى :هنمشى ورا بعض وهنور الكشافات

محمود : طب والشبورة ؟

زيزو : يا عم هنمشى ورا بعض كلنا صف واحد ونبور  
لبعض .. ومحدث فينا يسبق التانى

مروة : وطول ما إحنا ماشيين صف واحد عمرنا ما  
هنتوه من بعض ابدا

خليفة : ولو حد فينا إتكعبل فى مطب يعرف اللى وراه

حاتم : واذا مكناش احنا اللى هنسوق فى وسط الشبورة  
امال العواجز يعنى هما اللى هايسوقوا ؟

محمود : هما برضة مشيوا الطريق قبل كدة وعارفينه  
كويس

حاتم : ياعم واحنا منقدرش نستغنى عنهم .. أكيد لو  
احتاجناهم في حاجة .. هما هيدلونا

وليد : هنقعد كدة نتكلم ونزغى .. يالله بينا ياجدعان .

الجميع : ايوة يالله بينا

الليثي : ثانية واحدة .. ايه يا جماعة احنا مش هناخد  
صورة والا ايه ؟

الجميع : ( اصوات متداخلة ) اه صحيح ... يلا بينا ....  
ايوة يلا



(يقف الجميع في نفس مكان الصورة الاولى ويتكرر  
نفس الحوار .. الليثي يضبط الكاميرا .. يسأله محمود )

محمود : طب وانت مش هتتصور معانا والا ايه  
الليثى :هتصور معاكوا يا سيدى  
(يقفون جميعهم وبعد ان تلتقت لهم الصورة )  
عتابى : ثلاثة وعشرين  
مى : اتنين وعشرين سنة  
عاصم : تسعة وعشرين سنة  
مصطفى : اربعة وعشرين سنة وشهرين  
الليثى : مواليد ١٩٨٥  
وليد : بعد ثلاث شهور هتم ثلاثين سنة  
على : مش عايز افتكرك  
سمر :فيه حد يسأل بنت على سنها  
خليفة : فيه حد يسأل ولد على سنة  
ايهاب : انهاردة بقى عمرى ٢٧ سنة

( يعلو صوت الموسيقى بينما يظلم المسرح  
ويغلق كتاب المسرح صفحته )





Tamer Habib

21 hrs via Instagram

١٩٨٠ و انت طالع ... عرض ببشع صدق في بهجتة و المة،  
شكرًا يا اصدقائي الموهوبين علي كل تلك الطاقة  
الإيجابية ، ماتفتوهوش و علي ضمانتي



kindalloush



2d

3,607 likes

kindalloush

١٩٨٠ و انت طالع عرض رائع و شباب هوسايبير في  
رائعين.. أنصح الجميع بمشاهدته في مسرح هوسايبير في  
وسط البلد عرض مبهج نكي مليء بالطاقة.. كباريه سياسي  
نكي وحناب



صبرى فواز  
@SabryFawwaz

شكراً فريق عمل مسرحية ( 1980 و  
انت طالع ) .. على المتعة و البهجة و  
الصدق  
عاش الشباب .. عاش الشباب ..... و  
عاش الإبداع يا عم الحاج

Translate from Arabic



Tweet



Amr Hamzawy ✓  
@HamzawyAmr

1980 وانت طالع .. عرض مسرحي بديع  
يستحق المشاهدة  
[m.facebook.com/1980wtale3?ref...](https://m.facebook.com/1980wtale3?ref...)

Translate from Arabic



Tweet



**Khaled Abol Naga** ✓

@kalnaga

1980\_وانت\_طالع  
مسرح شبابي انصح بمشاهدته  
الهوساير 7 مساءً يومياً  
يهلك من الضحك  
#لو\_كانوا\_سألونا\_قبل\_ما\_يحكمونا

Translate from Arabic



Reply to Khaled Abol Naga



Timelines



Notifications



Messages



Me





Amr Salama

12 mins · Edited · 🌐

اسباب مهمة ليه لازم تلحق تتفرج على مسرحية بتعرض دلوقتي اسمها "١٩٨٠" وانت طالع..."

\* ترجعلك إيمانك بان ليه لسة في مسرح في مصر.

\* هايبهرك الزحمة، المكان مكتظ بمتفرجين معظمهم جايبين يشوفها ثاني، ناس قاعدة على السلالم والأرض، بيغنوا مع الأغاني وحافظينها.

\* بتثبتك ان في مواهب كثير في مصر مش معروفين اعلاميا وهم موهبتهم تكفي دول ثانية.

\* ازاي بتعبر عن شباب مش لاقيين حاجة تعبر عنهم، لا صحافة ولا إعلام ولا فن، قدروا يوصلوا صوتهم ويصرخوه.

\* بتزق حواجز الصمت اللي اتخلقت ثاني من غير خوف، وتصنيف الجمهور بيؤكدك انك مش لوحدهك اللي محبط ومكبوت وغاضب.

\* علشان تنبهر بان الشباب عاملين المسرحية بمجهودات ذاتية، بالعافية مأجرين المسرح، لا عندهم فلوس للتسويق او الدعاية، دعايتهم بس كلام ناس زيك عليهم.

\* علشان تضحك وتستمتع وتعيط.

\* علشان تشوفها وتعملها دعاية بعد ما تنبهر فيشوفها ناس اكثر ومجهود الشباب دول ما يروحش هدر، لان كل أسبوع احتمال كبير يكون اخر أسبوع ليهم.

اخيرا أحب اقول لكل صحفي وإعلامي وباحث يشوفها ويتكلم عنها ويروجها وكمان يؤرخها لانها نقطة مهمة في رحلة المسرح المصري. بوعدكم.. روحوا شوفوها في مسرح الهوساير.. وهاتدعولي.



إنهى الكتاب  
بس ناقص ملحوظة و شكر

## الملاحظة

لكل شخصيات الكتاب حقيقة  
لكن مش شرط ترتبط شخصياتهم بالأسماء المذكورة...  
يعنى عاصم مبيشر بش حشيش  
و عتابي مش متجوز.. ( ربنا يوفقه ) ...  
ودليد مش مسافر برا ...  
لكن مصطفى شوية بيمشى مع بنات ( بصراحة كثير ) .

# الشكر

للك من

الأستاذة / هالة البشبيشى

الأستاذة / أروى قدورة

الأستاذة / زينب أحمد

الأستاذ / جمال ابراهيم

الفنان / عاصم رمضان

الصديق / شريف الليثى

وشكر خاص لجميع العاملين بمسرح الوسائط

و بمسرح جيزويت القاهرة

# الصورة اللي بعد الاخير

ط

الصورة دي بتاعتك انت،

صورتك

ولاني معرفش عنك حاجات كتير،

هنا

أكتب اللي انت عايز تكتبه.

هتكتسل؟؟ حاول تكتبه.



